

62554/8

MEDICAL SOCIETY
OF LONDON



ACCESSION NUMBER

PRESS MARK

HAEN, A. de

10 11 11 11

10 11 11 11

U2

ANTONII DE HAEN

S. C. R. A. MAJESTATIS CONSILIARII
ET ARCHIATRI,

MEDICINÆ IN HAC ALMA ET ANTIQUISSIMA
UNIVERSITATE PROFESSORIS PRIMARI, PLU-
RIUM ERUDIT. SOCIETATUM SOCI,

TOMUS PRIMUS
RATIONIS MEDENDI
CONTINUATÆ,

IN NOSOCOMIO PRACTICO,
QUOD IN GRATIAM ET EMOLUMEN-
TUM MEDICINÆ STUDIOSORUM
CONDIDIT

MARIA THERESIA,

AUGUSTISSIMA ROMANORUM

IMPERATRIX,

HUNG. BOHEM. &c. REGINA &c. &c.



VIENNÆ AUSTRIÆ,

SUMPTIBUS HERMANNI JOSEPHI KRÜCHTEN,

M DEC LXXI.

ANTHONY & HARRIS

OF NEW YORK

PRINTERS

100 NASSAU ST. N.Y.

1857

THE

NEW YORK

LIBRARY

OF THE

CITY OF NEW YORK

1857

THE

NEW YORK

LIBRARY

OF THE

CITY OF NEW YORK

1857

THE

NEW YORK

LIBRARY

OF THE

CITY OF NEW YORK

1857

THE

NEW YORK


LIBRARY

OF THE



PRÆFATIO.



 Annuo more vice quinta decima meorum edo epitomen laborum. Hanc ut commendem Lectori tam procul quidem abest, ut e contrario quo minus displiceat, pauca præfari oporteat, diversamque prænarrare materiem: ut, qui lecturi Opus sunt, diversi

P R Æ F A T I O.

quippe studii eruditionisque Viri, id in eo feligere, quod ipsorum genio accommodatius; id præterire, quod tædiofius foret, commode possent. Medica scilicet, & Politica tracto. Cum utraque eo, quo hic tractantur, modo, rectâ ad Medicum spectent, nihil, quod Medicos præmoneam, habeo: Hos vero, qui populo gubernando, administrandæque ejus saluti, admoti, ejusmodi rerum enarratione potissimum delectari solent, quarum ipsos interest, de iis Operis locis, qui tales recondant, præmonere necesse est.

I. Discutit Caput V. de Variolarum insitarum cum naturalibus Variolis comparatione: de ejusmodi

Va-

P R Æ F A T I O.

Variolarum, natura genitarum, administratione, quæ cives omnium numerosissimos Reipublicæ præ ceteris in vita conservans, tuenda certe, promovendaque, Sapientibus salutis publicæ Moderatoribus videbitur: tandem de Methodo Variolas, in popularitate sua haud per raro populatrices, sic sistendi, ac prævertendi, ut vix adoriantur mortales.

II. Magni ad salutem publicam interest Politicos Viros probe ea adminicula nosse, quæ popularium morborum virulentiam, progressumque, mature sistere queant. Variarum methodorum, cum Contagiosos morbos, tum Pestem ipsam, præ-

P R Æ F A T I O.

cavendi, sistendi, moderandi, re-
censionem Caput VIII. sistet: com-
moda quoque & incommoda, vix
evitabilia, Methodi cujusque; quæ
præcavere nihilominus, quæ rele-
vare, atque emendare, omnino
Magistratum est; ut hi normam
demum conficiant agendi, quæ,
quoad ejus fieri possit, commoda
sine incommodis sit, sine noxis
proficua, & publicæ salutis serva-
trix tutissima. Haud enim Diatri-
bas meas, propositionesque, ap-
tas censeo esse, quæ in calamitosis
ejusmodi temporibus, quæ aver-
runcet DEUS! exactas formarent
agendi leges. Animus unice fuit
defectus ostendere, salutisque pu-
blicæ neglectus, quibus invita ad-
huc

P R Æ F A T I O.

huc laboret in horum administratione Politia. Porro etsi illa, quæ ad eosdem sive tollendos, sive diminuendos, candide proposuerim, punctum omne non tulissent, adminiculo tamen fore reor, quo, qui præfunt istis, normam agendi minus defectuosam, minusque noxiam, postliminio condant. Eumque in finem venerandos meos Collegas omnes hortor amice, si in istis penitus me quid prospiciant, melioraque norint, ea proferre in lucem velint, ut civium PATRES de omnium nostrum sinceritate, de candore nostro, deque debito in Rempublicam amore convicti, mutisque nostris observatis adjuti,

PRÆFATIO.

ejusmodi leges in fata talia parent, quæ in omni contagionis tempore cum Veterum errores tollant, tum nostros quoque minuant, emendentque defectus.

III. Displicere quoque Celso Regimini non poterit altera Operis pars, de Submersis agens; in qua videbit nullis me sumptibus, nullis me pepercisse laboribus, ut clariorem in lucem grande hoc negotium collocaretur, quemadmodum mox pluribus dicam.

IV. Spectabunt tandem ad eosdem gravissimos Viros ea, quæ Capite de Aquarum potabilium natura, salubritate, varietateque, notavi: ut primo salubriores communem in potum aquæ internoscantur,

&

P R Æ F A T I O.

& deinde, ut si qua five negligencia, five fraudulentia, in aquis variis, quæ vendibiles *Viennæ* prostant, committi deprehendatur, ea corrigi pro suprema eorum sapientia possit. Alterutrum enim vitii genus sublitescere necesse est, cum veneant tot species Aquarum, (Selteranæ modo exemplo sint) quarum lagenas bene multas, quod vel fatuæ, vel olidæ sint, abjicere cogantur potatores; interea dum Magnatum non pauci, Haustores earundem perpetui, has a fidis ad scaturiginem curatoribus, bis anno transferri curantes, vix paucas inter mille lagenas, minus valentes, rejiciant.

P R Æ F A T I O.

Medicis dixi me nihil monendum habere, quod ad materiæ delectum spectet, cum medicus sit libellus totus; aliquid tamen dicam necesse est, quoad methodum tractandi materiem.

I, Tædiosa multis videri mea Methodus potest, quod non dederit amoenum casuum compendium, verum figillatim de die in diem, deque hora in horam, phænomena morborum notet; atque functionum diversimodas, assiduoque mutatas, læsiones; medicamenti tandem cujusque & dosin, & effectum, particulatim enarret.

Qui germanas Praxeos regulas in succum, quod ajunt, ac sanguinem converterunt, hi neque nimie-

tate

P R Æ F A T I O.

tate hanc meam Methodum, neque prolixitate, taxabunt: qui vero minus, hi non mihi, sed sibi suum tædium adscribant, minime reprehensuri, si parem consuevissent admove-
re singulis adnotandis diligentiam. Nunquam mihi in animum inducam, *Hippocratem* æternas suas Diagnoseos, Prognoseosque, Leges conditurum fuisse, ni ex Pugillaribus suis, ad Lectos ægrorum conscriptis, Tabellas sibi confecisset, in quibus singulorum ægrorum Diaria, ordine recensita, mutuoque inter sese comparata, eam ipsi demum certitudinem peperissent, qua & in morbis cognoscendis, interstinguendis, dirigendisque, & in prænoscenda eorundem forte, jam ultra 2000.

an-

P R Æ F A T I O.

annos claruit, universæque Medicinæ non minus stupori, quam exemplo, fuit. Persuasissimus saltem horum ego, beatum illud mihi otium exopto, ut quas *ultra mille* ægrorum meorum Historias eodem modo conscripserim, in Tabellas conjicere, inter sese comparare, quid aut diversum, aut commune singulæ, quid immutabili lege omnes, quid sibi privum Acutorum species singulæ vindicent, adnotare accuratissime possem; & tandem, *Hippocratis* ad exemplum, ex iisdem in ordinem digestis, in classes divisis, atque in normam redactis, experi-ri, an Definitiones morborum justas, Regulas prædicendi certas, Curationes tutas fortunatasque nancisci, atque

PRÆFATIO.

atque gaudere, iis in morbis possimus, in quibus præclara *Hippocratis* Opera, vel quod non unus omnia præstare potuerit, vel quod multos oppido morbos, quos nos, non viderit ille, aut partim, aut omnino, deficiunt.

II. Singularem me hominem forte multi habebunt, &, quod priorem sententiam haud raro revocem, plane mutabilem, nec non ab opinione vulgari sæpe alienum, a non paucis dissentientem, pluribusque adversarium. Assertionis argumentum ex iis petent, quæ de Malignarum febrium natura, curaque, scripserim, quæ de Febre, quam *nervosam* appellitant, quæ de Sanguine

P R Æ F A T I O.

guinis natura, deque ejusdem mittendi legibus, quæ denique de cura Pestis, five prophylactica, five therapeutica, longe lateque commentatus fuerim.

Porro Singularem habere me ii poterunt, qui præter tritas Scholarum leges nihil sapiunt: hi vero qui amoeno, qui necessario, qui assiduo Antiquitatis studio, præclarisque præstantium singuli ævi Scriptorum monumentis impalluerunt, ingenue fatebuntur me non, nisi mediocriter doctis, singularem posse videri.

Neque ob id inconstantem me quis jure vocaverit, quod nonnunquam cecinerim palinodiam. Si pluries cum aliorum autoritate, tum

pro-

P R Æ F A T I O.

propria experientia, sententiam
amplexus sum, quam aut veracem,
aut vero similem, credideram; no-
vis autem, certioribusque experi-
mentis deprehenderam fallacem;
plurisne me ille faceret veterem opi-
nionem mordicus tuentem, quam,
irradiante Veritate, veteris opinionis
desertorem? Veritas dum nos in
rerum seu divinarum, seu humana-
rum, sive contemplatione, sive ad-
ministratione, illustrat, nos sic totos
rapiat oportet, ut piaculo, ut crimi-
ni esse ducamus, in veteri errore vel
momento persistere, aut pervicaci
superbia, ne nos errasse fateamur,
verum aliis reticere. Si *beata Vita*,
ad quam cuncti adspiramus, dicente
Augustino, nil nisi æternum de Veri-
tate

P R Æ F A T I O.

tate gaudium erit, quid nobis mutuo invideamus beatæ Vitæ in hac mortalitate principium?

Si præterea me quis aliquando offendat a vulgari opinione alienum; jurene, an injuria, id mihi vitio vertat? Si hinc defectus videam, quibus nonnullæ opiniones laborant, illinc vero Antiquorum Medicorum carentem his defectibus sententiam sic, ut ab ea breviorē nobis, tutiorēque, ad præcavendos, & curandos morbos, viam intelligam pandi; quo demum jure me quisquam hanc illis præferentem damnet? Neque tamen ideo me solum sapere puto. Quicumque ille demum eruditorum, candidorumque Virorum fuerit, qui in mea Malignarum, Nervosarumque febrium sive
Theo-

P R A E F A T I O.

Theoria, five Praxi, defectum sub-
olfecerit, lubentissime cum illo con-
feram; & quidem ea spe, fore, ut col-
latis utrinque difficultatibus, sic id,
quod aut forsan ego nimium, aut mi-
nus ille, habeamus, deletili sponsia
tergeatur, conficiaturque longe sa-
lubrior, quam aut ejus fuerat, aut
mea, norma agendi. Quibus neque
animi livor inest, neque altercandi
prurigo, sed sola Veritas, ac Pro-
ximi amor, cordi est, hi semper ad
conferendum me paratum, me faci-
lem, habebunt. Amo tales, vene-
torque. Mussitantes duntaxat, la-
trantesque usque ad ravim Canes,
contemnere soleo. Atque hæc de
prima Operis parte.

P R A E F A T I O.


In parte *altera* filum, a biennio abruptum, retexo. *Tomo meo XIII.* utilissimam quæstionem, de revocanda Submersorum sopita vita, in me susceperam, quo boni Civis officium explerem, plebem ad exequenda mandata excitando, quæ NOS-TRA INCOMPARABILIS AUGUSTA, ut vera Subditorum Mater, ad auxilium hisce miseris præstandum, pro innata sua munificentia præmio Sospitatores remuneratura, publicaverat. Cum autem ipso rerum usu deprehenderem, præjudicium tam altas plebis in animis egisse radices, ut debitam supremæ Voluntati obedientiam negaret; mearum partium esse arbitratus sum Opus, mediis ablatum incudibus,

P R A E F A T I O.

iisdem reddere, novisque experimentis urgere; ut tandem quid acceptius, quid publico gratius, quid ad persuadendum efficacius, in lucem prodiret. Quod quo proficuum magis foret, verti in patrium sermonem curavi, ne ultra existeret posset quis, qui aut de quo agitur negotium, ignoraret, aut non intelligeret se ad auxilium, Submersis Suffocatisque præstandum, conscientia obligari: Quo autem opportuniora præsidia admoverentur, omnem operam navavi, ut de eo mortis genere liquido constaret, quod istos e medio tollit. Deinde auxiliorum, tam quæ consuetudinis apud Antiquos erant, quam quæ apud

P R A E F A T I O.

Recentiores moris sunt, genera varia
examine, experimentoque subiecti;
quid boni, malive singula haberent,
discutii; quæque tutiora, ac præ-
stantiora essent, experimentis evici.
Tandem experimenta mea veracem
ostendent magni *Petri Muschen-
broeckii* sententiam, ingenuitate sua
fatentis: **PAUCA** experimenta nos
confidentes reddere, audaces, te-
merarios, gloriosos; **MULTA**,
incertos; **PLURIMA** denique, ac
humanam fere superantia patien-
tiam, ad aliquid concludendum,
agendumque, nos eminus præpa-
rare.



RATIONIS MEDENDI
CONTINUATÆ

T O M I I.

PARS PRIMA,



DE FEBRIBUS ACUTIS, CUM
MALIGNIS VARII GENERIS, TUM
PESTILENTIALIBUS.

Cum Bibliopola conquestus dudum sit, quod idem
semper titulus Operis, longorum annorum spatio com-
positi, &, si DEO lubet, ultra continuandi, sibi,
sociisque suis, plures ob causas molestus esset; ob id-
que, *Naturæ Curiosorum*, atque aliorum *periodicorum*
Scriptorum exemplo, Titulum ut nonnihil mutarem
petiverit; loco *Rationis medendi*, nunc voco eam *Ra-
tionem medendi continuatam*: estque igitur *Rationis*
medendi hoc sub titulo PRIMUS TOMUS.

Porro priore titulo prodire Tomi XIV. quem
XV. excipiet, indicem priorum locupletem, & non-
nullarum sententiarum sive elucidationem, sive am-
plificationem, sive correctionem, daturus.



Elenchus Capitulorum

PRIMÆ PARTIS.

Caput I.

Prospec̃tus totius hujus primæ partis.

Caput II.

Enumeratio morborum, quos malignos vocare possumus.

Caput III.

De Signis malignitatis in genere.

Caput IV.

De averruncanda aut mitiganda malignitate morborum.

Caput V.

Methodus præcavendi, moderandi, curandique, malignitatem in Variolis.

Caput VI.

De Morbillis.

Caput VII.

De Scarlatina febre.

Ca-

Caput VIII.

De Miliaribus, & Petechiis.

Caput IX.

De Febris vere malignis.

Caput X.

De Febre pestilentiali.



CAPUT I.

Prospectus totius hujus primæ partis.

§. I.



Anno proxime priore, in XIV.

Tomi parte altera, de Pe-
ste egi, acutorum mor-
borum perniciosissimo, eo-

quod ejus Pertractionem adeo con-
fuse traditam hucusque vidissem, ut
quam tandem viam capefferent, quam
methodum amplecterentur, quem se-

querentur autorem, penduli hæerent Tirones. Placuisse doctis in Europa Viris laborem intellexi; nec displiciturum confido quod jam prodo, conamen eo in genere morborum, quæ gravitate symptomatum, quæ signorum pravitate, quæ discrimine vitæ, morteque frequenti, ad Pestem accedunt quam proxime. Id quod eo magis profuturum spero, quo is, quem vivimus, & in quo scribimus, annus, majore eorundem infamia laboraverit.

Sequutus itaque universaliozem Morborum acutorum divisionem in BENIGNAS, & MALIGNAS, malignorum classem præprimis tractabo, Pesti aut propiorem, aut proximam, multaue communia cum Pestis & natura, & cura, habentem. His absolutis ipsam pestem aggrediar.

Benignos morbos acutos Schola Medica appellare eos consuevit, quos
causæ

causæ leviores genuerint; quos symptomata consueta vi, ordine, numeroque, concomitentur; quos vires non admodum deferant; quos remedia solita facile curent; quos Medici sive pravi, sive ignari, rarius pejorent; quandoquidem valentior Natura haud morbo duntaxat, verum etiam Sarcinatori cuicumque, viribus præpollet, neque minus inepto, quam apto Medico, famam conciliat, auctoritatem, honores, opesque.

Malignum ex adverso eum vocare morbum solemus, qui gravioribus de causis natus; qui sociatus symptomatibus, cum vi, numeroque, tum in verso ordine, multo deterioribus; vel ab ipso principio, vel serius, vires vehementer projectas habeat, nec solitæ methodo auscultet; sinistrequè tractatus, & majoris discriminis sit, & frequentioris interitus.

Recentiores Scriptores hic non morabor, qui Malignitatem morborum a cutaneis intelligant definiantque symptomatibus: sequor veram Scholæ Medicæ definiendi legem, quam & ex *Hippocrate*, *Galeno*, *Celso*, *Aretæo*, Viris venerandæ Antiquitatis Principibus, & a *Sydenhamo*, *Boerhaavioque*, præclaris ævi recentioris ornamentis, didici, olimque tradidi. Nonnullæ quidem eruptiones cutaneæ morbum cum pejorem reddunt, tum discrimine plenior, at vero non in universum eruptiones omnes; cum dentur quæ levent, omnique eximant periculo hominem; ita ut hi novo suo definiendi modo nedum illustrent, sed potius obfuscant Artem.

Longiorem hic me non oportet esse, jure referentem Lectores ad ea, quæ a Temo III. hujus operis, per sequentes singulos, ex veris Artis prin-

principiis, tradidi, temporumque iniquitate coactus, plus æquo recoxi.

CAPUT II.

Enumeratio Morborum quos malignos vocare possumus.

§. Unica. *Cunctos morbos acutos, ab Ephemerâ protracta, ad ipsam usque pestem, benignos esse, malignosque; imo ne ipsas quidem intermittentes Febres excipiundas esse, observata docent.*

§. I.

Acutorum morborum nullus est; quem ad hanc classem nonnunquam non referamus. Ac 1^{mo} quidem ipsam Ephemeram febrem protractam, & Synochum non putrem; quibus periculum conjunctum, si in corpora in-

ciderint illibatae valentisque naturae, nemo Medicorum novit; hanc profecto, ceterum aut sponte fatiscentem sua, aut levi cedentem auxilio, errores sive Medentium, sive Aegrotantium, malignum aliquando reddunt, ut capite sequenti patebit.

2^{do} Communes acuti morbi, in corpora pravæ prædispositionis cadentes, malignitatem sæpe non modicam habent.

3^{tio} Quemadmodum continuæ Febres adeo blande quosdam afficiunt, ut modicum admodum id periculi sit, quod conjunctum habent, ita alios tam male multant, ut vel mortem ægri oppetant, vel diu minentur eandem.

4^{to} Febres continuæ remittentes natura sua frequenter in malignitatem abeunt, ni caute illa, matureque, præveniatur.

5^{to} Ipsa alioquin adeo benigna intermittens febris, ut ipsius Medicinæ loco sit, morbosque alios fuget, summæ malignitatis aliquando esse deprehenditur.

6^{to} Morborum inflammatoriorum benignitas tanta frequenter est, ut quævis artis antiphlogistica præsidia suum mox effectum sortiantur, brevique reddant homini sanitatem: haud raro tamen vel nihil auxilia levant, vel ad eadem ingravescent; sic ut vel ingenti vitæ discrimine versetur æger, vel diu langueat, vel in maturiorem, ferrioremve mortem tendat tandem. Angina, Peripneumonia, Pleuritis, ceterique id genus morbi, seu sporadice, seu, quod frequenter, epidemice invadant, hujus sæpe testes sunt.

7^{mo} Crebrioris autem malignitatis morbi ii, quos in Arte exanthematicos appellant, esse solent, benigni-

tatem licet perfæpe redoleant. Quid enim sæpe benignius Variolis, five Sporadicis, five Epidemicis, quibus affecti infantes, pueri, adolescentes, juvenes, adultique, aut Naturæ, aut Medicinæ opera, cito, integreque, convalescunt? Quid e contrario Variolis malignius, dum ejus naturæ sunt, ut nisi rerum gnaros, sagacesque Medicos nanciscantur, vel in mortem, vel in mutilatam tendant sanitatem; imo & cunctorum Medicorum operam morbus eludat? Neque aliud nobis judicium de Morbillis est, Variolas malignitate nonnunquam superantibus; non aliud de Scarlatina febre, deque Erysipelatosa, tandem neque de eruptione coacta Miliarium, Petechiarum, Aphtharumque.

8^{vo} Ipsam denique Pestem in malignam, benignamque dividere, observata jubent; quemadmodum To-

mo proxime priore hujus operis constitit, & evidentius postmodum patebit.

9^{no} Imo Febres intermittentes, passim benignas, nonnunquam aut sporadice, aut epidemice, in vere intermittentes Apoplexias, Pleuritides, Colicas, &c. abire, hominemque necare, vere proinde malignas reddi, Practicis notum est. Vide meas *Thes. de divis. Febr. Divis XI.*

CAPUT III.

De Signis malignitatis in genere.

§. I. *Malignitatis completissima ex tota Antiquitate collecta Descriptio ex Boerhaavio. §. II. Malignitatis diversis a causis incrementum. §. III. Recentioris ætatis formata Malignitatis idea & imperfecta est, & noxia.*

§. I.

§. I.

Hic pauca repetere me oportet, memoriamque eorum refricare Lectoribus, quæ sæpius, fufiusque, horum hoc meum Opus habet. Notarum Malignitatis in morbis *Boerhaavio* nemo ampliore, accuratiorique descriptionem, unquam dedit, paragrapho totius Pathologiæ maxima 919. quæ exactiffimam recensio- nem habet omnis five minoris, five majoris, five maximi, functionum vitalium, naturalium, & animalium recessus. Sic quidem ut Sanitas ibi veluti linea Recta ponatur, ad quam Curvarum quarumcumque natura expendatur; adeoque si in Pulsu, in Respiratione, in voce; si in degluti- tione, in appetitu, in digestionem, al- vo, urina; si in visu, odoratu, gu- stu, auditu, tactuque; si in perceptio- ne, imaginatione, memoria, iudicio,

ra-

ratio cinio, affectibus animi, motibusque voluntariis, paucus adfit ab horum siue omnium, siue præcipuorum, integritate recessus, morbus benignus vocetur; si major, ac periculo plenior est, malignitatem inter benignitatemque medius habeatur; si autem multus admodum, malignitate censeatur infamis.

Natura autem hujus ita dictæ malignitatis augetur ratione majoris in augmento eorundem signorum rapiditatis: ita ut, si mox ab invadentis principio ægritudinis, & numerosi sint, & graves, a sanitate recessus, hæc malignior habeatur. Notamque hujus malignitatis aliam depromimus ex eo, quem alia quacunque infirmitate antea confractum, morbus invaserit. Conjunctam sibi illam non raro habet ipsius morbi natura popularis; quemadmodum alia atque alia

alia tempestate Variolæ, Morbilli, Scarlatina, Putridæ vel inflammatoriæ Febres, aut parum, aut plus, aut plurimum discriminis habere deprehenduntur. Tandem morbi malignitatem arguit pertinax ejus ad ea artis præsidia, quæ cæterum conferre solent, resistantia; uti verbi causa ea est antiphlogisticæ Methodi inertia, ut ad eam, generosius adhibitam, inflammationes in Suppurationes, Scirrhus, vel Gangrænam, transmutentur; sitis ad flumina potuum hausta indelebilis; æstus ad interna externaque refrigeria inextinguibilis; motus & agitatio ad genus pacantium omne indomabilis &c.

Hæc demum genuina, hæc universalis expositio est τῆς κακότητος, quo nomine, rei ab *Hippocrate* indito, tota veneranda Antiquitas inorborum cum internorum, tum externorum, maligni-

nitatem insignivit, & ad quod omnis eorum referenda malignitas est. Itaque quiscumque morbos eos hoc nomine appellarit, qui hominem subdole adorti, viribus extemplo dejiciunt, & cutem maculis papulisque foedant, iuxta eos appellatione, malignos si dixerit, vocavit; injusta vero, si hos solos sic vocandos esse existimavit. Posteriore enim modo rerum ideas confundit, efficitque ut alii ea sola idea imbuti, ejus obliviscantur, quam suggesserat *Hippocrates*, confirmaverat *Galenus*, Prisci reliqui adoptaverant, nostraque ætas cum laudat, tum citra damnum, erroremque abrogari non posse, censet. Huic fundamento innixus incomparabilis *Sydenhamus* abstractam eam malignitatis ideam nostræ Artis pestem dixit; quod ad eandem, mente conceptam, vulgus Medicorum protinus ad eliciendos

dos sudores, sudoribus papulas maculasve generandas, animum appellat.

CAPUT IV.

De averruncanda aut mitiganda Malignitate morborum.

§. Unica. *Morborum malignitas ita absoluta non est, quin pro diversa qua tractetur, methodo, gravior multo, leviorque fiat. Causa sic capitur cur Medicorum diversorum facta ejusdem morbi relatio, tam diversa sit.*

§. I.

Malignitatis probe intellectæ cum præveniendæ, tum emendandæ, regulas practicas, haud minus ad ægrorum in Nosocomio lectos, quam sparsim in operibus editis, suggerere
Me-

Medicinæ Tironibus, semper annis sum; præsertim prolixiore capite primo Tomi XIII. Per omnia hæc constitutid fieri 1^{mo} Aëris usu, & puri, & moderate calentis, & crebro renovati. 2^{do} Indumentorum cum Corporis, tum Lecti, munditie. 3^{tio} Lecti refectiione quotidiana, eaque gemina potius, quam simplici. 4^{to} Potu ac Medicamentis, quæ contemperent æstuosum. 5^{to} Observatione accurata viarum, quas indicat Natura morborum: ut nempe expediantur illæ, utque per expeditas illas materiem morbi Natura pellere de corpore possit. 6^{to} Cauta evitatione eorum, quæ augere humorum motum modo quocumque possent.

Quemadmodum sex hisce legibus, bene observatis, Morborum Malignitas multum imminuitur, sic ab iisdem neglectis plurimum au-

getur. Ita quidem ut malignitas ejusdem temporis, ejusdemque urbis, in diverforum medicorum scriptis duos potius morbos, malignitate plurimum differentes, referre hac de causa videatur. Inter multa alia, testimonium hujus luculentum habui ex Litteris duorum Medicorum, qui malignam Febrim, Metropolim sui Regni affligentem, sic mihi exararunt, ut duos admodum a sese, cum natura, tum effectis, discrepantes morbos, in his Litteris descriptos videre mihi videar: vera utrumque dixisse puto; sed altero malignitatem sua methodo augente, suaque illam diminuente altero, dissonæ Relationis causam capio.

Hic Cramben antiquam, eamque recoctam, iterato apponere, æque tædiosum mihi, quam Lectoribus foret; eoque magis præterire hæc poterō

tero hic loci, quo in sequentibus occasio horum reminiscendi se præbitura crebriorem sit. Quare præmissis generalioribus, ad eorundem in vario genere malignitatis applicationem me accommodaturus, a Variolis ordiar.

CAPUT V.

Methodus præcavendi, moderandi, curandique, malignitatem in Variolis.

§. I. *Inoculationis progressus non impedit, quo minus optima Methodus conscribatur curandi Variolas naturales.* §. II. *Historia prima naturalium Variolarum misti generis, una cum ejus toto decursu atque cura.* §. III. *Hist. altera, meliorum, quamvis a contagio prioris ægræ, Variolarum, in longe pejore corpore. Curatio.* §. IV. *Historia tertia, & cura*

admodum malignarum variolarum. §. V. Historia quarta. §. VI. Historia quinta variolarum malignarum, cum magna eruptionis irregularitate. §. VII. Malignitas, benignitasve variolarum, Corporum nec salubritate, nec pravitate, determinatur. Componitur Inoculatorum de hac re dissidium. De incertitudine temporis, quo indiget ad generandas pustulas Contagium. Præcipua tum Naturales, tum Inoculatas Variolas, curandi felicitas ab Atmosphæra pendet. Calida balnea summæ, naturali in morbo, utilitatis sunt. Animadversio in eos, qui hæc Balnea de Variolarum cura proscribant, quod ipsis videantur materiem a cute repellere. Refutatio hujus opinionis ab experientia, & ab eorundem argumentorum fallacia. Apologia Autorum, qui interanea Variolis maculari scripserunt. De Experimentorum incertitudine. De scriptoribus, qui de Pustularum apertura scripserunt, deque ejusdem utilitate. Venæ sectionis per omne Variolarum tempus, postque easdem, utilitas. Lac in Variolis laudatur, nec
non

non omnis mentis corporisque Refectio, ac Hilaritas. §. VIII. Malignitatem, mortemque, plurimum a Variolis removeret, edita patrio sermone Norma easdem tractandi, auctoritate publica suffulta. Frustraneam hanc qui ideo censent, quod universalissima Inoculatio pene extinctura omne variolosum virus sit, rogantur Necrologia evolvere, ut ab Inoculatione variolas naturales valde augeri indies discant. Argumenta quæ id probent. §. IX. Propositio, haud paucis genita, suffultaque auctoritatibus, de variolis sive præveniendis, sive miti adeo modo sic generandis, ut homo vix inde periclitetur unquam. Argumenta propositioni faventia. Conclusio Capitis.

§. I.

Inanis ac supervacanea, quam suscipere animus fert, hæc pertractatio multis videri poterit, quod methodus hominibus variolas inoculatione consciscendi, rapido plane incessu in-

valescens, rationem post se relinquere non videatur, cur de earundem naturaliter contractarum malignitate operose agam.

At vero hos monuisse expedit, ob id ipsum necessarium esse quendam operosiorum de Variolis sermonem; ac *primo* quidem ideo, quod non nisi plurimorum annorum inoculatio determinatura quæstionem sit, utrum comparatæ insitione Variolæ iisdem communi contagio contractis, præferendæ sint, nec ne? *Secundo*, quod antequam id constiterit, vis plurima hominum naturali contagio afficiatur necesse sit. *Tertio*, quod in Variolis insitis non omnino perrara malignitas observata sit, quam methodo, in naturalibus Variolis celebri, emendare insitores debuerunt. *Quarto*, quod alteræ variolæ haud tam raræ sint, ut ultra de variolis naturalibus tractare

Me-

Medicina non deberet. *Quinto*, quod per insitionem communicato, multiplicatoque contagio, infinito numerosiores homines sibi naturali modo variolas contrahant.

Quo autem hæc Pertractatio accuratior, utiliorque sit, præmittendæ nonnullæ historiæ erunt, quas partim nobis Nosocomium hoc anno suppeditavit, partim ægrorum in urbe contemplatio.

§. II. Novem annorum puellam variolis affectam in Nosocomio habui, quam ante elapsum abhinc biennium a vomitu quotidiano, eoque cum violento, tum diuturno, non nisi multo labore percuraveram, & ante elapsos quinque abhinc menses a vomitu cruento. Sexta die Aprilis mane sana surrexit, paulo ante meridiem vero ex Schola redux, dolorem conquesta capitis atque lumborum est, exivit

tamen pransura apud cognatum; vix tamen comedens propter dolorem, sitimque, ad Matrem rediit. Aprilis 7. decubuit tota die, alvumque nocte deposuit: die autem 8. mensis, exactis 48. horis a principio invasionis, Mater, Nosocomii Clavigera, eam exhibuit mihi, commisitque, primordia pustularum in genis, fronteque gerentem. Post meridiem etiam in manibus illas vidi, & priore loco numerosiores. Febris interea nulla, multa sitis, urina hypostatica, vix læsa respiratio, lumbi autem, ac capitis dolor, idem. Sitim temperabat vel aqua, vel Avenæ cum melle Decocto. Admovebantur Epispastica larga pedibus, & Cochleari Syrupi Diacodii dato, nox sequebatur tranquilla. Aprilis 9. pustulæ faciem brachiaque contegebant abundanter, febre concomitata. Cum tussiret multum, copiose

piose bibit decoctum *pectorale* cum lacte, sumsitque multum Linctus ex Syr. *Viol.* ac *Rubi idæi* æqua utriusque parte confecti, ut nitidæ fauces manerent. Singulaque hora oculi lavabantur levi decocto feminis *sumach* cum lacte, non calefacto, sed ejus, qui in cubiculi atmosphæra erat, caloris. Post meridiem enema, unde ter dejecta alvus. Febris tota die moderata, bona respiratio, deglutitio autem minus expedita esse cepta. Paucus jam lumborum & capitis dolor. Calor vespere 3. aut 4. gradibus eo, qui sani hominis est, major, scilicet in *Thermometro Fabrenheitiano*. Tribus ante meridiem, quatuor post meridiem horis sedit, ambulavit, garrivit; crurum balneo aquæ moderate calentis insedit, deterfisque pedibus renovata Epispastica sunt. Vespere Cochleare Syr. *Diac.* datum, mediaque

nocte cum ægrus dormiret, alterum; unde melior somnus. Post eruptionem variolarum urinæ semper naturales colore fuere, enæorema aliæ suspensum, aliæ subsidens, habentes.

Aprilis 10^{ma}, & morbi die 5^{ta}, eruptionis die 3^{tia}, calor quidem mane 100. graduum erat, ut heri, febris tamen minor. Pustulæ numero augentur. Deglutitio minus commoda fit, pustulis latus uvulæ lævum obsidentibus. Non appetit; decoctum *pectorale* autem cum lacte affatim bibit. Hodie semel bihorio, semel trihorio, semel hora, extra lectum sedit, & garrula cum sit, animum garriendo explevit. In Balneo crurum mediam horam sedit, eodemque tempore manus ac brachia in vas calida plenum posuit. Febris modica vespere, & calor 99. gr.. Nox post unciam Syr. *Diacodii* bona.

Apri-

Aprilis 11^{ma} Calor mane ac vespere 100. gr. Febris modica. Cepit hodie unciam *Syrupi Diacodii* mane, ac fero sumere. Ab Enemate pauca alvus, pultiformis. Urina naturalis. Extra lectum tribus antemeridianis, & quatuor pomeridianis horis fuit, sedens, currens, garriendo ludendoque tempus fallens. Jamque & pustulas lingua gerit. Ad multam sitim multus potus. Nutrimento est id, quod copiose bibit, Lac, &, quod quinquies in Nutthemero datur, juris carnis pauxillum. Inflari hodie facies cepta, rubereque, nec non palpebræ. A *Diacodio* nox bona.

Aprilis 12^{ma}, Dies ab inchoante morbo 7^{ma}, ab eodem pustulato 5^{ta}. Pustulas jam cingunt circuli rubri. Meræ discretæ si forent, ficescere inciperent, jam vero nondum, quod cohærentes sint, adeoque quod
ali-

aliquid Discretarum, aliquid Confluentium habeant, citius his, tardius illis, maturescentes: qua de causa etiam non assurgunt in discretarum molem sive altitudine, sive amplitudine. Quamvis fauces & lingua humidæ perpetuo ab assumptis continuis ferventur, numerosæ tamen pustulæ totam linguam, palatum, imasque obfident fauces. Ab enemate copiosa alvus. Mane ac vespere 100. gr. calor. Matutinum vespertinumque & crurum brachiorumque balneum, & lecti excussio, & *Diacodii* exhibitio. Nox bona.

13. Apr. Modica febris. Respiratio bona. Vox rauca. Deglutitio laboriosa. Tumida valde, rubicundaque facies; tumidæ sic superiores inferioresque palpebræ, ut aperiri vix lumina queant. Manus & brachia sic intumescunt, ut difficulter percipiantur

tur pulsus. Copiosa a Clysmate dejectionio, gemina, pustiformis. Urinae naturales. Calor thermometri mane ac sero, Balnea, Strati mutatio, Epispastica, Diacodium, oculorum fomentum, potus, linctus, nutritio, ut heri. Pustulae albidiores, pureque turgentes.

14. Apr. Morbi die 9^{no}, eruptionis 7^{mo} tumor ingens faciei, palpebrarum, labiorum, multo cum rubore: turgidiores quoque & manus, & brachia. Confluuntque pustularum plures, earundemque una alterave flavum quid de suo centro sudat; sic ut adsit perfecta maturitas. Mane molestius habens lecto brevius abfuit, pomeridiano vero tempore allevata, quinque ex illo fuit horis. Alvus a Clystere pustiformis. Urina naturalis. Omnia data & admota, quae heri. Calor idem.

15. *April.* Quantum in tumidiore carpo explorandus pulsus erat, febrem modicam indicavit. Respiratio bona semper. Sitis minor. Appetitus major. Calor 99. gr. Auxilia cuncta, tam matutina, quam vespertina, & lecti abstinencia, pro more. Alvus ab enemate, & Urinæ, quales heri. Deglutitio gravis adhuc est, quamvis nunc paucas pustulas fauces, lingua-que, habeant. Vultus multum collabitur. Vespere autem deglutitio melior, vox clarior. Forfice hodie pustulas plerasque aperuimus, idque bis. Pure licet manarent, eodem tamen brevi replebantur. Nox bona.

16. *Apr.* Pertusæ pustulæ, de integro turgent. Nitent jam fauces, palatum, buccæ, labia, lingua. Concidit facies. Urinæ sunt naturales. Alvina post clyisma puls. Febricula. Appetitus. Pauca sitis. Eadem auxilia

xilia quæ priorum dierum. Pustulæ arefcentes continuo illiniuntur unguento, quod æqua portione Olei amygd. rec. & Ung. ros. compositum est, quodque quotidie renovatur, ne obsit rancore. Nox bona.

17. Apr. Morbi 12^{mus}, eruptionis decimus est. Calor 98. gr. Vix febris. Matutina vespertinaque continuantur artis præsidia. Nulla sitis. Appetitus optimus. Panis in Jure, & hordei, avenæ, oryzæ, conceduntur cremores. Bona nox.

18. Apr. Crustæ a facie decidunt, perque corpus universum pleræque papulæ arefcunt. Calor 98. gr. Continuuntur eadem. Bona Nox.

19. Apr. Una spontanea alvus pauca, clysmate altera provocata. Tota fere die ex lecto est. Eis in balneo. Cetera pro more. Nox bona,

20. *Apr.* Qui totius morbi 15^{tus} est, sumsit *Aq. Lax. Vienn.* uncias duas cum dimidia, unde dejecta ter puls alvina. Ab hoc die vespere duntaxat balneum, reliqua ut moris erat. Hilaris tota die non decubuit. Nocte dormivit egregie.

21. *Apr.* Urinæ duæ hypostaticæ, ut purgante sumto solent. Cum clam fricuisset nimis superciliorum plagam, unguento nostro continuo, metu fœdæ Cicatricis, eandem illinivimus.

22. *Apr.* Omnia bene. Mane ac vespere *Diac.* Balneum unicum.

23. *Apr.* Sumsit *Aq. Lax. unc. tres*, unde nauseans, plurimam ejus partem elapsa sesquihora vomuit, & bis alvum dejecit naturalem. Post *unciam Diacodii* nox bona.

24. *Apr.* Hypostatica urina unica, ceteræ naturales. Unctio. Syrupus *Diacod.* ad noctem.

25. *Apr.* Sanguinis unciae septem detractæ ex brachii vena. Sanguis bonus. Pulsus naturalis, ut & urina. Ter alvus pultiformis. Ad noctem *Diacodii Syrupus*. Bona nox.

26. *Apr.* Omnia pro votis. Squammæ, maxime autem centrales, nondum cadunt. *Diacodium*. Bona nox.

27. *Apr.* Sumsit unciam *Syrup. Ros. sol. c. Senn. scrupulum Rhei, & salis polychr. gr. XV.* Dejectio bina. Post *Diacodium* bona nox.

28. *Apr.* Die Morbi 23. nauseat, febricitatque: ab injecto autem clysmate prodeuns pultiformis alvus omnem nauseam sedavit, restituitque appetitum; febriculam vero *syrupus Diacodii* ad noctem sedavit. Somnus optimus.

29. *Apr.* Urina cum sedimento albo.

30. *Apr.* Idem purgans, unde de-
jectio bina.

1. *Maji.* Squammæ decidunt foveis
vix conspicuis.

Die 2. & 3. *Maji.* omnia bene.

4. *Maji.* Præferens fyrupo *Aquam*
laxativam, uncias quidem tres bibit,
sed vomitu partem reddidit, meridie
vix appetivit, conquestaque frigora
est: bis tandem pultis instar, bis fa-
norum similia, alvo reddens, rediit,
perseveravitque sanitas. Post quatuor
menses unius modo pustulæ vestigium
vultus habuit.

§. III. Puerum, Nosocomii curæ
commissum, innibique anno, & quod
excurrit spatio, *Spinæ* dictæ in arte *ven-*
tosæ, sex diversis in corpore plagis fu-
rentis, horridæque Diathesios scro-
phulosæ, triste exemplum, inopinato
Variolæ, puellæ procul dubio conta-
gio, jam triennem invaserunt 26. die

Apri-

Aprilis; die 21. scilicet, ex quo ador-
tæ puellam fuerant. Invaferunt au-
tem sic, ut citra vel minima sui indi-
cia, aut præfagia, in angulo exter-
no palpebræ dextræ pustula prima
appareret, sequenti autem die altera
in fronte, cum imminuto, quem alias
ingentem voracemque habet, appeti-
tu. Dieque hoc toto ejusmodi tenes-
mo laboravit, ut plus vigesies in ex-
cipulum ponendus esset, nec quid-
quam, nisi enemate injecto, egere-
ret. Observavi eodem tempore te-
nesmum extra Nosocomium, princi-
pio Variolarum, in puella annorum
duorum, inque alia sesqui alterius
anni, per integros ferme dies tres
continuum, atque crebrius in mor-
bo repetentem. Vespere plures in
Collo papulæ, in Naso una, unaque
hinc inde in brachiis, cruribus, fe-
moribus. Siticulofus multum idem

bibit, quale Puella, admotaque pedibus Epispastica sunt. Nocte sudavit, adeo autem bene, cessante Tenesmo, dormivit illa nocte, ut bis modo evigilaret.

28. *Apr.* Calor 94. gr. qui calor fanis, atque etiam ejus ætatis pueris, uno alterove gradu inferior est. Vingtini novas pustulas habet in Colli ambitu, ad Nucham, summumque dorsum; hesternæ autem grandescunt. Tenesmus exiguus. Bibit hodie Libras duas *Decocti peët.* cum Lacte Bina ab enemate alvus, liquida prior, posterior dura. Extra lectum quadrihorio fedit, in eumque remissus dormivit, ut & noctem totam, ter expergefactus tantum tenesmo. Cum appetitu pluries comedit pultem, quam *Panadellam* vocant.

29. *Apr.* Calor mane 93. gr. Vespere 94. Veteres papulæ grandescunt,
&

& accedunt novæ. Circulos rubicundos priores gerunt. Appetit. *Decocti pectoralis* Libras tres cum Lacte bibit. Multam diei partem ex Lecto transegit. Pauca alvus naturalis, enemate provocata copiosior. Urina naturalis. Nox bona.

30. *Apr.* Calor mane, ac vespere, 93. grad. Die morbi, unaque eruptionis, quinto incepto, pustulæ faciei maturum pus habent. Bihorio ante meridiem, post meridiem quadrihorio, lecto exemptus est. Bis deiecit pauca, semel sponte, semel clysmate. Appetivit. Bibit ut heri. Et cum vespere paulo inquietior esset, dabantur *duæ dragmæ syrupi Diacodii*. Bene dormivit.

I^{ma} Maji Calor mane 94. vespere 93. gr. Quatuor antemeridianis horis in spatioso cubiculo vel obambulavit, vel sedit. Ab enemate alvus.

Appetivit, bibit ut prius, & a *dragmis duabus syrupi Diacodii* bene dormivit.

2^{da} *Maji*. Assumta, applicata, excreta, quæ heri; Decem horis ex Lecto, sic ut ad meridiem tantummodo parumper in lecto dormiverit.

3^{tio} *Maji* ut heri omnia.

4^{to} *Maji*. Hoc nono die variolæ exsiccantur bene. Cæterum omnia, ut præcedentibus diebus.

Inito attente pustularum numero, Centum ac decem universo in corpore reperiuntur; iis exceptis quas in Calvaria crassum tegit capillitium, copiosas adeo, ut nullibi adeo numerosæ inveniantur.

5. *Maji*. Ab uncia una *syrupi Rosarum solutivi* bis reddita alvus est. Bibit eadem. Ex Lecto tota die est. A suis *syr. Diacodii Dragmis duabus* semper bona nox.

6. & 7. *Maji*. Calor & omnia eadem. Cito olet urina. 8. *Maji*. Syrupus purgans. 9. 10. 11. *Maji*. eadem fuit. Calor idem & appetitus. Alvus prodit sponte bis terve in die. 12. *Maji* Syrup. purgans.

Porro toto tempore, quo egres-
sæ Variolæ, quo suppuratæ, exsicca-
tæque fuerunt, *Spinæ Ventosæ* ulcera
minus tumida, minusque purpurea
fuerunt, sed sicciora. Cacochymia au-
tem ingens hæc benignas has Vario-
las minime in malignas, quod haud ci-
tra rationem verebatur, mutavit. Be-
nigniores imo has deprehendimus illis
puellæ, cujus contagione hæc natæ sunt.

§. IV. Præclari Viri filiulus quin-
quennis die 7. Aprilis ejusdem hujus
anni, metu Variolarum, jam vulga-
rium, purgabatur *Aq. Laxativa*: ipso-
que eo die, prope meridiem, lumbo-
rum ac crurum dolorem conqueri ce-

pit, noctem autem somno interrupto, multoque cum æstu, transegit. Cum parum operatum purgans esset, altero mane repetebatur. Quo die Febris, Cephalalgia, Coma, Lum- bago, & Crurum dolor, puerum ve- xarunt. Diurnus quinque horarum somnus hæc parumper mitigasse vi- debatur, sed appetitu prorsum caruit puer, & noctem insomnem, siti æstu- que turbatam, transegit. Jam tendi- nes subsilierunt; unde pedibus appo- nebantur Epispastica.*

9. *Aprilis.* Mane vomuit, febre ea- dem continuante cum suis solitis sym- ptomatis, paulo forte mitioribus. Cir-

ca

* Hunc puerum minimum semel in die inveni, quem- admodum etiam duos sequentes. Diarium autem exactissimum completissimumque omnium mihi comparare potui, singula notantibus in charta Patre, Avunculo, Amicis duobus; tribus sci- licet dudum, uno propediem, Medicinæ Docto- ribus.

ca meridiem autem, expletis duobus morbi diebus, rubra puncta in facie ac ventre prodierunt, numero cito augescentia. Vomitus repetiit cum levamine, imo cum subsequente somno, in quo tendines subsilierunt. Bis in calido crurum balneo infedit, pedibus Emplastrum Meliloti admotum est, clyisma injectum, & uncia data *syrupi Diacodii*. Nox intermixta vigiliis & somnis, ac vomitu frequentiore interturbata.

10. *Apr.* Et plures & majores pustulæ mane aderant, unaque magis elevatae. Febris minor. Vomitus bis. Parcior sitis. Bis solum ab enema-
te alvus. Ad noctem uncia cum dimidia *Syrupi Diacodii* dabatur. Insomnia, quia levis hæmorrhagia narium repetebat.

11. *Apr.* Numero ac mole augentur papulæ. Febris exigua. Bis post

cnema alvus. Somnus fesquialterius horæ. *Uncia syrupi Diacodii cum guttis quatuor Laud. liq. Syd.* dabatur ad noctem; postquam cum nulla quies sequeretur, idem paregoricum repetebatur nocte media, verum posthac aut turbati, aut nulli somni. Balnea crurum ac brachiorum quotidiana sunt. Ex lecto frequenter in sedem ponitur.

12. *Apr.* Major tranquillitas, & fesquihoræ a meridie somnus, tussicula interturbatus aliquantum. Eruptio nunc plena generis cohærentis. Circuli rubentes pustulas cingunt. Facies nonnihil tumet. Manuum pustulæ albidiores, fauces dolentes cum expedita deglutitione. Appetitus. Nocte post *uncias duas syrupi Diacodii* somnus tranquillus, cum raro subdelirio. Multa mane tranquillitas, somnusque multus. Tussicula. Vultus

rubicundior tumidiorque. Major palpebrarum cohærentia. Enema ut injectum, sic egressum est. Vespere crebra tussis. In alvo ponenda alguit, non nisi auctis stragulis calefaciendus. *Unciam syrupi diacodii* ad noctem fumens, somnum quidem multum, at tussi frequentiore interturbatum, habuit. Recusavit potum. Lotio oculorum per omne morbi tempus sedula.

13. *Apr.* Hodie, morbi octavo, a capite ad calcem, æque ad posteriora dorsi, artuumque, quam ad anteriora, plenissimus puer pustulis est, in plurima parte distinctis, centroque intropressio notatis, in rariore parte cohærentibus, in rarissima confluentibus. Neque ab illis, iisque confertissimis, immunis penis est, internumque præputium. Os internum iisdem scattet, citra tamen deglutiendi difficultatem.

14. *Apr.* Jamque & manus tument. Somnus crebrior. Duplex alvus post Clysterem. Ad noctem nihil paregorici datum.

15. *Apr.* Vultus tumidior, manusque. Depressiores mane pustulæ, eaque flavescentes, vespere elatiores. Copiosius bibit. Subinde dormivit. Post unciam syrupi Diacodii, nox bona, multusque in illa potus.

16. *Apr.* Cum tumidioribus manibus æque tumidæ fauces. Flavæ pustulæ pure suo flavo, coctoque, forcipe evacuantur. Enema & alvus duplex, primo enematis, postmodum fæcum.

17. *Apr.* A nova pustularum sive earundem, sive aliarum apertura, multus sæpe, aliquando parvus puris fluxus. Est undecimus morbi dies. Pedes intumescunt, licet non minus tumeant brachia, faucesque. Ad me-

ridiem anxius fuit, sed coagulati lactis vomitione ab anxietate liber, dormivit, alvoque liquida deiecit. Post *unciam syr. Diacod.* Bona nox.

18. *Apr.* Spontanea alvus. Detumescere facies cepta, in eaque jam nonnullæ papulæ siccae: pertusæ aliæ copioso pure manarunt: in manibus perpetuo albidiores ac depressiores sunt. Dies tranquilla. Manifestus conspiciebatur carotidum in collo pulsus. Bibit multum. Post consuetum *Diac.* nox bona.

19. *Apr.* Decidentibus variolis faciei, eæ manuum pedumque admodum tument, in pedibus præterea dolent. Turgentium pustularum aperturam puer recusat. Clyfma inutile. Post *Diacodium* irrequieta nox.

20. *Apr.* Morbi decimus & quartus. Morositas: quæ multum levata, & in hilaritatem mutata est, apertura
pu-

pustularum, quam non in parte modo sed universo in corpore, fieri concessit. Nox bona.

21. *Apr.* Balneo non infedit hodie, quod *uncias duas Aquæ laxativæ* assumerit, & quater dejecerit: frigus bis in deponenda alvo conquestus, densiore stragulo brevi recaluit. Post *syrupum Diacodii* nox bona.

22. *Apr.* Multæ pustulæ jam exsiccantur. Pedes ad malleolos adhuc tument. Pertusæ vespere pustulæ plures, multo pure manarunt. Cum appetitu coenatus, *Diacodium* pro more quidem sumsit, noctis vero plurimam partem præ universi corporis pruritu transegit infomnem, bibitque multum. Hora secunda post mediam noctem suo inungi unguento petiit, rogavitque *Diacodii syrupum*: post quæ horis quinque tranquille dormivit.

23. *Apr.* Morbi post decimum septimus. Alvus unica a levi dosi purgantis. Vespere post balneum *sesquiunciam syr. Diacod.* sumsit, pruriens vero cutis dolor, cum primis pedum, nocte ea tantus fuit, ut puer ipse ejusdem syrupi Cochleare sibi dari roga-
ret; quo assumpto, sex horis bene dormivit.

24. *Apr.* Ab aqua laxante terna de-
jectio. Crustæ undique decidunt. Bene habet. Sic & 25. & 26. Alvus bis. Pus sanguine mistum naribus ex-
cernitur. Idem pus 27. 28. *Apr.* A
repetito purgante terna alvus.

NB. De volis manuum, pedum-
que plantis, portiones integræ epider-
midis secedunt, quibus a parte exter-
na pustulæ siccatae extant, interna au-
tem superficies nihil pustulata, sed to-
ta lævigata, apparet. Portiones ali-
quas tales contervo.

29. *April.* Vix fatiandus puer est. Vena secta fuisset, si ulla alicubi invenienda, feriendaque fuisset.

30. *April.* Bene habenti conspiciuntur pustulæ tres recens natæ, pure mox plenæ; in fronte una, ad genam altera, in sinistræ manus vola tertia. An furunculorum more, quales excipere variolas haud infrequenter solent? Dies minus bona, nox optima.

1. *Maji.* Plures, majoresque, crassioris epidermidis portiones decidunt, inferiore superficie politæ, in exteriori pustulis ficcis extantibus scabræ: licet autem polita omnino interior hæc superficies sit, cutis tamen, quo loco decidere hæ, cicatrices impressas gerit. Ventre, eoque superiore potissimum, tumet, quod ipsi frequens. Alvo caruit. Pustula nova genæ aperta pure manavit.

2. *Maji*. Et hodie eadem pustula aperta, pus de integro fudit. Vespe-
re idem ventris tumor.

3. *Maji*. A biduo alvus deficiens,
enemate soluta est. Hodie Chirurgus
Scherer, Phlebotomus adeo dexterri-
mus, ut quibus post Venæ sectionem,
pluries frustra tentatam, hæc impossi-
bilis dudum habita fuerat, eandem ta-
men feliciter jam sæpius tutuderit; hic
tamen venam aptam nullam detegere
potuit, exiguamque feriens, vix san-
guinem habuit.

4. *Maji*. Bis a purgante remedio
alvus prodiit. Idem ventris ad vespe-
ram tumor. Nonnihil pedes livent.

5. *Maji*. Pedum livor idem. Chi-
rurgus idem ex vena pedis septem un-
cias sanguinis eduxit. Ab hoc tem-
pore melius habuit; pes colorem na-
turalem adeptus est, Venter autem
aliquantum quidem concidens, non-

nisi exercitio corporis tandem penitus concidit.

§. V. Frater ejus quatuor annos natus, sanus eousque, nisi quod a fistula ani, quam annum natus toleravit, male curata, distortus pede nonnihil sit, die 27. Aprilis, die scilicet 21. Morbi natumajoris, languere cepit, bene adhuc appetens, & aliquoties futurarum Variolarum metu purgatus.

28. *Apr.* Febris valida, horrida, sitis multa, Cephalalgia ingens, Nausea, puerum invaserunt. Copiosam habuit a Clysmate alvum, urinamque naturalem. Bis crurum balneo insedit, balneo egressus in lecto voluit esse. Nox bona fuit.

29. *Apr.* Mane melius habens surrexit, post nonam frigore correptus lectum repetivit, balneoque postmodum insedit. Ad meridiem aëris libe-

terioris causa cum sorore vectus curru est, redux balneo crurum insedit, ab enemate dejecit, & sumto *syrupo diacodii* irrequiete dormivit.

30. *Apr.* Hoc mane exiguae admodum pustulae in fronte adparent, in reliqua facie, in corpore toto. Pustula praeterea alba ad inferiorem linguae apicem. Vix febris. Stillicidium sanguinis e naribus. A meridie febris major, sitis intensior, Cephalalgia. Balneum. Clyisma. Potus multus. Post *unciam syrupi Diacodii* nox turbata.

1. *Maji.* Mane tranquillus est, ac universo in corpore pustulosus. Pustulae grandescunt, passim discretæ quidem, in fronte autem & cohærentes, & numerosæ. Bis balneum, & *Diacodii syrupus*.

2. *Maji.* Disparuit, quam linguae apex gesserat, pustula. Balneum. Al-

vus terna. Sine *Diacodio* obdormiscens, bonam noctem habuit.

3. *Maji*. Duæ in fronte planæ amplæque papulæ, multæque exiles, coherentes, paulatim omni dimensione augentur. Extrema corporis multæ exiles, cæque limpidæ, obsident. Appetit. Sitit. Post *syrupi Diac. unciam* bene dormivit, ut bis modo potandus evigilaverit.

4. *Maji*. Vultus tumet, multumque palpebræ utræque. Lavantur oculi continuo lacte & aqua: præ pruritu autem eosdem fricat nimis, & inferius labium crustosumvellicat. Nox bona.

5. *Maji*, die sexto eruptionis, ter a Clysmate alvus, Variolæ turgent pure flavo: habent & externæ palpebræ tam superiores, quam inferiores, pustulas, flavoque madent Cilia pure: de pede distorto multum conque-

queritur, deque vicina Podici per ambitum regione, pustulis plenissima. Cum aucto vultus tumore etiam manus tument. Nox minus bona, in eaque alvina dejectio bina, & irritus menjendi conatus.

6. *Maji*. Toto in corpore jam flavæ pustulæ, & maturæ; cutis autem interjectis in plagis pulcre & tumet, & rubet; an hoc a Materie purulenta, subjecto in adipe turgente? Tumor vultus manuumque augetur. Oculi utriusque canthus externus exiguas admodum variolas habet. Palpebræ tument vehementer. Sine *Diacodio* bene dormivit.

7. *Maji*. Chyrurgus pustulas ubique aperuit, quod undique manans, abunde collegit ad inoculandum. Neglecto *Diacodio*, minus bona nox fuit. Rubent oculi. Alvo deficiente *Aqua laxativa* data hodie est, unde-

cimo morbi die, cujus opera periit oculorum rubedo. Siccae sunt crustae ubique. Facies non valdopere tumescit amplius, minusque adhuc manus, pedes nihil omnino. Nox optima.

8. *Maij.* Tumor idem, qui heri. Conspecta hoc die macula rubra est in gena dextra. Puer bene valere videtur hodie, quemadmodum & 9. 10. 11. 12. 13. & 14. die Maji, rubentibus iterum iterumque oculis, post repetitum purgans autem denuo albis.

§. VI. Puella eorundem soror annum cum dimidio agens, sana semper, pluriesque metu hujus morbi purgata, die 24, Aprilis, qui erat dies 18. morbi fratris natumajoris, & tertius, antequam minor natus ægrotaret, duplicem inquietudinem parentibus dedit, quod & duo dentes canini eruptionem minarentur, & macula rubra genam dextram deturparet. Unaque de-

dejiciebatur appetitus, oculi lacrymofi ac turbulenti apparebant, dexter plus sinistro, & morosa admodum puella erat.

27. *April.* In rubra genæ macula nunc papula surgit, rubro circulo cincta, foveolamque intropressam in centro, ut variola, habens. Alvo clysmate soluta, moderatior! morositas fuit.

28. *Apr.* Augescit pustula, jamque prope hanc duo rubra puncta cernuntur, ceterum nullibi. Appetitus adest, sed inquieta nox.

29. *Apr.* Somnolenta est. Pustula crescit variolæ more. Duo puncta rubra ut heri. Nullibi ceterum in toto corpore apparet quid. Curru vecta per horam est. Usa est balneo crurum calido. Alvo laxior, tantillum *syrupi Diacodii* sumsit, noctem inquit-

tam transegit, & non dormiens perpetuo ploravit, convulsaque est.

30. *Apr.* Pustula quartum diem agens, circulo rubro latiore grandescibat, & matura in medio flavescebat. Jam & in facie, & in reliquo corpore plures variolæ conspiciuntur. Molesta est, ejulatque continuo. Ene-mata non operantur. Nonnihil *syrupi Diacodii* tunc ipsi, quietius in brachio ancillæ quam in lecto se gerenti, somnum conciliabat. Cum autem ex hesternâ vespere non minxisset, & post somnum perpetuo ejularet, metu ne retenta urina ipsi dolorem, anxietatemque crearet, cataplasmate emolliente, ac discutiente, fotum abdomen fuit, unde brevi quidem minxit, sed ab ejulatu non quievit. *Uncia syr. Diacod.* vespere data, primo quatuor horarum, deinde ad auroram horæ spatio, dormivit.

1. *Maji*. Balneum, potumque renuit. Variola prior exsiccationem inchoat. Numerosiores toto corpore prodeunt. Mane dormivit multum, rectiusque valens, petivit cibum. Noctem fiendo transivit. Sponte soluta bis alvus est. Variolæ ut plurimum discretæ sunt, in mento autem, inque gena læva, nonnullæ cohærent. Parum bibit. Pluries hodie tranquille dormiens, *Diacodium* non sumsit, & ipsa quoque nocte dormivit.

2. *Maji*. Balneum renuit præfracte, admisit tamen totos superiores inferioresque artus aqua & lacte calentibus foveri. Dormit sponte continuo, & tranquillior est. Ab enemate alvus. Et nocte spontanee dormivit.

3. *Maji*. Pustulæ numerosæ, ast pallidæ, & exiguæ. Prior variola in medio crassam habet amplamque cru-

stam. Spontanea alvus. Bona nox dato iterum syrupo, multusque inter somnos potus.

4. *Maji*. Toto antemeridiano tempore dormivit, & inter somnos bibit. Facies tumet. Multum toto in corpore numerus papularum augetur. Bis alvus spontanea. Nox bona.

5. *Maji*. Flavescere inchoant pustulæ, elevanturque, vix autem augentur amplitudine. Facies & manus tument egregie, multas licet papulas habeat, mole aliquanto minores, quam natuminor, & infinito fere minores, quam natumajor. Alvus spontanea. Nox bona.

6. *Maji*. Scalptu frictuque manuum disparuere multæ in facie pustulæ sic, ut nonnisi rubram plagam reliquerint, idemque in dorso. Inter bonas colore variolas subsistunt plures albidæ. Vultus minus tumet. Nox irrequiescior.

7. *Maij*.

7. *Maji*. Facies exsiccat̃ur tota, inchoant & manus exsiccare.

8. *Maji*. Exsiccatio universalis. Vultus, artuumque superiorum abeunte tumore, nullus tumor inferiores invasit. Nox bona absque *Diacodio*, quod quia plurimum dormiebat, non dabatur. Ab aqua laxativa probe purgata est.

9. *Maji*. Omnia bene, nisi quod nonnihil rubeat oculus dexter. 10. quoque. 11. repetito purgante salus perfecta & constans.

§. VII. Diario absoluto, corollaria adnectam, junioribus Medicis, ut quidem censeo, ad curam variolarum haud incongrua.

Ac 1^{mo} quidem mala corporis prædispositio incerta admodum lege vel auget, vel non auget, periculum morbi. Puella §. II. vomitui chronico, eique haud ita pridem cruento,
ob-

obnoxia, variolas copiofas quidem, mimime tamen malignas habuit. Puer §. III. Cachecticus atque Cacochymicus totus, ulcera Spinæ ventosæ sex diversis in corpore sedibus gerens, Scrophulorumque plenus, variolas adeo benignas habuit, ut nemo benigniores, imo benigniores adhuc iis puellæ, a cuius contagione sola, (domo enim exit nunquam,) contraxerat sibi morbum cujusmodi exempla innumera quotidiana praxis præbet. Puer §. IV. sanus quidem, at vero a teneris ad infantiles morbos quoslibet, ab acido, a dentitione, a morbillis, a spuriiis, quas appellant variolis, oriundos, & diutissime, & periculossissime semper ægrotans, variolis malignis suis præsagium confirmavit: confirmaturus denuo in febre Scarlatina, cujus suo historiam loco dabo. Puella §. VI. & variolis haud fane per omnia benignis,

gnis, & duorum Caninorum dentium eruptione, una laborans, cursum utriusque mali breviter, feliciterque absolvit.

Porro hæc usus quotidianus ita confirmat, ut Veteranorum Medicorum nemo sit, quem ejusmodi prognosis haud frequenter fefellerit. Unde Inoculatorum dissidium componitur, hinc ab inoculatione in male dispositis facta, omnia infausta præsa-gientium, & observata testantium; illinc & male beneque prædispositis inoculationem indiscriminatim profuisse clamantium. Si in prima puella, primoque in puero, inoculatio facta fuisset, æque benignas; si in puero secundo, æque malignas, ac forte peiores, genuisset. Unde laudandi ii, qui ab inoculatione cavent in perspicua diatheseos pravitate, ne temeritatis poenam luant inoculati: vitupe-

tuperio econtrario illi digni, qui variolas omnibus inferunt indiscriminatum, eoque digniores vituperio, quando inoculationis promiscue factæ, nonnisi fortunatos laudant casus, infortunatos autem, letalesque, alto silentio mergunt; quod nihilominus contigisse invictis demonstrare argumentis possum.

Nec minus iniquum eorum iudicium est, qui naturales Variolas, illasque potissimum, quæ Cacochecticos, atque Cacochymicos prehenderint, vix unquam, nisi aut malignas, aut letales, voce scriptisque clamitent: namque quinque puerorum meorum unus aliquam, tres gravem prædispositionem habuerunt, & nihilominus, tam integram, tam citam, tamque constantem sanitatem adepti sunt, ut etiam a felicissima insitione, qui parem adeptus est, fortunatus habeatur.

Secundo. Affantis incertum est contagii tempus. In pueris §. III. & §. V. die 21. adparuit, in eo §. V. die 18. Exempla habeo multa tam priorum, quam feriorum dierum: sic ut ab ipsa contagiosa febre, usque ad perfectum ejus finem, nunquam tutum sit Variolosorum commercium, forte neque etiam in stadio aut contagioso, aut inflammato.

Tertio. Incertum & tempus eruptionis est. Sine ullo percepto in puero §. III. tempore contagii, morbus cum ipsa eruptione incepit, quale quid quoque in puella §. VI. observatum fuit. Symptomatibus grave fuit contagii tempus, usque ad finem alterius diei in pueris §. II. & IV. quando eruptio inchoabat; in eo, qui §. V. est, tandem exacto triduo est eruptio facta. In Pugillaribus meis, ad lectos ægrorum confectis, invenio annis

nis abhinc ultra viginti notatam puel-
lam, inter Variolosos noctu diuque
conversatam, quæ febre ac sympto-
matibus contagii quatuordecim die-
bus laborarit, antequam erumperent
pustulæ foras. Notavique ex iisdem
Thes. de Febr. Divis. pag. 106. Epidemiæ
tempore id solenne esse „ ut febris
„ five Variolosa, five Morbillofa, bis,
„ ter, pueros invadat, ac deferat;
„ & vel nec redeat, vel tandem cum
„ alterutra harum efflorescentiarum
„ repetat.“

Quarto. Utilitas aëris liberi, ejus-
demque necessitas, in quovis acuto-
rum morborum demonstrata toties,
abunde hic confirmantur. Profuit in
puella pueroque prioribus sic, ut il-
los pueros inoculatos Te contemplari
videreris, quos in Nosocomio *Londi-*
nensi se vidisse, miratumque fuisse te-
stabatur, ludentes, garrientes, cur-

ren-

rentesque, Vir egregius *Hosti*. Neque malignitatis plenas Variolas in iis, qui §.4. 5. & 6. describuntur, aut emendatas fuisse, aut saltem non tam cito curatas, certum est, si calido, nec renovato in aëre, decubuissent. Nisi me animus fallit, hanc veritatem ex *Physices & Jatreias principiis*, Tomo XIII. Cap. I. adeo evidenter demonstrasse me arbitror, ut eo lectorem mittere jure queam. Porro si qua *Athmosphæra* perniciofa esse ægrotantibus possit, ea *Variolarum* est, infecta scilicet vaporibus, qui contagio scatentes, atque ab ægrotis assiduo inspirati, degluti-tique, vehementer augere morbum possunt. Quantum etiam corrigendæ lustrandæque *Athmosphæra* Strati mutatio faciat, nemini dubium esse potest, & ventilationem ipsius Lecti, Lin-teaminum, Stragulorumque consideranti, & Ægri expositionem seu in

E

ejus-

ejusdem Conclavis parte, a lecto qui ventilatur remotiore, seu in vicino, quod præstat, Cubiculo; ut transpositis aliorum ægris, lustrari cubiculum, januis, fenestrisque patentibus, possit: Lecti tandem ejusmodi situm, ut vel janua, vel fenestra, prout tempestas concesserit, aperta, aër purus sic fuget infectum, ut neque lectum, neque in eodem ægrum, recta feriat. Observatis edoctus asserui toties, assertumque repeto, præcipuam frequentioris interitus a Variolis, a Morbillis, a Scarlatina, a Febris cum Exanthematis, atque ab ipsa Peste, causam ex neglecto hoc Veterum consilio explicandam, corrigendamque esse.

Quinto. Ad felicem Variolarum curam sua balnea calida potenter facere intellexerat providus Sydenhamus, cum videret ægrum, eo tempore a lecto remotiorem, omnibus hisce emolu-

lumentis frui, quorum hic memini. Sed habent calida hæc artuum superiorum, inferiorumque, Balnea id præterea emolumenti, ut absorpta vasis inhalantibus aqua, universum cruorem diluat; utque cutim laxando aptent, quo & facilius, & abundantius, eo feratur Veneni vis: unde efficitur id, ut parcior papularum manus vultum obsideat, maturiorque veneni fiat a Visceribus vitalibus ad exteriora expulsio.

Atque hic morari convenit paulisper. Prorsum ignorare me fateor, quo tandem principio quædam Scripta nitantur, posterioribus hisce vario in loco excusa temporibus, quorum is præcipuus esse scopus videtur, ut de cura Variolarum balnea proscribant. Quanam observatione didicere eorum eruditi Autores, humiditate pustularum in cute præpediri expulsionem, siccitate promoveri? Quid theoricæ

declamationes cum practicis observatis, cum puræ nudæque demonstratione Veritatis? An *Nicolus Florentinus*, an *Astatius Papiensis*, an *Petrus Forestus*, Brachiorum Crurumque balneo ad hos artus non provocarunt, ac promoverunt Variolosam Morbillosamque eruptionem? Ergone *Sydenhamus*, *Boerhaavius*, numerosique post illos Scriptores, non viderunt efflorescentes suis in ægris variolas, easque cum salutaribus, tum abundantes? Laudassentne in senectutem usque ejus rei usum, qua centies eruptionem aut retardatam, aut impeditam esse, experiri debuissent? Contigit illis, fateor, quod & mihi, ut peculiari cutis in cruribus dispositione rara papularum eruptio fieret; ceterum vero exemplo illorum balnea ea de causa perpetuo laudavi & adhibui, quod numerosiores Variolæ hæc, quam ceteras corporis

par-

partes contegerent , locarentque in hisce bonam ejus materiei partem, quæ alias pectus , collum , vultumque, fœdasset. Testem hujus rei in privatis ædibus familiam habeo, universum in Nosocomio Auditorium. Apage igitur a Medicina Theorias , quæ nitantur obscurare in meridie solem.

Similis præterea farinæ est hujus commenti , quam vocant , confirmatio , & petita ex Variolarum in tecto semper capillitio absentia , eo quod , ut ajunt , vapor capitis , percussus a Capitali , pustularum in Cæsarie nativitatem suffocet , quia humectat. Effanturne serio talia? Practicos enim si consulant , innumerabiles ab his observatas esse variolas in tecta probe Cæsarie percipient. Videruntque Auditores mei mecum frequenter hic modicam , illic parem , ibi copiosiore , quam reliquo in corpore , pustularum

quantitatem; licet Capitalia non modo non imposita perpetuo, sed, ne deciderent, affixa capiti fuissent.

Profecto Theoriarum haud paucæ dantur, quas utpote in salubri auxiliorum usu nihil permutantes, intactas præterire & licet, & sæpe oportet; hujusmodi vero, plane inoratas hucusque, prætergredi non expedit, quod & Medicos juniores, & qui deficientis Medici officium explere sæpe debent, Chirurgos, circumvertere, ipsosque ægros in vitæ discrimen, jacturamque, conjicere possent, qui horum Librorum lectione corrupti, & ipsi balnea ab ægris ablegarent, & Viris, qui eadem experti, proposuissent, præfractæ obniterentur.

Erronea hac Theoria deventum eo fuit, ut Viri, quos Medicina ab omni tempore suspexit, æternumque suspectura est, aut malitiæ, aut inscitiae,

in-

incusari videantur, quod interanea plus minus Variolis obsita fuisse memorantur. Ajunt quidem id in suis, quæ incidere, cadaveribus se non invenisse: sed an ideo omnes eos qui invenerint, se confodisse arbitrantur? Disquire hic loci nolim utrum papulæ, quas inhærentes visceribus nonnunquam deprehendisse se scribant, Hydatidum appellatione juste donarint; sed respondeo primo, neque alios Scriptores semper, & ubique, interaneorum Variolas in cadaveribus invenisse: unde si ejusmodi Cadavera hi, quæ illi, nacti fuissent, etiam ne vestigia quidem Variolarum se invenisse, posteritati tradidissent. Secundo Observatio accurata me toties docuit, Prætorumque nostrorum historia §. II. confirmavit, in locis cute destitutis, in Lingua, Buccis, Faucibus, utroque Palato, Labiis internis, variolas

ceteris citius evanescere; ita ut post 9. 10. 11. diem os universum ab illis mundatum esset. Unde id, ni fallor, conficere licet, quod Cadavera, post 9. 10. 11. diem Variolarum incisa, nulla earundem vestigia in visceribus gerant; eoquod hæc viscera cute destituta, variolas in rorifero suo domicilio alere eo usque nequiverint. Non diffiteor equidem haud pauca tradi, quorum fides penes Autores sit, quæque suam gerant in fronte fallaciam; at vero veridicorum quorumcumque Autorum, qui suo tempore Artis gloria fuerant, Patriæque ornamenta, sublestæ fidei habere, quod experimenta alia a nostris habuerint, intoleranda licentia videtur. Profecto non cogitant illi quam frequenter nos experimenta fallant, & quoties contingere possit, ut neque in triginta ac pluribus cadaveribus id deprehenderimus,

mus, quod in sequentibus nihilominus haud insolitum esse fateri cogimur: exempla hujus pars altera dabit.

Sexto. Quantæ utilitatis sit apertura repetita pustularum, earundemque unctio, auctioribus indies experimentis discimus, tam ad præcavendum aut inopinatum interitum, aut Metastases infortunatas copiosioris sub cute puris, quam ad tuendam venustatem. Omnium nostrorum puerorum exemplis hoc confirmatum est. Antiqua profecto Methodus est, quam sæculis duobus ferme elapsis ex Vin-dobonensi Cathedra suos Discipulos docebat *Joannes Marquardus Viennensis*, posteaque Cæsareus Archiater *Raymundus Joannes Fortis*, quam dudum quoque Galli, Italique laudabant; quam apud quasdam *Bataavorum* familias traditione sacram deprehendi; & quam

tamen passim obsoletam tota pene *Europa* vidit.

Octavo. Sectionem Venæ, eamque non raro iteratam, in quavis variorum, morbillorum, scarlatinarumque, periodo, sæpe adeo necessariam, ut tota ab ea salus dependeat; etiam utilissimam perpetuo variolis siccatissimis, decidentibusque, deprehendi constat. Inde enim fieri me convincit observatio, ut materiæ purulentæ, in panniculo adiposo relictæ, evacuatione facta, non consequantur partium quarundam mutilationes, viscerumque corruptiones.

Nono. Lac cum aqua saluberrimum potum variolosorum morbillosorumque esse, experientia multiplex confirmat. Experti potus hujus usum nonnulli insitionis patroni lactantium infantum inoculationem urgent, eo quod lacte, potu omnium in variolis
sa-

saluberrimo, unice nutriantur; hanc suam sententiam etiam *Arabum*, in variolis naturalibus cura roborare conati. Quia autem tussis hos ægros quætere, inflammationemque Pectori haud infrequenter minari solet, laudatum supra Pectorale Viennensium decoctum, cum lacte mistum, potum laudabilissimum præbet.

Decimo. Constat denique quanto-pere ad malignitatem variolarum aut præcavendam, aut corrigendam, conferat frequens mutatio lecti, longior per diem ex lecto mora, mentisque hilaritas lusu, gratis objectis, Musica, confabulatione, obambulatione conciliata: quas res omnes nostris ægris sedulo conciliantes, utilissimasque experti, inoculatorum experientia confirmari lætamur.

Atque hæc demum illa Methodus est, qua ut hic, ita alibi ægrorum

rum meorum plerosque, DEO, a quo omnia, & quo sine nihil, obsecundante, & in vita servavi, & a mutilatione, aliisque morbis, qui in stationem succedere variolis frequenter solent, præservavi; ut catalogus in *quæstionibus meis super inoculatione* datus pro parte ostendit. Inficias equidem non eo ejusmodi Epidemias nonnunquam grassari, ut solito plures occidat malitia morbi, verum tunc quoque potissimum auxilium enarrata methodus præstitit; quem enim dixi Catalogum, prave popularitatis infamia dedit. Quod si tandem unum alterumve hominem fors iniqua rapuit, commune hoc cum insitis variolis naturales habent, a quibus unus, & alter, & tertius, mori, in fidelissimis inoculatorum Diariis perhibetur. *

§. VIII.

* Paucis modo hanc celebrem quæstionem tango, fusius de eadem locutus in Tractatu cui titulus:

§. VIII. Habere tamen id prærogativi inoculatio multis videtur, ut in sanis, ætateque aptis, institui; eruditaque haud secus, quam prudenti manu administrari soleat: interea dum e contrario morbus naturalis æque languentes adoriatur, quam valentes; æque & gravidas mulieres, & parturientes, & puerperas, quam virgines; æque decrepitos senes, quam infantes: dumque præterea variolæ naturales sive imperiti vulgi inscitia, sive prava Medicorum, Medicastrorumque methodo, quotannis bonam mortalium partem tanquam falce demittant.

Mul-

Quæstiones sæpius motæ super methodo inoculandi variolas. 1757. In tractatu gallico ad claros Viros Condamine & Tyssot, 1759. cui titulus: Refutation de l'Inoculation: in Responso ad celeberrimum virum Tralles 1764. nec non in Tomo II. Rat. Med. sub finem Cap. III. Tom. IX. toto Cap. VIII. Tomo. X. a pag. 311. ad 320. Tomo XII. Cap. VIII.

Multa ejusmodi vera esse sponte quidem concedo, verum haud ita, ut eorundem mutationem emendationemque desperemus. Si Reges, si Reipublicæ, civitatesque omnes, optimam curandi methodum sermone patrio singuli evulgari, ejusque observationem lege, Concionatorum monitu, multaque exemplariorum copia, promoveri curarent; ingens hominum pars, ceterum peritura, in vita servaretur; cum compertum sit innumera- biles cum gravidas, puerperasque, tum senes & valetudinarios, mortis e faucibus hac methodo eripi. Hoc saltem eo usque optandum foret, quamdiu nec politica, nec religiosa ratione, probata cunctis inoculatio fuerit; vel, etiamsi sacris profanisque probaretur; quamdiu nondum demonstrata sit contagio suo populatio- res non reddere variolas naturales.

In

Inane tamen hoc arbitrari consilium is forte possit, quem ea spes alit fore, ut propediem fiat popularis inoculatio; ejusdemque crebritate aut ipse morbus demum demto omni veneno fatiscat, aut non nisi infantibus recens natis infitionem facere ultra oporteat.

Haud fane hæc me, quæ illum, spes foveat. Diaria *Anglorum*, observata aliarum Nationum, apud quas hic mos increbuit, suppeditant nobis frequentiores a Variolis mortes, quam antequam ipsis inoculatio innotuisset: unde id conficiamus oportet, ut autum inoculationis occasione contagium vel longe numerosiores homines afficiat, vel pluries feriat eosdem. Quantacumque enim cautela perficiatur hæc operatio, etsi etiam ruri duntaxat fiat, infectam Athmosphæram ventus ad vicinos pagos urbesque detert,

fert, & hominum adeuntium abeuntiumque commercium, deferunt forte omnium maxime lotrices, quæ putrida linteamina, pure inquinata, lavant, & siccant, & aut ipsæ, ut plura exempla memorantur, morbum consciscant sibi, aut veste, crinibusque, hospitante contagio eis, quos conveniunt, eundem concilient. Nec nos sinunt Necrologia dubitare. Ante illatam in *Britanniæ* insulas inoculationem, *Necrologium Londinense* notabat ex cunctis, quos mors integro decennio rapuerat, vigesimam partem variolis occidisse: decennio ante inoculationem proximo, *partem undecimam*: priores hujus praxeos in ea urbe rarioris annos non moror; sed ex quo post annum 1750. frequentius inoculatum fuit, notatur in hoc decennio *decima cum dimidia pars*; sequenti quadriennio *nona*; anno vero 1756. *pars septima.*

Ne-

Necrologium annuum *Londinense* docet, a principio hujus sæculi multam quidem differentiam non inveniri in numero illorum Mortuorum, quos morbi omnes, Casusque, fustulerint, at vero in eorum numero, qui variolis perierint, differentiam haberi notabilem tempore eo, quo frequenter inoculatum fuerit. Ab anno 1731. ad annum 1752. fere quintuplo plures variolis interierunt, quam in simili annorum numero ab anno 1701. ad 1722. Ex calculo vero dato ante quadriennium a Viro egregio *Waston*, Soc. *Angl. & Colleg. Reg. Med.* Socio, constat ab anno 1758. usque ad annum 1767. mediam circiter occidisse variolosorum partem plus, quam primo hujus sæculi decennio, licet utrumque hoc decennium numero hominum, a morborum universitate denatorum, vix inter sese differret.

F. VI.

Videtur profecto hæc observatio inoculationi minime patrocinari. Video quidem in recentioribus scriptis Viros claros esse, ipsis *Anglis* ad hoc ingenue fatendum difficiliore, eamque nobis disparitatem objicientes, quam nobis duo priora hujus sæculi ineuntis decennia, dum de inoculatione necdum somniaretur, præbent. Sed perpendant hi, quæso, nobiscum, quam frequenter dispar sit, his, atque illis temporibus, Contagii virus. Annon sic ab anno ad annum differre practici comperiimus? cur anno 1681 *Londini* mortuorum universorum septimus quisque a variolis interemptus deprehendebatur, & triennio post centesimus quadragesimus nonus duntaxat? utique notum singulis Practicis est, in gentem humanam variolas benignitatis tantæ sæpe immitti, ut qui iis afficiuntur, ne vel trucidari qui-

quidem a Medicastris queant; nonnunquam vero tantæ malitiæ, ut etiam experientissimi Viri sibi nonnullos eripi doleant, & minus, nihilve experiti rerum, decimi, septimi, imo & quinti, quartique suorum lugeant fatalem sortem: at vero jam ejusmodi malignitatem & perpetuantem sese, & incredibiliter incrementem affligere *Londinenses*, idque eo potissimum tempore, quo duo trientes, aut media modo civium pars, afflari, inficique contagio possit, eo quod tertia, aut media incolarum pars per inoculationem a morbi invasione tutata esse credatur, hoc, inquam, silentio transire non permittit boni publici amor, urgetque potius omnes, quorum interest, rem seria mente perpendere. Gravissimum *Galliæ* universæ senatum primo, Amplissimum Magistratum *Hagc-Batavum* deinde, & Amplissimum Magi-

F 2 stratum

stratum *Lugduno-Batavum* hoc ipso, quo scribo, anno, permovit, ut hanc operationem ad tempus aliquod de finibus proscriberent suis.

Si res ita se habet, etsi daremus inoculationem singulis prodesse, quibus fit, eam detrimentosiorē morbo naturali esse, quod tertiam partem plus illo mortalium populetur, ingenue fateamur oportet.

§. IX. Porro hujus considerationis momentum ad alia auxilia contra hanc pestem quærenda Medicorum principes, horumque Discipulos, claros sane in arte viros, permovit. *Bohnus*, *Etmullerus*, *Spiessius* & *Grassius*; tandem plusquam sexaginta abhinc annis, *Hermannus Boerhaave*, crediderunt in *Mercurio* ac *Stibio* ad summum penetrabilitatis gradum chemica arte perductis, contagium sic cicurari posse, ut ab homine susceptum, aut nullas

in eo, aut perpaucas, benignasque, variolas generaret. In spurio opere pratico *Boerhaavii*, quod ex notis Auditorum, in Lectione factis, prodiit *Patavii* anno 1728. & *Londini* 1731. legimus jam anno 1712. eum hæc docuisse, imo in ipso textu primæ suorum *Aphorismorum* editionis anni 1709. hæc habentur. Discipulorum autem testimonio hunc textum §. 1392. anno 1712. sic explicuit, postquam utriusque hujus semimetalli meminisset: „Venum cum tot Adversarios hæc improbantes habuerim, in hujus usum non continuavi: ego hanc rem felicioribus indagatoribus relinquo.“ Auditores subsequen- tium annorum testantur simile quidpiam ad hanc paragraphum se ab eo audivisse. Quatuor studiorum cursibus magni Præceptoris auditor, eum similia proferentem audi- vi; & qui singulis annis to-

tum ejus sermonem in Lectione char-
tis mandabam, quæ novem crassis in
Quarto tomis meam Bibliothecam exor-
nant, notavi anno ultimo, qui erat
1735. hæc incomparabilis Viri verba :
„ Olim talia quidem dabam, & suc-
„ cessus inde videbam: at vero cum
„ inter multos fanatos infans more-
„ retur, clamabant peremptum a me
„ infantem esse; unde pertæsus de-
„ stiti. Antimonium diaphoreticum
„ cum suo Nitro fixante, fecit mira-
„ bilia haud ita pridem. Cinnabaris
„ nativa cum triplo sacchari trita,
„ tacite data, benignissimas variolas
„ dedit. “ Anno autem 1733. com-
mendabat nobis ad eundem textum
Librum viri egregii *Lobb*, quem, Lon-
dini editum, redux ex *Britanniis Bas-*
sandus ipsi adtulerat, ut ibidem quid
Antimonio & Mercurio Medicus adversus
variolas valeret, indagaremus. In

Libro dicto: *Eloge critique de M. Boerhaave* pag. 140. ipso eodem 1733. anno in Epistola ad Mortimerum hunc Lobbii tractatum summe approbavit Boerhaavius: „Quem perlegi, inquit, probavi; nam plenum vidi veræ scientiæ Medicæ, promittentemque genti humanæ plurima bona.“ Pauloque post ad eundem scribens: „Si placet, inquit, poteris egregius Lobbius evulgare sic, ut in litteris meis ad te habetur, sententiam, quam veri amor expressit. Nec Lobbius solus, sed & Hilarius, & ill. Archiater Rosenius, inceptis hisce insistentes, rem promovere satagebant. Tandem Medicus Haga-Batavus, *van den Bosch*, non minus practica, quam erudita dissertatione, hanc materiem fusius tractavit: cujus cum orbem universum intersit, nullus dubito quin quod lingua patria, ceteris nationi-

bus mortua, scripserit, in Latium, quo reliquis *Europæ* gentibus profit, transferre protinus velit.

Ex cunctis denique hisce constat *Aethiopem* mineralem, *Mercurium* sexies septiesve sublimatum, quod *Calomelanos Turqueti* nomine venit, *Mercurium* *Diaphoreticum Ioviale*m, sic *Helmontio* monente paratum, ut ne reviviscere *Mercurius* ultra queat, & *Mercurium* *animatum Solarem*, præstantissima auxilia esse ad variolas aut prævertendas, aut benigne acquirendas.

Si *Gallos* scriptores, & *Anglos*, & *Germanos*, *Batavosque*, & *Italos*, qui inoculationem posteriores tractarint, consulamus, comperimus eorum complures esse, qui *Argenti vivi*, *Antimoni*, *Sulphurisque* virtutem, impense laudent nobis, cum ad præparanda inoculandorum corpora, tum ad earundem mite genus iisdem conciliandum;

dum: alios autem, qui hæc Fossilia non præbeant, nisi cum *Falappæ* Radice, aliove purgante, mista; unico vermium expellendorum ante eruptionem scopo: alios iterum, quibus horum nulla, verum unice foliorum fenæ infusum placeat; quo & in præparatione, & eruptione, maturatione, atque exsiccatione, ventrem assiduo fluxum, quod præprimis arrideat illis, servare gestiant: alios denique, qui & omnem prorsus corporum præparationem, & omnem omnino remedium, sive ante morbum, sive in morbo, exhibitionem damnantes, non parciore sanandi fortuna, quam qui iisdem utantur, superbiant.

Si singulis a partibus, tantopere oppositis, veritas stet, singula profecto argumenta perutilia suppeditant, nobilem, quæ discutitur, materiem, clara in luce locantia.

Primo quippe si inoculatio haud minus fortunata *Mercurio*, *Stibioque* non datis, cedat, quam iisdem datis; illi, qui per eadem & præparanda corpora esse, & in morbo suffulcienda, hucusque censuerant, suæ opinionis vanitatem velint, nolint, fateantur oportet.

2^{do} Qui citra omnem aut ad morbum præparationem, aut in morbo medicationem, suam inoculandi felicitatem gloriantur, id nihilo secius fateri debent, pluribus *Insitorum* milibus nullum accessisse a *Mercurio*, *Stibioque* detrimentum, nisi illorum *Scriptorum* suspectam habeant in referendo fidem. Quid porro si & illi hos suspectaverint? Igitur ut *Talio* evitetur, stat sui cuique fides.

3^{tio} Cum laudabilem Diætam, Aëris liberum usum, tenuia tegumina lecti, diurnam a lecto abstinentiam,
mo-

motum corporis, animi refectionem, hilaritatem, jocum, lufumque, & ad ægritudinis cujuscumque adparentis initia motum in aëre libero gestatione, vectione, equitatione, conciliatum, hæc tamen & qui remedia plura dederunt, & qui pauciora, & qui tandem nulla, tanquam præsidia, quibus nemo citra vitæ periculum frustrandus foret, uno omnes ore laudaverint; tuto, ni fallor, concludere possumus, non in medicamentis, verum in hisce præsidiis, insitionis sitam fortunam esse.

4^{to} Si *Antimonii*,] *Vivique* *argenti* dationem infinitorum propemodum experientorum vi inculpatam fateri cogimur, nullum nobis argumentum upereft, quod tantorum Virorum de hisce dandis consilio opponamus.

5^{to} Incipiente itaque Variolarum popularitate, quosvis oporteret, necdum

dum easdem perpeſſos, hiſce remediis, juſta ætatum proportione, adverſus contagium, contagiique effectus, præmunire: ſin vero Variolis aut ignotis, aut raris, unus eſſet alterve, quem earundem invaſio propius minitaretur, intereaſque Medicus primo inſultu ignarus, an non alia forſan febris, horum Foſſilium impatiens, non ſubeſſet, hæc exhibere ægro vix auderet, ſaltem variolis erumpentibus exhibere poſſet, eaque omnia præſidia adhibere, de quibus unanimiter convenit.

6^{to} Per hæc omnia Sydenhamo, Boerhaavio, fidisque illorum Diſcipulis, honor abunde reſtituitur, quem iis rapuerant ii, qui in Variolis, in Morbillis, Petechhis, ſimilibusque ſuperficiæ Corporis morbis, plurimam ſtrati abſentiam, qui liberioris, temperatioris,

tioris, mutatique perpetuo aëris usum, qui tenuia lectorum opercula, qui moderatum animi corporisque motum, Sanitatis detrimenta, vitæque dispendia arbitrati, in eosdem, veluti in carnifices, homicidas, generisque humani pestes, invehi non verebantur. Ipfi Inoculatorum plures mentis candidæ Viri, palam fassi sunt eo Sydenhami, ac Boerhaavii, in Naturalibus Variolis exemplo se permotos fuisse, ut apud Inoculatos idem imitarentur, præcipuamque curæ fortunam ab hac imitatione pendere.

7^{mo} Spes nunc multa fovet, fore ut naturalium Variolarum curam emendent cum Medici, tum Chirurgi, ipsique cuncti Cives, qui suorum curam ipsi gerere, quam Medico committere, malint. Novi equidem esse, qui quod decimum quemque, aut saltem

tem vigesimum, a Variolis naturalibus duntaxat amittant, felices adeo se existiment, ut methodo non egeant emendatiore. Cogitent autem hi, si meliorem methodum amplexi, unicuique modo ex centum perdituri fuissent, an SUPREMUS JUDEX vitam decem, aut quinque saltem hominum repetiturus ab iis non sit, quos servare potuissent, jamque obstinatione inflexibili, ac voluntaria in tanta luce cæcitate, vita privarint?

8^{vo} Hæc laudatissima Methodus Mortalibus tandem acceptissima fiat necesse est, cum morbum & longe tolerabiliorem reddat, & multo brevior. Qui enim duabus tribusve septimanis caliginoso in carcere, propriis suis, iisque putridissimis vaporibus infecto, detinebatur; qui totidem Septimanis in Lecto sub confertorum stragulorum pondere sepeliebatur; qui

cum

cum atmosphæræ, tum proprii corporis, calore æstuabat; qui denique dies noctesque lugubri silentio transigebat; luce jam ac refrigerio, puro liberoque aëre, motu, lusu, amicorumque colloquio reficitur, recreatur.

9^{no} Corticis peruviani non minus largum, quam diuturnum usum, neque Variolas præcavere, neque aut paucas, aut benignas eas gignere posse, notabile exemplum. Cap. VII. §. 1. docebit.

CAPUT VI.

De Morbillis.

Morbilli propter suam cum Scarlatina febre similitudinem ad sequens Caput relegantur.

Morbus est qui expositas nunc Variolas, exponendasque febres
Scar-

Scarlatinas, cum benignitate, malitiaque, tum symptomatum natura & vi, ipsoque tractandi & curandi modo, æmulatur. Si qua tamen sibi propria habere deprehendatur, quæ in Variolarum & Scarlatinarum pertractatione non traduntur, in sequenti capite exponam.

CAPUT VII.

De Scarlatina Febre.

§. I. *Historia prima Scarlatinae malignæ, cujus symptomata tam prodroma, quam concomitantia, enarrantur, Curaque adjicitur.* §. II. *Historia secunda, & tertia Scarlatinae benignæ, & quarta malignæ, ac diuturnæ.* §. III. *Historia quinta Scarlatinae maxime malignæ. Observatio de Unguibus eorum, qui hisce laborarunt.* §. IV. *Medica Scarlatinae*
histe.

*historia de ejus Antiquitate, ac Scripto-
ribus. Definitio ejus. Morbus altera
sua periodo infamis est. Admodum &
benigna sæpe est, frequenter maligna &
letalis. Indagantur causæ, cur tanto-
pere a se mutuo differant ejus definitio-
nes? Inveniturque prior esse petenda
ex eo, quod multi nisi benignissimam vi-
derint: Secunda, quod variæ naturæ
variis extiterit in mundi plagis: Ter-
tia, quod hi cum Urticali morbo, illi
cum Morbillis eam confuderint. Cura
Stadii primi Scarlatini morbi, & secun-
di; secundi autem maxime. Laus Au-
ri fulminantis.*

§. I.

Dogmatice de hoc morbo egi in De-
finitionibus Februm, ad quem librum
Lectores refero: multa vero addenda
illi habeo, quandoquidem hæc febris,
proxima hyeme perquam popularis,
latum mihi campum de eo agendi
aperuit. Ut autem ordine agam, va-
riam

riam ejus Historiam pro more præmittam.

Puer quinquennis, idem ille, quem Cap. V. §. IV. maligna eaque periculosa valde variolarum specie ægrotantem vidimus, Scarlatina febre die 6. Febr. 1771. binis proinde ante Variolas mensibus, laborare cepit. Sanus a biennio jam lævæ auriculæ dolorem conqueri cepit, vagumque eum, molestum, rubentem, tumentemque, ac somnum ea, sequenti, tertiaque nocte, turbantem.

Die 9. Febr. Dolor nunc invadit pedem sinistrum ad Tarfi cum Metatarso articulationem, extento pede gravior, commodumque ingressum impediens.

10. Febr. Perseverat dolor, imo & ventrem nunc occupat.

11. Febr. Jam dextri pedis dolor tantus, ut tota die, inque horam tertiam

tiam sequentis, continuo ejulet puer: tumente postmodum pede, minus dolet.

12. *Febr.* Sub noctem pedem alterum dolor de integro invasit, nec, nisi ad horam 3 diei 13. *Febr.* intumescendo mitescibat, tactu tamen adhuc percipiendus.

14. *Febr.* Nullus ultra adest aut dolor, aut tumor pedum, & belle habere se puer videtur: a prandio vero capite ac præcordiis dolens lectum petiit ad vesperam usque. Surrexit. Vespertina octava nihil appetens repetivit lectum, ardorem conquestus; in lecto inquietus, jactitavit se continuo. Vident jam parentes lumbos rubescere, internasque ac superiores femorum partes latis rubicundisque plagis pingi. Sitiens multum bibit. Igiturne materies morbi partium extremarum interiora integro octiduo

alia post alia invasit, jamque demum in Scarlatinam abivit, relicta sede priore? Die 14. rubræ plagæ augmentur.

16. Febr. Deglutitio læsa advertitur, oculorumque ac faciei rubor. Apositia, excepto momentaneo meridie appetitu.

17. Febr. Omnia ut heri, sed minus intensa rubedo.

18. Febr. Mane præ manuum dolore ejulat, qui vespere auctus, & tumens. Ad singula digitorum internodia rubor, tumorque succedens, motum, tactumque refugiens. Rubedo inferiorum hodie remittit, superioribus in partibus manifestior fit; præprimis autem in facie. Universi corporis ardor. Neque die, neque nocte somnus.

19. Febr. Cessat hodie manuum rubor & dolor: pergunt dolere fauces,

COR-

corpus ardet, nares obturantur, vox minus intelligibilis fit. Ab hoc die febris valida cum symptomatum incremento alterno die observatur, una cum respiratione plus minus læsa, tussi nocturna, vigiliis, frequentique delirio. Qui prioribus, noctibus profuerat *Diacodii syrupus* posterioribus profuit nihil. Alvus non prodiit, nisi alterno die clysmate sollicitata.

Perrexit autem morbus sic ad 1. Martii usque, scilicet usque ad diem 23. cepti doloris, tumorisque, ad diem 16. observatæ rubedinis.

Itaque 1. Martii die in consilium vocor. Cum Remittentis febris natura conspicua pateret, conclusum fuit tempore remissionis Corticem peruvianum exhibere, eumque præ ingenti ingerendorum Medicamentorum difficultate, salis essentialis dicti forma; ea lege tamen, ut si febris

nihilominus ingravesceret, sanguis mitteretur, cruribusque admoverentur Vesicantia. Vox vix ultra intelligibilis, & obturatæ nares. Die 2. & 3. Martii mitius habere videbatur.

4. *Mart.* propter enormem Paroxyfmi violentiam, sanguinem vespere ex dextro brachio misimus, & cruribus Vesicantia adhibuimus. Levatus puer inde, bonam noctis partem dormivit, liquidi multum hausit, ad auroram sudavit.

6. *Mart.* Febris mitior multo. Bulas excitant Cantharides. Hodie extracti Corticis peruviani uncia, mista cum edulcorata probe mistura, uti cepit, atque integram singulo plurium sequentium dierum evacuavit; inquietus tamen fuit, nec audibilem edere vocem potuit. Credebantur vermes salvo prodire, sed accuratius examinata re, non nisi longa filamenta glutinosa erant.

7. *Mar-*

7. *Martii.* in interna Bucca dextra tres pustulæ visæ mox repletæ, albidæ, latæ; ad quas, ne maligni quid inde, ut in Scarlatina haud perrarum, propullularet, succus sempervivi majoris cum melle rosaceo admovebatur. Comedit hodie appetenter, tranquilleque trihorio dormivit: nox insomnis autem, & respiratio difficilis. Evulsitque naribus magnam concreti glutinis portionem, cum leviori mox respiratione.

8. *Mart.* Mane horis ferme quinque dormivit, evigilans primum vesificantium dolorem conquestus est. Pus formare illa inchoant. Pauca febris. Vox intelligibilior. Mens hilarior. Appetitus. Vespere copiosa ab enemate alvus. Somnus tota nocte tranquillus.

9. *Mart.* Urinæ naturales. Tota die lussit, hilaris fuit, ac bene comedit.

Continuat corticis unciam fumere. Spontanea alvus. Nox bona.

10. *Mart.* Latæ in ore maculæ disparere videntur. Die 11. & 12. spontanea alvus. Functionibus omnibus ad sanitatem redire videtur. Sicque ad 28. usque. Scrofulæ colli in hoc morbo natæ, permanent: a 24. Martii Epidermis de pedum plantis desquamari cepta. Cortice uti pergit.

5. *Apr.* Curru vehendus serenioris auræ capiundæ gratia, vertigine affectus est; vectus melius habuit, unde & vectus die 6. & 7. est; quo eum die Variolæ invaserunt, ut cap. V. habetur; sic ut neque humorum tanta per Scarlatinam purgatio, neque diuturnus adeo antiseptici Corticis usus, neque tandem exactus victus, tutari puerum a variolis, iisdemque admodum periculosis, potuerint. Plurima ejusmodi in praxi vidi. Vide *Thef. de Febr. Cap. de Variol. Morbill.* §. II.

§. II. Frater natuque minima Soror, cujus utriusque Variolæ Cap. V. descriptæ fuere, Scarlatina etiamnum correpti sunt, miti autem, nihilque malignitatis habente. Pater vero, vir 43. annorum, excepto antiquo ventriculi acore sanus, die 25. *Febr.* ad 7. vesp. Angina laborare cepit. Erat dies 19. ex quo primum conqueri filius ceperat; & dies 12. ex quo in eodem animadversa Scarlatina fuerat. Inquiete hac nocte dormivit.

26. *Febr.* Ad horam 5. evigilans, toto corpore pruriit, luceque admota se totum Scarlatina tegi advertit. Plagæ latæ erant, æquales, leviter eminentes. Notæ febris haud aderant mane, in lecto autem manenti febris accessit, gravior Angina fit; proster-nitur appetitus, fitisque invadit immanis. Potui aqua pura fuit, infusum herbæ Thææ, & Emulsio. Nocte aliquantum dormivit. G 5 27.

27. Febr. Moderata febris. Caput cum heri, tum hodie, perque omnis morbi tempus, serenum. Sumsit *Aq. Lax. Vienn. unc. V* cum *sale Sedlicensi*, a qua post mediam horam sursum deorsumque vehementer purgatus est, & adhuc vomuit vespere. Morbus cæterum idem. Ab uno *Opii* grano non dormivit quidem nocte, sed amœna corporis animique tranquillitate gavissus est.

28. Febr. Ab hora 5. ad 7. dormivit. Morbus idem, artus inferiores superioresque Scarlatina nunc occupat. Vespere dabatur *Opii* sesquialterum granum, quia syrupos non fert, duas in doses divisum: variis horis sumpta utraque magna animi γαλήνη beavit principia noctis, reliquam vero noctis partem inquietudo, lassitudo, spectraque veluti obversantia visui, turbarunt, ad 5. matutinam usque.

i. Mart.

1. *Mart.* Ab hora 5. ad 10. profundus somnus. Medicorum præsentia evigilans, obdormivit illico ad 3. pomeridianam. Surrexit tunc lecto, reffectus somno, & melius se per omnia habens. Nocte insequente sponte dormivit, & sudore fætidissimo, multumque levante, maduit.

2. *Mart.* Diem totum bene trans-egit. Manus pedesque tument. Nox optima.

3. *Mart.* Die ab eruptione sexto, sumsit mane *Rhei*-dragmam, quia haustus repudiat omnes. Optima inde purgatio alvi.

4. *Mart.* Corrugari incipit manuum tumida cutis; urina fusca reddi, turbarique; minor autem corporis alacritas, vigorque percipi. Pedum tumor idem.

Mor.

Morbi hujus hoc ipso tempore malignitas, & in Filio manifesta, & in aliis, tumor insequens in non paucis ægris perniciosus, ac letalis, tandem Casus brevi memorandus, in causa fuere, cur ad Corticem peruvianum confugerimus. Itaque sumsit ejus pulveris unciam mediam quotidie spatium 21. dierum. Singulis quartis diebus autem scrupulos duos Rhei. Tumor pedum ad 14. morbi diem perseveravit; postmodum ubi surrexerat rediit, vespere plerumque manifestior. 20. die penitus defuit. Desquammatio aliquando farinosa, aliquando frustulatim, continuis quatuordecim diebus observabatur in manibus, atque in abdomine; a 20. autem die ea brachiorum crurumque cepta est: tota vero desquammatio, eaque per lacinias ingentes, ad 40. & ultra morbi diem,

diem , perseveravit. Integerrima , constansque secuta sanitas est.

§. III. Ancilla cubicularia ejusdem familiæ , annos 23. nata , quæ Variolas ac Morbillos infans toleraverat , narium hæmorrhagiæ obnoxia , frequentiorique Anginæ , ceterum sanissima , menstruoque fluore ordinato sic gaudens , ut describundo mox in morbo consueto tempore fluxerit ; hæc, inquam, febre 24. Febr. ad vesperras corripici cepit. Erat hic dies 14. morbi filii natu majoris , & pridie quam eodem corripici ceperat Pater familias. Ipsa autem vespera , qua febrile occipit , rubedo scarlatina jam aderat , eodemque momento gravis Parasy-nanche.

Sumta die 25. Febr. *Aqua laxativa* , probe purgata est , egregie bibit anti-phlogisticos potus , gargarizavitque cum iisdem. Febris interea & rubedo

do scarlatina, augebantur. Quapropter ad alterius diei morbi finem vena brachii secta est. Sanguis perquam inflammatorius.

27. Febr. Venæ sectio repetita est die tertio medio. Bonus, qui tunc prodiit, sanguis fuit. Ad ejusdem diei finem, propter morbi, anginaeque incrementum, detractus est ex pede sanguis. Illico post fluxus menstruus statō suo tempore prodiit. Cum illis in ædibus onerosa admodum esset, egoque hujus morbi demonstrationem in Nosocomio gestirem, curavi ad 9. vesp. carpento eam eo de-vehi.

Mox eam in Nosocomio examinans, video utriusque ruberrimæ Tonsillæ molem adeo auctam, ut se in medio contingerent, pendulamque Columellam post easdem. Celer valde ac compressus pulsus. Nihil fe-

re ea nocte dormivit, jumentofam urinam minxit. Cataplasma emolliens, atque discutiens, eâ nocte gutturi circumpositum, sic profuerat, ut duas libras Aquæ Avenæ cum melle ac nitro bibere potuerit.

28. Febr. Calor 102. gr. Gargarizare recusanti blanda facta in fauces injectio est: vomens inde, ipsa coegit se ad gargarizandum, fecitque egregie id toto morbi tempore. Ab enemate pauca alvus. Meridie uncias duas *Aquæ laxativæ* sumsit; cujus bona portione evomita, alias duas post trihorium uncias hausit, retinuit, terque pauca egeffit. Assumtorum pleraque hoc die vomuit, ipsumque *Emulsum*, cujus libræ uncia *syrupi Diacodii*, & media *Nitri* dragma, inerant. Potum ex *Baccis Caffæ* cum lacte ardentem petivit, non evomendum rata; sed & illum pariter vomuit. Horam vesp-

vespere dormivit. Pulsus tunc celer admodum, nunc liberior, nunc obscurior. Vario quoque tempore anxia magis, liberiorque, respiratio. Ingens faucium dolor, sitis, lassitudo, Catameniorum interea requisitus fluor. *Syrupi Violarum*, ac *Rubi idæi*, partes æquales faucibus continuo adplicat, & deglutit. Emulsum bibit, & Jura carnis. Calor vespere 103. graduum est. Vix fesquihoram, idque per intervalla, dormivit.

1. *Mart.* Calor 102. gr. Tumor quidem faucium paulo minor, sed non minor ideo dolor, nec minor vomitus. In gravi hac *Parasynanche* mirabamur absentem auris internæ dolorem. Accessit *Ischuria* 24. horarum. Cathetere urinæ turbidissimæ Libram eduximus. Vespere iterum fesquialteram libram. Ad horam 7. & 11. datæ denuo sunt duæ *Aquæ laxativæ*
un-

unciæ, unde non vomuit quidem, sed vix quid deposuit. Mane pulsus celer admodum, sed liberior, vespere adhuc celerior. Respiratio difficilis. Calor 101. gr. Ab unc. 11. *syrupi Dia-*
codii vix horam dormivit.

2. *Martii*. Calor 102. gr. Pulsus celer valde & compressus, semper tamen æqualis. Respiratio difficilior. Tumor faucium minor quidem, sed vehementior dolor. Unde unciæ XIV. sanguinis detractæ. Ingens crusta sanguinem texit. Sub finem venæ sectionis animo defectura, resiciebatur mox aceti vapore. Inde multo liberior pulsus, minusque celer. Urinæ jumentosæ libra ad meridiemeducta Cathetere fuit. Hoc mane gutturi Cataplasma circumpositum est ex fermenti panis, saponis lotricum, & sinapi ut in mensa comeditur, a p. æq. pul-te, laborioseque renovatum per dies

complures. Serum lactis cum *Tamarindorum* fructu coctum, & cum unciis tribus *Syrupi Rubi ideï*, ut fauces idferrent, mistum, bibit quantum potuit. Oculi multum dolere inceperunt; collyrio quod ex *Aqua Rosarum* uncus sex, & *Florum Zinci* dragma parabatur, brevi consanuerunt. Cataplasma vix aliquot horis admotum gutturi fuerat, quin jus carniū Vitello ovi mistum peteret, deglutiret, nec vomeret. Vespere cum celeriore quidem at libero tamen pulsu, minus se pectore faucibusque dolere gaudebat. Ad noctem tamen os aperire, quo fauces paterent, non potuit, & subinde deliravit. Menses hodie substiterunt. An quod parcius debito fluxerint? An ob detractum quater largiter cruorem? An errore Chirurgi, qui non intelligens tundendam in pede venam fuisse, eam brachii tutuderit?

rit? Ad noctem calor 101. gr. Nocte nec urinam reddidit, nec alvum. Bis sumta *Syrupi Diacodii uncia*, recte dormivit.

3. *Mart.* Pulsus minus celer, multoque liberior. Respiratio facilior. Dum lectus mane reficiebatur, primum remotius inde sedit, deinde ancillis suffulta circuivit per conclave spe minguendi, sed incassum. Quamobrem ad meridiem Cathetere usi, uncias decem urinæ eduximus. Hora autem quinta postea primam urinam spontanea reddidit, bisque adhuc postmodum, cito olentem. Pauca a Clysmate alvus. Vomitus nullus. A dente carioso Odontalgia. Deglutitio facilis. Respiratio pessima sæpe, gargarizando statim emendata, ut a copiosiore faucium glutine lædi videretur. Calor 101. graduum. Ab eadem *Syrupi Diacodii*, qua heri, quantitate somni breves quidem, sed frequen-

H 2

quentes, anxii nonnunquam, sæpe liberi.

4. *Mart.* Calor 101. gr. Os nunc aperit, ut possimus fauces intueri; quæ multum quidem tument, at multo, quam olim, minus; proque intensa rubedine cunctæ albescunt, in dextris potissimum, ubi omnia pure albo perfusa videntur. Continuamus usum Cataplasmatidis ejusdem, ejusdemque gargarizatus. Tendines crebro subsiliunt. Celer multum, æqualis autem, liberque, pulsus est. Anxie sæpe respirans, solamen ter quæsit in sedem confidendo, in eaque non pendula sedit, sed firma erectaque. Oculi meliores. Appetitus aliquis. Sitis pauca. Gargarizatione, atque injectione frequentibus, ingens cum glutinis, tum puris copia, crebro solvitur. Pluries hodie dormivit parumper. Pauca a Clysmate alvus. Urina
ter

ter sponte missa, turbida & redditur, & manet, citoque foetet. Calor vespere 101. grad. Inquieta ac molesta nox. Morosa fuit. *Diacodium* respuit, aliaque.

5. *Mart.* Calor 102. grad. Pulsus celer est, & valde suppressus. Respiratio per intervalla faciliior, & difficilior, pro more. Faucium minor tumor, sed major dolor. Jamque novus dies præteriit morbi.

Exemplo aliorum, in Gangrænam, mortemque, hoc modo tendentium, perterritus, Corticem peruvianum exhibendum esse decrevi, singulis feri lactis Tamarindinati libris guttas sex spiritus Vitrioli addidi, attentus modo an ferrent fauces? Porro commode hæc tulerunt, emendatæque fuerunt sic, ut deglutitio libera fieret, appetitus rediret, & per intervalla somnus.

Quater pauca alvus. Bis reddita urina turbida, ex fusco rubra. Semihoram ex lecto fuit. Pulsus tota die celer admodum. Respiratio anhelosa sæpe, ac sonora, doloremque sinistri Thoracis lateris conjunctum habet; unde & emolliente cataplasmate involvebatur latus. Gargarizatu, & injectu, fauces hinc inde rubicundæ quidem, at vix ultra tumentes.

Corticis autem decoctum in hisce sensilibus, atque irritabilibus faucibus haud facile ferendum, mitigare debui sic, ut demum varia tentando modum, quo id ferrent, invenirem. Is porro talis erat. *℞. Cort. peruv. pulv. uncias tres. Coque biborio pura aqua, libræ tres colatæ d. u.* Ad hujus uncias quatuor solius syrupi Rubi ideï uncias tres adjici oportuit. Sumsit singula hora unciam, & sæpe quid plus, ita ut nocturni tempore totum evacuaret, idque

idque a die 9. morbi ad 31. usque: ex eo vero tempore bidui spatium id absumsit. Porro ex historia nunc danda hic usus longior atque copiosior peruvianæ Corticis plene, ni fallor, justificabitur.

Calor vespere 101. gr. Nocte non dormivit, & ad tertiam matutinam præ intolerabili totius pectoris dolore vehementer ejulavit; quamobrem renovatum Cataplasma fuit. Ad auroram dormivit. Alvum non misit, sed urinam copiosam, ac jumentosam.

6. Mart. Calor 101. grad. Nec fortis dicendus est, nec debilis pulsus, parum celer subinde. Idem de ejus æqualitate. Porro hæc omnia a respiratione nunc anhelosiore, nunc liberiore, gubernabantur: hæc enim, ut pluries jam notatum, anhelosior per intervalla reddita celeriore longe, ac rhytmo, temporeque, inæqualem pulsum reddebant.

Dolor ad præcordia manet. Clyf-
ma cum multo *Oleo lini* injectum est,
ut si in transversa, sæpe altiore, coli
intestini sede doloris causa hæreret,
mitigaretur. Moratum quidem diu
est in Intestino Oleum, dolorem vero
non oblinivit. Sæpe hodie semiclau-
sis oculis dormivit. Lecto exempta
non est, nisi quo tempore is reficere-
tur. Bis copiosam urinam valde tur-
bidam misit, tardius olentem.

Lucida facilioris respirationis in-
tervalla rariora hodie, pergiture ad
præcordia dolor, auctus vespere sic,
ut cor inde premi sibi, velli, lacerari-
que vociferaretur. Cum vero & ma-
gnus pulsus esset, & plenus, & celer-
rimus, calor quoque toto corpore
æqualis, venam lævi brachii tutudi,
uncias quinque eduxi sanguinis, ra-
pide fluentis, crassoque corio mox
tecti; missurus copiosiore, si non
mite-

mitesceret dolor. Cum nihil ille cederet, alias quinque uncias, bihorio elapso, emisi. Hic cruor pellem sibi non adscivit. Principio minor pulsuum celeritas, cito autem celeritas eadem, quæ prius; dolorque idem præcordiorum; ita ut omnia repudiaret, alimentum, potum, medicinam. Calor 102. gr.

De causa olidi urinarum foetoris solliciti, multa volvimus. Non potuit ægra unquam sive jacens, sive sedens, ut ceteri ægri solent, mingere; sed lecto exempta duntaxat, insidensque excipulo diu. Quamvis excipula purissima admoverentur, an ligno tamen non imbiberetur stercoreus foetor, isque lotium inficeret dubii, excipulum plane novum supposuimus, & lotium obtinuimus haud ultra foetidum. Unde videtur lignum foetore imprægnatum urinam infecif-

fe. Fatendum tamen est, etsi in novum excipulum excepta oluisset, necdum se natura sua vere imbutam fuisse probasset, cum diu excipulo insidenti ægræ, urinamque urgenti, facile quid fœcale ex ano exprimi potuisset, quod oculus in turbida urina ægre percepisset.

Nocte per intervalla dormivit. Inter somnos placidior, indolentiorque, multa omnino sive admonita, sive ultronea, sumsit, ac bibit. Aquam Avenæ cum melle facilius admittunt fauces, quam serum lactis tamarind. Hausit illius libras duas.

7. *Mart.* Calor 101. gr. Pulsus ac respiratio ut heri, dolor autem mitior. Hora 6. matutina vidi uncias tres commode deglutientem: cum vero a guttula in glottidem illapsa tussiret, præ dolore præcordiorum ejulantem, ac duorum minutorum spat-

tio

tio celerrime respirantem. Tunc pacatior, duo denuo cochlearia sumfit, nec ultra voluit. Interim decoctum Corticis intra 32. horas evacuavit.

Hora 8. matutina pulsus plenus, fortis, æqualis, minus celer; respiratio minus cum celeris, tum brevis, inæqualisque. Sæpius dormivit oculis probe clausis. Iterum clyfma femioleosum.

In duobus vitris oleum urinæ supernatat, in novum plane excipulum exceptæ. An quod inter mingendum quid injecti in anum olei una expressum sit? Nihilominus a Practicis dudum didici, & plus simplici vice observavi, oleoso clysmate sæpius injecto, diuque retento, in urina plus minus olei supernatare: at vero cum non in excipulum, sed in vitrum mingeretur, & illi, & ego, certiores de hac re facti sumus, cum ex Intestino recto admisceri

misceri nihil tunc potuerit. Num a vasis hæmorrhoidalibus, quæ Intestino Recto, & Vesicæ communia, nonnunquam Vesicales hæmorrhoidas, seu hæmorrhoidalis per Vesicam cruoris fluorem, ducunt, resorptio hic fieret olei, & in Vesicam infusio?

Deglutitio per diem longe commodior, ut sæpius, præter medicinam jus carnis, cum purum, tum hordei cremore mistum, duoque posita cocta, sumferit. Fauces collabuntur perpetua gargarizatione, & injectione. Decoctum Corticis peruviani tanta Syrupi Rubi ideæ copia edulcorari, quo id fauces ferant, debet, ut ejusdem syrupi libram die assumat. Horarum 24 spatium nunc totum Decoctum evacuavit. Calor 100. gr. Breves, sed plures, somnos habuit; evigilans autem diligenter gargarizavit, & bibit. Jam lumborum conqueritur dolorem.

8. *Mart.* Calor 100. gr. Fortis, æqualis, modicæ celeritatis, pulsus. Respiratio bona quidem, tussienti vero dolorosa fuit, pulsusque eodem tempore & inæqualitas aucta, & celeritas; minus tamen, quam olim, quia mitior dolor est. Fauces naturales. Sæpius hoc die dormivit. Adfuit aliquis appetitus. Bis urinam, & ab enemate alvum depofuit. Pulsus vespere paulo & celerior, & compressior. Tranquille decumbenti respiratio naturalis; moventi autem se, aut per alios motæ, notabiliter celerior observatur.

Licet fauces bonæ, ardorem colli externi vehementer conqueritur. Id sane ab acri cataplasmate. Ideoque eo remoto ad albam, crassam, fissamque colli epidermida *Emplastrum de Meliloto* adpositum est. Optima hic suppuratio, ablato mane ac vespere emplastro,

plastro, apparuit, pluribus diebus. Vespere calor 101. gr. Nox bona. Continuat *Decoctum Cort. & serum lactis tamarind.*

9. *Mart.* Calor 102. gr. Celeritas inconstans Pulsuum, ut & Respirationis. Dolor pectoris levis. Evacuavit alvum partim naturalem, partim pultiformem; bisque copiosam urinam, flavidiorem, turbidam, citoque fætentem, non odore stercoreo, quo ante, sed urinoso. Ex lecto sesquihoram ante meridiem fuit, post meridiem horam. Dormivit sæpius. Appetivit nutrimenta. Suppurant externæ fauces. Cataplasma hoc, & nata inde post inflammationem suppuratio, videntur explevisse id, quod *Hippocrates* innuit *Aphor. Sect. VI. N° 47. & Sect. VII. N° 49.* Deglutitio enim nunc bona,

10. *Mart.*

10. *Mart.* Morbi die XIV. Calor 98. gr. uno alterove gradu naturali calore superior. Pulsus bonus, & Respiratio. Pectoris exiguus dolor. Sesquihoram ante, bihorium post meridiem, ex lecto fuit, bis multum, mox foetidum, minxit. Hodie vix dormiens, hilaris animi fuit, beneque comedit. Calor vesp. 99. gr. Nocte alvum naturalem egeffit, & dormivit quinque horis consequenter. Eadem Medicamenta.

11. *Mart.* Calor 99. grad. mane ac vespere. Omnes functiones in integrum pene restitutæ. Omne lotium turbidum mox, foetidumque. Faucibus valentibus, paucus modo syrupus cum Decocto sumitur. Nox bona.

12. *Mart.* Mane calor 98. Vesp. 99. gr. Lotium putridum. Uncias duas Aquæ lax. vomuit; calentes sumerat: alias duas frigidas, posteaque geli-

gelidæ haustum fumfit; retinuit. Dejecit inde quinquies. Nox bona. Epidermis manuum pedumque desquamatur.

13. *Mart.* Omnia bene. Lotium minus cito olere ceptum. A 14 die ad 27. mox missum oluit: a 23. die hypostasim inchoavit. A die morbi 18. ad 37. quærelæ majores, minores, lassitudinis, nec non doloris nunc dextri, nunc lævi brachii, nunc pectoris. Desquammatio Epidermidis a die 16. in 40. perpetua, seu farinacea, seu furfurea, seu per lacinias. Perfecta atque constans subsequuta sanitas est.

In hac Juvencula, in ejus Domino, filioque, facta desquammatione, crena, sive sulcus, in singulis manuum pedumque unguibus apparuit ad dictam unguis lunulam, transversusque ille, nec tactu minus, quam visu percipiendus, cum ungue crescens,
nec

nec nisi consueti incrementi unguis tempore cum eo abscindendus. Unguis linea ferrata in aciem ducta, ex cute natus, Epidermide tectus, morbi materiem excipere a cute, & epidermide, ad usque lunulam, potest: supra lunulam vero crassior, compactiorque, materiem sistit, eandem non, nisi crescentibus suis per longitudinem fibris promovet, paulatimque ad suum marginem ducit: ita ut demum hæc crena, seu sulcus, cum luxuriante unguis extremo abscindatur. Unguium deformitatem & alii cutanei morbi habent. *Celsus Libro V. Cap. 28.*
„ Impetigo albida infestare quoque
„ unguis solet. Et, Pfora unguis
„ duros, scabrosque gignit. In hisce acrior penetrantiorque materies unguis totam perreptare substantiam videtur.

§. IV. Historiam completam febris scarlatinæ dare volui, ut Medici juniores, quique eorum vicem supplere sæpe debent, Chirurgi, ejusdem malignitatem perpenderent, curamque intuerentur. Historia hæc fundamentum ponit, plura nunc de hoc morbo proferendi. Anno 1760. in *Thesibus de Febrium divisionibus* ejus definitionem dederam, divisionemque in malignam, ac benignam; nomina quibus insigniatur varia; præcipuos qui de eo scripserint Autores; unaque ejus epidemiam, quam anno 1748. & 1749. *Hagæ-Batavorum* videram: omnia autem cursim, cum *Theses* tantummodo essent, elaborationis tandem operis prodromæ.

Anno 1742. Germanice de eodem scripsit *Joannes Storch Medicus Gothanus*, atque post datam 200. ægrorum Historiam, de morbi nomine egit, deque
ejus

ejus natura, causis, phænomenis, & curatione : opus profecto egregium, utileque est; dignissimum, quod omnium Medicorum manibus teratur.

Anno 1762. Viennensis egregius Medicus, *Marcus Antonius Plencis*, edidit *Viennæ* varios tractatus, divisos in Tomos quatuor, quorum tertius de *Scarlatina febre* est, docte, mascule, ac vere practice conscriptus; cujus plurimum usum in hisce faciam.

Non immorabor Quæstioni ab his claris motæ Viris, fueritne hic morbus Venerandæ antiquitati notus, an recentioris modo ævi sit? Similitudo ejus cum morbillis tanta, ut etiam posteriore hoc tempore in medicorum scriptis morbus uterque confundatur; Veterum negligentia in acutis Exanthematibus tanto major, quo accuratius, justoque forsitan subtilius, exanthemata Chronica & discrimina-

1 2

rint,

rint, & exararint; suspicionem noti
ipsis morbi fuggerunt. Nihilominus
lectis omnibus conficere debemus sæ-
culo XVI. & ineunte XVII. rariorem
fuisse, ut ex *Foresto*, *Sennerto*, &c. li-
quet; finiente XVII. sæculo & frequen-
torem, & periculi rarioris extitisse;
hoc vero sæculo nostro, cum frequen-
torem, tum malitiosiore in gentem
humanam sæviisse.

Nomina morbi varia, erronea sæ-
pe, ineptaque, quibus eum Medici
quondam appellarunt, laudatis in
Scriptoribus invenire est. Scarlatinæ
nomine, barbaro satis, jam venit, a
colore panni, vulgo sic appellati, mu-
tuato, civitateque, ut videtur, in
Arte donato. Est febris acuta, exan-
thematica, rubras, easdemque latas,
maculas proferens, organa degluti-
tionis non raro impetens, Epidermidis
in desquamationem abeuns, & in-
famis

famis præcipue periodo sua altera, unius, alterius, tertiæ, & ultra septimanæ, qua tumore corporis vario, anxietate, debilitate, hominem non raro in longe majus discrimen, quam in periodo priore, conjicit. Infantilis morbus appellatur, quemadmodum Variolæ: ut vero hæ, sic & ille, haud infrequenter adoritur adultos. Meritoque febris acutæ appellatione notatur, licet plures febrile vix videantur: pari modo, quo plures Variolas, acutum sane morbum, vix febrientes absolvant. In ejusdem popularitate, si & tunc frequens Morbillus est, alter morbus sæpe alterius nomine recensetur; ut etiam apud *Mortonum*, aliosque, pro altero alter describatur. Passim distinguuntur tamen, cum peculiari symptomatum natura prodeant, formaque macularum, potissimum vero altera sua periodo.

Morbi benignitatem, atque malignitatem, & sporadica ejusdem præsentia, & epidemica, manifestant. In benigna Scarlatina multa medicina opus non est; sola natura eam curat, adjuta paucis: præpostera medicina malignitatem sæpe homini infert, & mortem. Id quod singulis in morbis, quos exanthematicos vocant, obtinet; ut sæculo abhinc plorabat Sydenhamus. Hic vero morbus id peculiare habet præ ceteris id genus morbis, ut libero quidem, ferenoque aëre gaudeat, aprico autem, ventisque agitato, in secundam suam periodum, alias longe rarius observabilem, crebro abeat. Neque sic ejus pravitas terminatur: frequenter enim hæc tanta est, ut in gangrænam sphacelumque, & fauces convertat, & buccas, & linguam; ossa in cariem vel dissolutionem; universum cruorem in Meph-

phi-

phitim : quorum omnium plura exempla vidi in Epid. an. 1748. & 1749. Egregius *Morton Pyretologicæ Cap. 5.* Scarlatinam septuagenariæ Matronæ febrim, in Elencho Capitis, describit motibus dirissimis & pestilentibus stipatam; ad finem vero Capitis ipsam Pestem appellat, repetitque dicendo „ a peste, inquam, evasit, quoniam venenum morbi prædicti pestilentialis fermenti malignitatem adæquabat: & si quando Venenum istiusmodi morbillosum (qua appellatione scarlatinam & alibi, & hic, recenset) crisi perfecta per cuticulam propelli haud potest, tanquam venenum pestilentielle glandulas sponte petit Narium, Faucium, Inguinum, easque inflammat & exulcerat, nec non Carcinomata, Bubones, & Parotides excitat. “

Pauca hæc sufficient, ut capiatur quam ob causam ægrorum trium historiam adeo prolixam, operosamque adeo medicationem, tradere debuerim. Phlebotomiæ necessitatem, utilitatemque insignem, tum & Antisepticorum, atque Corticis peruviani præprimis, liberalem usum demonstrari oportuit.

Triste memoratæ Epidemiæ fatum me, aliosque Practicos, hanc viam capeffere docuerat; quandoquidem cæteroqui singuli, qui ad malignitatem descriptam provecto malo pervenerant, misere perirent; pluresque eorum morte eriperentur, quibus, sic affectis, hæc auxilia adhibebantur; ac tandem iisdem auxiliis tempestive admotis, omnes, ne in omnium pessimum mali gradum inciderent, præservarentur. Est porro notandum in morbi malitia minore unciam mediam pul-

pulveris, quotidie sumtam, diuque continuatam, curam absolvere; in maligniore vero pravitate ejus determinari non posse quantitatem, sed vel non dandum esse, vel liberali manu, donec juvet. Viro meo §. II. media uncia, trium septimanarum spatium quotidie sumta, suffecit, ut incipientis malitiæ impetus obtunderetur, neve in stadium morbi alterum, de quo mox pluribus, incideret. In ægris vero §. I. & III. Functionum læsio ingens, stadiique secundi minæ, liberalem exegere quantitatem.

Stadium morbi alterum incurritur a commissis quidem in usu sex rerum naturalium erroribus, sed omnium maxime a maturiore expositione corporis in aëra frigore, ventifve, inimicum, idque intra unam, alteram, tertiamve, ab absoluta periodo prima, hebdomadam. Haud vero ab his cau-

sis duntaxat, verum etiam a relicta, ac subdole latente malignitate, ut morbus curatus videatur, nec tamen sit. Cur enim toties in alterum hoc stadium inciderent ii, qui nullum horum errorum commiserunt? Vide Viros laudatos *Joannem Storch* pag. 148. & *M. A. Plencis*, pag. 118. Et quoque Pueri, Viri, ac Juvenulæ, Historiæ, §. I. II. III. abunde docuerunt, etiam citra ejusmodi causas, stadii secundi principia animadversa, nec nisi peruviano Cortice, ne adolescerent, præpedita fuisse.

Mirabitur forte quis Scarlatinam & in primo suo impetu, & præsertim in secundo, tam graphice hic describi, interea dum hujus malignitatis ne umbram quidem multorum Autorum descriptiones habeant. Causa hujus diversæ descriptionis multiplex est. *Primo.* Scarlatina tam benigna cum sæpe sit, ut vix mereatur morbi nomen,

men, Medici qui non nisi talem viderunt, eam non nisi talem describere potuerunt, & tantummodo prava medicatione malignam. Londini sic fuisse videtur ab anno 1661. ad 1675. ita ut Sydenhami in manus inciderit nemo, quem non invasisset benigna levisque; nisi perversè actum cum illo esset.

Secundo. Differentes morbi descriptiones differentia Regionum peperit. Quo, verbi causa, tempore primam editionem *Institutionum Medicarum* dabat Celeberrimus Vir, dignus digni Patris, ad cineres usque mihi colendi, filius, Joannes Oosterdyk Schacht, eam utique Scarlatinæ naturam descripsit, quam & Medicus olim, & annis 18. Professor Medicinæ, benignam semper, alteroque stadio carentem, toties viderat: interea dum in Gothano Ducatu Storchius ingentem malitiam

litiam morbi, numerosasque lugeret ab altero stadio strages.

Solvitur sic Problema ab exp. Vi-
ro Plencis *Tract. de Scarl.* §. LVI. pro-
positum: „ Interim, scribit, si tem-
„ pora combinare licet, quibus Erud.
„ Magnif. Archiater *de Haen* in sua
„ *Med. Rat.* (*Thesibus de Febris*) af-
„ ferit Scarlatinam perquam mali-
„ gnam 1748. (& 1749.) in *Hollan-*
„ *dia* (*Hagæ-Batavorum*) grassatam
„ fuisse; mirari satis non valeo, quod
„ *Cl. de Gorter* qui 1750., adeoque
„ biennio tardius, hæc de Scarlatina
„ opera (*Systema praxeos Medicæ*)
„ evulgavit, nullam de prædictæ
„ Scarlatinæ malignitate mentionem
„ faciat. “ Non est profecto quod
miretur Vir clarissimus, si attendat ad
locorum distantiam. Celeberrimus *de*
Gorter, *Harderovici* in Provincia *Geldriæ*,
ego *Hagæ-Batavorum* in Provincia
Hol-

Hollandiæ, exercui Praxin. Non vidit in sua Provincia morbum, quem ego in mea: si non vidit, describere non potuit. Quin & in eadem Provincia si scripsisset, potuisset, nisi commercio literario aliarum urbium instructus fuisset, de scarlatina eadem, quæ nunc, protulisse; cum vicinas urbes labes non attingeret, quæ præmebat istam. Male enim scribor Provinciam totam nominasse, qui solius Metropoleos meminerim. Id interim ex ejusdem Magnifici Russorum Imperatricis Archiatri *Compendio Medicinæ* constat, quod non ita benignam Scarlatinam semper crediderit, quin genitricem eandem cum Hæcticæ febris, tum Convulsionum, agnoverit.

Tertio. Scarlatina a pluribus Autoribus sic descripta videtur, ut hi cum Urticali pruritu, illi cum Morbillis, aut ex ignorantia, aut, ut ipsi
mo-

monent, de industria confuderint. Hinc his sæpe gravis, periculofus, non raro diuturnus, aliorumque morborum ferax, morbus audit; illis adeo benignus, ut inter morbos vix videatur recensendus. Scarlatina utique nobis levior ac benigna appellata, non est plerumque adeo levis, ut minime dicas non ægrotare infantes. Ut proinde qui ne morbum quidem vocandam esse scarlatinam censuerunt, levius eruptionis genus pro eadem habuisse videantur. E contrario qui eandem pro morbillis habuerunt, eos plerumque gravem morbum Scarlatinam deprehendisse oportuit, cum Morbillus gravis morbus, ac Variolis sæpe pejor, existat. Vexillifer hic *Mortonus* est, qui statuit „in Morbillis efflorescentiam interstitiis figura „diversa, oblonga scilicet, quadrata, vel multangula præditis, variiega-

„ riegatam esse : namque, ait, non
„ una continuata inflammatione, seu
„ rubedine, ut in febre Scarlatina,
„ pertunditur cuticula. Quo criterio
„ duntaxat hæc efflorescentia ab al-
„ tera, quæ febrem scarlatinam co-
„ mitatur, dignoscenda est. Quæ
„ differentia, (ut initio capitis V.
„ monet,) tanti non est, ut alterum
„ morbum constituat, nisi pari ratio-
„ ne Variolæ confluentes & distin-
„ ctæ... ceterique morbi, ex ac-
„ cidenti aliquo inter se differentes,
„ ubi causæ, symptomata, progno-
„ stica, curativæ indicationes, atque
„ methodus medendi, ab invicem
„ minime distent, in diversos morbos
„ dividantur.

Sufficiant hæc, ut ratio discrepan-
tiarum intelligatur, quam in hujusce
morbi definitione aut descriptione,
offendimus. Sed minus recte qui cum
aliis

aliis morbis eam confuderint, egisse, evidentissime Post *Storcbium* ostendit *Clarus Plencisius*, cum morbilli eo altero stadio carentes, a Scarlatina eodem infami, toto coelo differant. Ita ut ipse egregius Vir *Mortonus* cogeretur Morbillis aliena symptomata adscribere, dum ab iisdem Hydropem intercutem, Hydropem cavitatum, &c. natum esse refert, quæ proprie secundi Scarlatinæ stadii symptomata sunt.

De cura primi stadii scarlatinæ, qua compescatur ejusdem malignitas, deque cautela necessaria, ne in alterum stadium abeat, sermone opus vix est, quod in Historia ægrorum is multus fuerit, inanisque ejus repetitio foret. Corticis peruviani si aliquo in morbo diuturnus esse debeat, largusque usus, in hoc saltem debere constitit. Expositione quidem egeret Phlebotomia, bis extante Scarlatina facta, bisque
nec-

necdum terminato squammæ casu repetita; verum cum capite *de Febri Pestilentiali* hæc agitanda quæstio sit, malim eo remittere Lectores.

De cura stadii secundi quædam hic monenda veniunt. Tumor corporis universi Leucophlegmaticus, major, minorve, adeo sæpe calamitosus est, ut serum in visceribus variis, potissimumque in Pulmonibus, aut cellulositatem involucrorum, aut cellulositatem integrum Viscus perreptantem penitus expleat, respirationem difficilem, ac fere suffocantem reddat, deliria, convulsiones, & interitum generet. Id dum fit, Diuretica ac Purgantia egregii sæpe hic effectus sunt; Sudatoria vix unquam, præ impenetrabili fere corporis hoc in casu superficie. Utriusque hujus Classis ea potissimum laudantur, quæ una antiphlogistica sint. Clysmata famulen-

tur utrisque. Peruviae Cortex intermiscendus est, iis præ ceteris præstantissimus, quos alvo facit liberales. Hydropem Asciten eo evacuatum hoc modo vidi. Non raro tamen malum omni remedio majus est. Decimus quisque Storchio, omnem lapidem ad servandum moventi, peribat.

Hinc, referente Cl. Plencisio laudatur in *Austria* remedium, quod Magnif. Archiatrum *Weber de Turnberg* autorem habere dicitur; cujus vires & in hoc, & in aliis, imo desperatis in morbis, summæ efficaciam esse deprehensum fuit. Compositio hæc est: R. Rhei electi, Spir Sal. coagulati an. dr. j. Mercurii dulcis, Auri fulminantis, Extracti squillæ an. dr. j. Rob Junip. q. s. ut f. pil. gr. j. vel. jj. auro argenteove obvolvenda. Lex autem assumendi est ut i^{mo} proportionem ætatis morbique violentia, quovis bihorio, una alterave pilula de.

deglutiatur, sic ut solvatur alvus singulo die ter quaterque : fin minus, ut massa pilularum acuetur sive *Mechocannæ Magisterio*, sive *Diagrydio sulphurato*, sive *Massa pilularum Cochiae*.
2^{do} Ut superbibatur infusum Diureticum *Baccarum Juniperi*, seu *Rad. aperientium*, ne in *Ptyalismum* incidat æger. 3^{tio} Ut post trium quatuorve dierum usum a remedio uno aut altero die abstineat. 4^{to} Ut paregoricis sedetur, qui forsan a remedio excitaretur, motus, ac perturbatio. 5^{to} Ut non detur hoc remedium in febre validiore. Ea ejus deprehensa virtus legitur, ut intra unum, alterumve diem, ingens feri vesica alvoque copia eliminetur, atque ita cito concidat hydropicus tumor.

Novi quidem *Auri fulminantis* non rite parati vires noxias, dextre confecti, nullas perhiberi; ejusdemque

opinionis me quondam fuisse *Tomus XI. pag. 138.* docet. Ea tamen *Hoffmanni* sententia non erat, Viri utique in Chemicis haud minus, quam in Practicis, magni. „Arctissimus enim „salium, inquit *Obs. Chem. libr. 3. in „Magisteriis & præcipitatis*, nexus „est, quod videmus in *Auro fulmi- „nante*, Calce lunari per spiritum „salis facta; ita ut aquæ affusio æger- „rime ea edulcoret: quare etiam a „residuis salinis, intra eorum poros „particulis, ipsorum medicinalis effi- „cacia promanet. “ Curatio certe felix a claro *Plencisio* relata, tum & quæ sequuntur ibidem, mutare opinionem jubent. Addit enim ille illustrem Archiatrum *Weberum* ejusmodi remedii efficaciam aliis multis, iisque pertinacissimis in morbis, expertum esse, in *Ileo*, & *Ischuria* scilicet, modo socia inflammatione carerent; tum

&

& in *Suffocante Catarrho*, inque *humido Asthmate* fere enecante. Nequeo memorabilem, quæ ibidem narratur, præterire historiam. Libera Baronissa, ut vocant, *de Kleng*, ex humido Asthmate orthopnoeica, nec ad decumbendum, respirandum, fandumque apta, mortis in limine jam sita credebatur, quandoquidem a celebratissimis Artis nostræ internis externisque præsidiis nihil tulisset opis: tandem *Weberi* consilio pulvis datus, quem *Auri fulminantis gr. VIII. Mercurii dulcis gr. III. sacchari gr. XII.* componebant, horamque postea alter, alvo soluta, ingens levamen attulit; continuatus autem, sed rarior, salutem integram reddidit, ut Auctor idem, qui illi diu noctuque adstitit, oculatus testis refert. *Vid. Tract. III. de Scarlat. a pag. 125. ad 127.*

CAPUT VIII.

De Miliaribus, & Petechiis.

*Causa exponitur cur hoc genus morborum
hic prætereatur.*

Toties de morbis istis quid censerī debeat, quid expertus ipse sim, quemque locum in Schola Medica obtineant, prioribus diversi tituli Tractatibus, aperui; ut profecto repetendis iisdem, acta agere viderer. Eoque magis, quod gravissimis nostra in Arte Viris nunc visum sit, id in se negotiū suscipere; ut, quæ protuli quondam ego, quæ urfi toties, quæ recentioribus observatis, exemplisque probavi, sua experientia propria confirment. Ita ut hujus belli dirimendi curam aliis committere tuto possim. Quæ vero no-

va

va observaverim, quæ meam de his-
ce roborare sententiam queant, malo
hæc in Caput sequens *de Febris vere*
malignis reservare, eoquod eo pro-
pius pertinere, majoremque dicendis
autoritatem conciliare, videantur.

CAPUT IX.

De Febris malignis.

§. I. *Maligna hujus anni febris in causa*
est, quod de ea agatur. Ejus Naturæ
describitur, & sæpe exanthematica est.

§. II. *Historia prima Febris Petechialis.*
Cura antiphlogistica, in aëre libero, pe-
techiae in febris cruditate disparent.

§. III. *Historia altera febris, cujus Pete-*
chiae ut prioris, antiphlogisticis in cru-
ditate disparuerunt.

§. IV. *Historiae*
aliquot priorum similes. Quæstio famo-
sa discutitur, An morbi acuti dividen-
di in eos sint, qui a condensatis, & in

illos, qui a dissolutis humoribus, gignantur? Responsio prima quæritur ab autoritate; quæ hic deesse reperitur: Secunda quæritur ab experientia; quæ illi neutiquam favet. Hac occasione examen instituitur sanguinis: quo in benigno, æque atque in maligno morbo, rite perspecto, evidens fit, nihil ad propositam Opinionem firmandam ex eo confici posse. Rationes enarrantur cur difficillimum reddatur sanguinis examen. Animadversio de Aquis cum potabilibus, tum medicatis. Et hæ, & Alimentorum diversitas, tam in corpore, quam extra illud, variare humores nostros, admistæ cum illis, possunt, debentque. Tandem experimenta capta in morbis benignis & malignis, in sanguine ægrorum, fallacem banc Opinionem, & damnosam esse, arguunt.

§. I.

Febbris malignæ, eo jam sæpius exposito malignitatis sensu, ejusdemque epidemicæ, triste sane exemplum nobis

bis hic annus 1771. dedit; quæ *Aprili* mense orsa, ac bonam *Veris Æstatis-*que partem emensa, *Autumnoque* cedere visa, hac hyeme permolli in multos denuo, popellum potissimum, sæviit. Haud enim hic mihi mens est, de illis malignis febribus agere, quas dira fames in vicinia genuit, symptomatibus longe aliis, popularitatis durabilitate, hominumque plurimorum cæde, infames: has quippe iis describundas relinquo, qui easdem propius contemplati, & animo humanitatis, Religionisque pleno, medicati sunt. Unde de iis solummodo febribus sermo erit, quas intra mœnia, suburbiæque sua *Vienna* vidit, luxitque.

Morbus unicus erat, sed varius invadendi modus: ita ut multum hi, parum illi; hi alterno die, vagis alii temporibus, febrile viderentur: ut iterum alii signa gravioris inflamma-

K 5

tionis

tionis sive faucium, sive laterum, sive pulmonis, ventrisve, præ se ferrent, alii vero minime; ut præterea plures mox oppressi violentia morbi, decumbere cogerentur, non pauci autem ad res agendas quidem debiliores, non multum tamen lecto inhærerent: ut denique plures in lectum a morbi principio prostrati, die tertio, aut quarto, aut quinto, aut seriore, Petechiis, Miliaribusve, seu albis, seu rubris, seu commistis scaterent, ac brevi perirent; alii autem decimum duodecimum, quartum decimum diem attingentes, in delirium mite, dein in delirium ferox, ac furibundum, inciderent, & aut convulsi perirent, aut non nisi post summos restituerentur labores. Major, minorve debilitas, paucioribus exceptis, stupor ac hebetudo capitis, plerosque omnes a principio ad finem usque, concomitabatur.

batu. Intercurrerunt haud pauci, quibus validæ Inflammationis five capitis, five laterum, five pulmonis, signa adesse viderentur citra vel minima in his, citra multa in illis, febris in pulsu indicia; quos nihilominus methodus inflammatoria primum, cortex peruvianus deinde datus, periculo eripuerunt. Ipsa porro natura febris, ut malignarum complurium esse consuevit, erat *Continuæ remittentis*.

Cum multis eo tempore Medicis de hoc morbo conferens, intellexi tam in Urbe, Suburbiiisque, quam in proximioribus Pagis, vim quamplurimam hominum Petechiis atque Convulsionibus perire; vel quod ægri suapte sponte, vel Muliercularum, Balneatorum, imo & quorundam Medicorum, consilio, in lecto, in calido nec renovato aëre, ponderosoque stragulo.

gulorum onere, suffocarentur; quodque *Peruviae Corticis* vel nulla, vel parrior, vel serior saltem, datio foret.

Cum incunte *Majo* consuetum meum Prædium suburbanum repetivissem, occasiones captavi adeundi cum Medicis pauperes eorum ægros, & ipsemet *Hortulani mei uxoris*, recentissime ægrotantis, curam in me suscepi. Edoctus ergo ipsa experientia factæ mihi a pluribus Medicis relationis veritatem, quam primum curavi ex Nosocomio *SS. TRIN.* tres ejusmodi ægros in Nosocomium meum practicum, publicæ demonstrationis causa, deferri.

§. II. Primus Sutor erat 24. ann., qui Variolas & Morbillos infans passus, valetudine perpetua, eaque integerrima, usus erat. Sex autem septimanis, antequam eum hæc febris invaderet, male sibi esse sentiens, venam prima vice vitæ curaverat sibi

tun-

tundi. Vena secta in febrim quotidianam incidit, principio brevi a meridie, paulatim serius invadentem, & in Nosocomio *Fratrum misericordiae* post 12. accessum profligatam. Ex illo Nosocomio ante tres abhinc septimanas egressus, lassitudinemque, atque mediocrem admodum appetitum expertus, ad laborem, dura necessitate coactus, rediit.

Die 19. *Maji*. crescente lassitudine, eique nunc Cephalalgia, Pectoris oppressione, prostrato penitus appetitu; siti, nausea, rariore alvo, vigilia, adjunctis, languidos tamen artus coegit ad laborem; donec 25. *Maji* a Magistro dmitteretur.

26. *Maji*. Post multos inanes vomendi conatus, demum vomens amara, adiit Nos. SS. *TRIN.* e quo mox ad nos gestatorio allatus est. Suscepimus itaque eum morbi die octavo cepto,

pto, celeres admodum habentem pulsus, subduros, plenosque, oppressum pectore, difficilius respirantem, capite hebetem dolentemque, sitientem, quovis appetitu carentem, artus dedolatum, tandem Petechiis per omnes artus, inque pectore, maculatum. Nihil interni, nihil externi auxilii, admotum ipsi fuerat. Pavidus homo, mortem formidans toto tempore, summam exhibuit nobis morbi cruditatem.

Ea de causa mox vena ipsi in brachio secta fuit, *Decoctum Avenæ cum Melle & Nitro* in potum datum, *Decoctumque aliud paratum ex Rad. Gram. Tarax. c toto a unc. jii. Hora coq. c aq. p. Libris. colatis IV. adde Rob. samb. Oxymell. simpl. a unc. ji. Nitri puri dr. ji. cujus uncias duas singula hora sumsit. Suris Vesicantia admovebantur, Pedibus Epispastica, & Clyfma immissum est.*

est. Inde capite ac pectore melior, bihorio vespere obdormivit, nocte autem plus quinque horis. Calor vespere 102. gr. fuit. Os amarum conquestus est.

27. *Maji*. Post quartam horam matutinam Colico dolore valido, Tenesmoque, laboranti, immixtum Clyisma est, ex *Decocto emoll.* & bona *Olei Lini* portione, compositum. Prodeunte alvo, partim liquida, partim coacta, & tenesmus siluit, & colica. Levis aderat a Vesicante stranguria. Non liber pulsus, neque admodum celer. Respiratio levius læsa. Hoc mane dormiens digitis ludebat perpetuo. Calor 102. gr. Urinæ hesternæ, nocturnæque, copiosæ, colore ferme naturales, sed omnes, quarta excepta, absque contentis.

Pulsus, atque Convulsionis principium, morbo existente crudo, venæ
se-

fectionem suadebant, mittebanturque unciae sanguinis decem, crusta, dum quievisset, carentis, bonique. Ter alvus liquida, colore fusca.. Petechiae plurima evanuerunt parte. *Corticis Peruviani Decocti*, sui que aperientis prioris, uncias duas alternatim singulis horis hodie cepit sumere, & diu prosequutus est. Et ante Corticis usum, & sub eodem, oris amaritudinem conquestus est perpetuo. Sitis mediocris. Vix læsa respiratio. Calor vespere idem, qui mane. Nox bona.

28. *Maji*. Calor mane ac vespere idem hodie, qui heri. Celerior quidem, sed liberior pulsus. Respiratio bona. Petechiarum ne umbra quidem superest. Alvus compacta una, duæ pultiformes. Urinae colore naturales, cum enæoremate suspenso. Capitis rediit dolor, pectoris oppressio, difficiliorque respiratio: quamobrem
fin-

singulo *Decocti aperientis* vasculo cochleare *oxymell. squill.* additum fuit. Cum vero ad 5. pomeridianam respiratio difficillima redderetur, licet cocta jam alvus esset, & Peruvianus Cortex daretur, diemque jam ageret morbus decimum, imminens vitæ periculum Phlebotomiam indicabat; qua unciis quinque sanguinis detractis, mox ingens rerum apparuit in meliores mutatio. Jamque appetere cepit, & poma cocta grate comedit. Nox bona.

29. *Maji.* Calor mane ac vespere 101. grad. Celerior, sed bonus pulsus, bonaque respiratio. Pure Vesicantia madent. Appetitus. Urinæ hesternarum similes. Et sic auctæ vires, ut federit horam ex lecto. Per diem modice celer pulsus, bonusque. Nox bona.

30. *Maji.* Calor mane ac vespere idem, qui heri. Moderate celer pulsus

fus, subdurus, æqualis. Bona cum libero pectore respiratio. Ab enemate alvus pauca, colore fusca. Ex lecto bis hora fuit. Urinæ quales dierum priorum. Lingua ut semper, leviter albida, non sicca. Terrifica somnia, ex Melancholia viri, mortisque continuo metu nata, dulces turbarunt, quibus eousque gavifus erat, noctes.

31. *Maji*. Calor mane ac vespere 100 gr. Celer ac subdurus pulsus. Liberum cum naturali respiratione pectus. Lingua subalbida, subsicca. Sitire se quamvis neget, bibit, ultra decocta sua, mensuras duas Aquæ Avenæ. Bis ante meridiem alvum reddidit fuscam, pultiformem, paucam tamen; post meridiem quinquies simili materie corpus lectumque conspurcavit, inscius, ut ait, bisque in excipulum: non quod id petivisset, sed quod id sup-
posi-

positum sibi esset. Minus ex lecto potuit federe, lassior, perpetuoque comatosus. Mite per diem delirium, vespere frequentius: unde cum totum hoc minime criticum in die 13., sed mere symptomaticum, appareret, Vesicans impositum Nuchæ fuit. *Un-
cia syrup. Diacodii* parum nocte dormi-
vit, deliravit.

1. Junii. Calor mane ac vespere gradu unico, quam heri, major. Pulsus ac respiratio propemodum naturales. Urina intensior colore fit, cum suspenso enæoremate. Levis tendinum subsultus. Semel nocte, semel mane, alvus liquida missa in excipulum fuit, nonies autem post meridiem in lectum: nonies dico, nam toties mutata lintheamina fuerunt, quæ supposita clunibus, ad primum perceptum foetorem renovantur, ne

L 2

in

in putrida athmosphæra diu hæreant ægri, neve exorientur.

Nuchæ, atque furarum Vesicantia optime operantur. Comate vero, interpositoque delirio, incrementa capienta capientibus, alia duo internis sunt admota femoribus. Et ob nimiam symptomatice alvum decocto aperienti suffecta *Emulsio* est, cujus *Libris duabus syrupi Diacodii, & Pap. Rhoeados, a uncia* addebatur. Frequens quidem die somnus, sed brevis. Quare nocte alia *uncia syr. Diacod. emulsi* fioni addebatur, somnus autem nihilo melior. Parum ex lecto fuit.

2. *Junii*. Mane ac vespere calor, ut heri. Pulsus paulo celerior, subdurus, æqualis. Respiratio bona. Coma. Frequentior tendinum subsultus. Urina tarde turbari cepta hodie est. Minus delirus fuit, plus dormivit. Unicam in excipulum reddidit, non pravam,

vam, alvum. Ab hora tertia pomeridiana nihil ultra deglutiit, quodque ori infundebatur, elabi sivit. Nec audire ultra, neque videre prorsum videbatur. Pauloque post conspurcavit, ac comminxit sese. Interea temporis cum pulsus, tum respiratio, propemodum naturales fuere. Injuncto Clysmate alvus flava prodiit, ac pultiformis. Sub noctem denuo nonnihil gula transmisit. Vesicantia optime. Post unciam *syrupi Diacodii* bona nox. Hæc omnia contingere morbi 15. die, nunquam critico.

3. *Junii*. Calor mane ut binis prioribus diebus. Pulsus bonus, Respiratio bona, coma leve, apta responsio, nonnulla tussis. Neque conspurcavit se hodie, neque comminxit se. Alvus flava pultiformis. Urinæ fuscæ, tarde turbatæ, manent jumentosæ. Deglutitio bona. Vespere calor 100 gr.

Continuat Corticis Decoctum & Emulsum.

4. *Junii*. Morbi 17. Calor mane ac vespere 99. grad. Pulsus præter celeritatem modicam naturalis. Respiratio bona. Fuscæ urinæ cum suspensio enæoremate. Tussis cum sputis paucis, coctis. Appetitus. Fere horam ex lecto. Bis nocte alvus pul-tem referens. Nox bona. Sputa ergo alvusque critica.

5. *Junii*. Calor mane ac vespere ut heri: Pulsus, respiratio, sputa cocta, urina cruda, sessio extra lectum ut heri. Post meridiem somnolentior, pulsuque concitatiores fuit. Vesicantia suppurant. Alvus critica. Nox bona.

6. *Junii*. Calor mane 99. gr. Pulsus subdurus, celerior hesterno. Respiratio bona. Tussis, copiosioraque sputa, bene cocta. Urina cruda. Appetitus. Minor somnolentia. Vi-

res

res valentiores, ut quater per horam voluerit in sede morari. Calor 100 gr. Nox bona.

7. Junii. Morbi 20. dies! Calor 98 gr. Pulsus & Respiratio fere naturales. Virium incrementum observatur quotidie. Alvus ut diebus præcedentibus, ita hodie diebusque frequentibus, vere critica. Urinæ vero perpetuam quandam cruditatem enæorematurum suspensione referunt. Decoctum Corticis Peruviani constanter eadem quantitate sumsit ad 24. diem morbi, inde ad 27. diem mediam partem; a 27. ad 35. quartam. Acrior nonnunquam tussis medicamenta quæ involverent, sæpe petiit. Sputa haud copiosa quidem, sed prodire tamen bona, & quotidiana. Alternò die, tertiove, postquam judicari morbus visus fuisset, Aqua laxativa *Viennensi* purgatus fuit, eo die corticem vespe-

re tantummodo fumens. A die 24. morbi quotidie exivit oratum in templum, ambulatumque. Veficantia a die morbi 8. ad 24. continuo pure manarunt, Certi de curatione eum 36. die dimisimus.

§. III. Sutor 30. annorum, qui anno ætatis septimo utroque infantum morbo, varioloso ac morbilloso, defunctus erat; qui 24. annum agens, gravem longamque Dyfenteriam passus; Cephalæa multum obnoxius, ab anni circiter elapso spatio in Tertianam febrem lapsus est, cujus tertio paroxysmo defunctus, emeticum sumfit, posteaque ter; mox ante ingruentem paroxysmum pulverem sibi ignotum deglutiit, unde a febre liber, sanus vixerat, donec elapsis abhinc tribus septimanis, itinere pedestri, diætæque errore, tussim contraxerit, pectorisque oppressionem.

Die

Die 9. Junii. Ad 8. horam matutinam adorta cum est, ipso in Templo, febris, consuetis, quæ in priore enarravi, symptomatibus: *ἡ δὲ σάκος* tamen, ut eodem, & quinque subsequenti-
bus diebus, opus suum futorium, ægre quamvis, molesteque, exercue-
rit, morbique tædium semel iterum-
que Vini haustu abigere annisus sit:
quinto vero die cum morbum auctum,
pectus angustius, prodeuntesque in
corpore Petechias perciperet, vino
abstinuit, lecto decubuit, & præter pu-
ram frigidamque aquam ad restinguen-
dam sitim; tantillumque juris carni-
um, nihil omnino sumsit. Morbi tandem
cepto 8^{vo} die, Nosocomium SS. TR.
pedes petiit, unde ad nos sella gesta-
toria delatus est.

Febris pleuroperipneumonicae
symptomata, unaque Petechias, iis,
quas prior æger habebat, rubicundio-

res, deprehendimus. Crudum die 8. morbum, cum celeri ac duro pulsu, respirationeque in latus dextrum cubanti impossibili, larga Venæ sectione aggressi sumus; sexque elapsis horis iterato. Vesicantia cruribus admovimus, pedibusque Epispastica. *Decoctum graminis* &c. ut proxime priori, & misturam, cui *Oxymel. squilliticum*, ac *stibium diaphoreticum* non ablutum inerant, & ad latus dolens cataplasma, præscripsimus. Quibus omnibus effectum id, ut ad noctem singula symptomata mitescerent, minusque ruberent Petechiæ. Calor 101 gr. Noctem Vesicantia turbarunt.

17. Junii. Calor 102. gr. Pulsus præter celeritatem bonus. Respiratio libera, in utrumque latus decumbenti facilis, liberum expeditumque pectus, & indolens caput. Appetitus renascitur. Petechiæ fere evanuerunt,

pectore excepto. Os amarum est, lingua subalbida, levis in deglutiendo labor, urinæ colore quidem naturales, sed aut sine contentis, aut cum iisdem suspensis. Ter pauca pultiformis alvus. Bis ex lecto per horam sedit. Continuat hesternæ remedia, ob tussis autem siccitatem, molestiamque, lambit sæpe eclegma obvolvens. Calor vespere 101. gr. Nocte dormivi trihorio.

18. *Junii*. Calor 102. gr. Mane se habuit ut heri, post meridiem pejus faucium dolore, tussi acriore, sputisque tenuibus, & spumosis. Mane tamen & fero horam extra lectum transegit. Calor vespere 101. gr. Paucus nocte somnus.

19. *Junii*. Cum eodem calore 101 gr. pulsum celeriores æger habuit, vagosque horrores conqueri, etiam bene in lecto tectus, cepit. Horrores

res laudabiles dies criticus, morbi quippe undecimus, sæpe habet; fedtales urina, sputaque cruda, sperabiles non faciebant. Eratque jam genius morbi popularis notus nobis. Unde alternis horis ipsi Decoctum mox descriptum, ac præterea saturatum Decoctum Cort. *peruviani* datum est, linctusque frequens. Ad noctem surditas. Calor hodie ter deprehensus est 101 gr. Pars prima noctis bona.

20. *Junii*. Calor 100 gr. Frequens pulsus est, æqualis, non durus, non debilis. Respiratio bona. Sputa tenuia. Multusque adest præ gutturis dolore screatus. Δύσκαφος, βαρυκέφαλος hoc die duodecimo, nunquam critico, inter multas crudas urinas una hypostatica est. Prodiit alvus bis cocta, semel liquida. Sitis, ac multa potatio. Διαπνοή. Vesicantia suppurant.

rant. Vespere caret dolore faucium fere omni, gargarismo usus *Aquæ bordei* & *oxymellis*, & perpetuo *syrupi Violarum* linctu. Vespere minus tenuia sputa sunt, tardiorque matutino pulsus. Vix diē, vix noctē, dormivit.

21. Junii. Calor 100 gr. Omnia ut heri in pulsu, & respiratione. Alvus quater critica, semel liquidior. Urinæ jam sanorum similes. Lassitudo. Sesquihoram ex lecto ante meridiem fuit, itidemque post meridiem. Propter vigilias *Emulsio* hodie in potum data, & *uncia syripi Diacodii* ad noctem. Die sesquihoram dormivit, & noctem fere totam.

22. Junii. Calor 100. gr. Est morbi 14. Hodie urina unica hypostatica, & quater pulsem referens alvus. Cortex excrementa quidem tingere solet, sed a longo tempore non habuimus hominem, cui adeo tincta prodierint,
ut

ut fere sanguinem colore referrent. Vix febris hodie, vix tussis. Respiratio bona admodum. Calor 99. gr. Nox bona.

23. Junii. Omnia eodem modo. Calor 99. gr.

24. Junii. Ab alvo per tres uncias *Aquæ* lax. mota, nihil non melius. Calor 99. gr. Ab uncia *syr. Diacodii* bona nox.

25. Junii. Calor 98. gr. Omnia bene. Restitutus etiam auditus est. Tota die ex lecto est. Semel adhuc 19. morbi die purgatus, Corticis consuetam dosin continuavit usque in 22. morbi diem, ab eo vero die parcius. Sanus omnino domum rediit die 24.

§. IV. Alios ægros in Nosocomio habuimus hujus epidemiæ plus minus participes, quorum cura priorum similis fuit, successitque. Unde eorundem recensione non morabor Lectores.

res. Horum tamen neminem maculatum Petechiis vidimus: quandoquidem homines iisdem, antequam a nobis recipiuntur, non picti, nunquam sibi easdem apud nos consciscunt. Unde neque a longis retro annis has, æque parum, quam Miliaria, demonstrare, cursumque illarum ostendere, potui.

Ex singulorum Aegrorum Historia confirmatur solutio cujusdam Quæstionis, quam sufficienter, pluriesque, me dedisse multi arbitrantur; & quæ nihilominus, cum in multorum animis alte irradicata sit contraria opinio, paucis his repetenda est.

Clarorum Virorum ea de Acutis Morbis sententia est, ut dividendi absolute sint in eos, aut quos genuit, aut ad quos accessit humorum spissitudo, & in illos, qui liquidorum dissolutionem sive genetricem habent, sive sociam.

Ad

Ad Classẽm priorum referunt topicas Inflammationes, ardentes, inflammatoriasque febres; iis porro curam, quam appellitare antiphlogisticam solent, admovendam esse censent. Ad posteriorem vero speciem eos referendos esse arbitrantur, qui Malignarum suo ipsorum sensu vocatarum, qui exanthematicarum, qui nervosarum febrium, nomine veniunt in postremis hisce Antiphlogisticam Methodum evacuando, attenuando, perniciosam esse, quandoquidem præ & humorum tenuitate penuriaque, & solidorum, universæque animalis Oeconomix debilitate, robur solidis conciliandum sit, humorum massæ spissitudo, & vis vitæ tota animanda.

Ut de integro hanc opinionem enervem, oportet primum Præceptorum nostrorum, tum priscorum, tum nuperorum, sententiam examinare;
me-

methodumque medendi. 2^{do} Experimenta consulere, quæ sola definire quidquam, quæ sola sancire poterunt leges agendi. 3^{tio} Ad damna animum convertere, quæ ex præjudicata opinione Medicina fert.

Ab *Hippocrate* exorſi, non reperi-
mus eum hanc admittere diviſionem
morborum. *Libri Epidemiorum*, nec non
ii *De morbis quatuor*, deque *Affecti-
onibus*, hinc morbis inflammatoriis, illinc ma-
lignis, ſcatent, in utriſque autem
methodum antiphlogiſticam laudant.
Non enim hic argumenta juvant, quæ
hic peti ſolent de Vino, deque cali-
dioribus præſidiis Artis, quibus opti-
mus ille Medicinæ Parens in Acuto-
rum cura nonnunquam uſus eſſe vi-
detur. Ea enim aut fractis poſt Cri-
ſin viribus concedebat, aut corpori-
bus per evacuationes ſymptomaticas
exhauſtis, aut diluta ſic (quemadmo-

M

dum

dum Tomo XII. a pag. 193. ad 201. ostendi,) ut diluant humores potius, solidaque molliant, quam ut aut illos condensent, aut hæc roborent. *Sylvius de le Boe*, post medium sæculi elapsi, calidioris in Acutis Medicinæ Autor, Scholam *Leidensem* seduxerat, doctrinaque sua, & scriptis, etiam post mortem, in eadem dominabatur; sic ut ea doctrina imbueretur in annis academicis suis *Hermannus Boerbaave*; at vero ille erroneam hanc doctrinam ipso praxeos expertus exercitio, & diurno nocturnoque *Hippocratis* studio, meliora edoctus, Medicinæ priscæ splendorem restituit, *Sylvianos* dispulit errores, atque practicos suos confecit *Aphorismos*, in quibus si quid verius nuperior opinio de febribus hisce malignis nervosisque haberet, huic saltem distinctioni febrium locum concedere debuisset, ut quibusnam in fe-
bri-

bribus damnanda *Sylvii* doctrina esset, & in quibusnam laudanda, ostenderet. At vero ille nihil horum. Neque Viri immortalis Commentator illustrissimus *L. B. van Swieten*, in cura febrium, hujus commentitiæ distinctionis vel hilum meminit, nisi eo sensu, quo ejus meminisse *Hippocratem* mox intelleximus. Ut profecto mirari subeat, quod quædam præclara gens medica, cujus pars magna *Boerhaavii* ab ore pependerit, famosam hanc febrium divisionem adoptaverit, utilissimasque suas ceterum lucubrationes eadem obfuscaverit. *Sydenhamum* suum attendant, calidiora in Acutis remedia, sæculo ab hinc elapso tam acriter oppugnantem, quam 60. ab hinc elapsis annis *Boerhaavius* fecerat: *Sydenhamum*, ajo, febrium cognoscendarum, curandarumque fama ita clarum, ut perhibente Archiatro Por-

tificio *Baglivo*, MEDICUS FEBRIUM apud exteras Nationes audiret. Ingens utique Medicus ille, Medicinam ad pristinam simplicitatem revocaturus, si ejusmodi distinctionem in febrium natura necessariam deprehendisset, deesse haud potuisset, quin quibusnam in febribus calidior Methodus conservanda esset, & quibusnam demenda, determinasset. At vero tantum abest, ut simile quid aut deprehenderit, aut docuerit, ut suam potius in medendo felicitatem hujus distinctionis neglectui debere videatur, non alias existere nervosas febres ratus, nisi quas *Hippocratica Schola*, quasque præclaro suo nervosi systematis studio, ipse detexerat.

Quapropter SECUNDO, anquiri oportet num experimenta, de sanguine febricitantium capta, novæ hujus distinctionis fundamenta jecerint: quæ

si jecerint, admittenda omnino erit; sin vero minus, abjicienda.

Historia sanguinis humani intricatissima, ingenium exercuit nobilium Virorum Boilei, *Leeuwenhoekii*, *Ruischii*, *Guillielmini*, *Freindii*, *Papii*, *Schwenckii*, *Halleri*, plurimumque Chemicorum. Chemia, siquidem in furnis suis, perque suas & admistiones, & separationes, naturam humorum invertat, principiaque prorsum alia, quibus nostri forsan carent humores, ex iisdem creare videatur, audienda hac in parte nobis non est; naturæ humorum, prout in vasis nostris circumaguntur, proximove saltem illi in statu, unice curiosis. Hunc in finem sanguis, serum, lymp̃ha, eo nobis modo examinanda sunt, quo de Vena tunsa, de Arteria aperta, de faucibus in vulnere vasis, de cameris & loculamentis, in quibus effusa col-

lectaque hæc liquida fuerint, aut sponte, aut arte, apertis prodire soleant.

Experimenta hujus generis longe plura, quam forte quisquam laudatorum Virorum, cepi. In *primo Tomo Rat. Med.* cursim ea cum publico communicavi, quæ in 150. hominum sanguine confeceram. Tomo tertio plura depromsi. Veritus autem ut, quod in Phycis heu nimis! ejusdem experimenti idem semper sequeretur effectus, triennio postmodum, iterumque elapsis postmodum annis octo, partim eadem, partim longe plura, institui; mirabundus autem obstupescensque tandem vidi, licet multorum idem sequeretur effectus, tamen plura repeti, quæ iisdem legibus, ordine, cautela, iterata, tantam sæpe varietatem, tantam contrarietatem, tantum phænomenorum aut defectum, aut augmentum exhiberent, ut demum apud animum statue-

statuerim, me multo facilius quid vitales nostri humores non sint, quam quid sint, determinare posse; ut præterea inde conficere debuerim proprietates ignotas, &, ut arbitror nunquam naturæ de sinu eruendas, humorum in corpore circumlatorum qualitates esse, quæ efficiant, ut experimentorum tam dispar crebro effectus sit: ut TERTIO concluderim Atmosphæaræ naturam, quo tempore humores humani corporis in vasa excipiuntur, gravitate & levitate, humiditate ac siccitate, frigore atque calore, peregrinarum demum exhalationum nunc nulla, nunc parciore, nunc liberaliore admistione, sæpius posse ac debere enarratorum experimentorum miram gignere portentosamque varietatem. Ut QUARTO constet per hæc omnia Evaporationem auræ, quæ quo patentiore in vase exceptus

sanguis fuit, eo copiosior est; quæque in vasis ejusdem capacitatis tanta inconstantia est, ut a libra sanguinis in his decimam, in illis duodecimam, in aliis decimam quartam, & majorem totius liquidi partem æquet; quæ tandem in *eadem Venæ sectione* in ejusdem diametri vasis, ad eandem altitudinem expletis, copia differt: quemadmodum iteratissimis exemplis, mensura & bilance exactissimis, didici. UT QUINTO id adhuc addere debeam, liquores, quibus laticis nostri vitalis naturam exploramus, Aquam, Lac, Spiritus sive simplices, sive particulis Regni dicti animalis, fossilis, ac vegetabilis, imprægnatos; succos expressos Vegetabilium, Insectorum, aliorumve animalium; salium quorumcumque lixivium; novitate ac vetustate, saturitate & vacuitate, accuratiore negligentioreve seu confectiione,

etione, seu conservatione, sic differre posse, ut experimenta eadem, alio atque alio tempore, differant immensum, & contraria clament.

In hac sententia me numerosa experimenta, alium in finem capta, confirmarunt. Potabiles aquas varias diverforum locorum, fontiumque, exploravi multoties; Nosocomii civici, R.R. P.P. Capucinorum, Celsissimi Principis de Schwarzenberg, R.R. PP. Benedictinorum, quos *Scotos* vocant; Aquam Palatiorum, Oratorum, Legatorumque multorum; Variorum fontium Pagi amœnissimi *Hideldorff*, in quo olim æstatem transegi; aquam montis Austriaci altissimi, quem ob æternas nives *den Schneeberg* vocant, cujusque aquam Aula, Civitatisque Primores, afferri sibi in potum curant; Aquam *Favorianam*, alias *favorinam*, *piperinamve* appellatam, quæ nobis

Fabaria, territorio Monasterii Benedi-
ctini ordinis, adfertur; Aquam Noceria-
nam, quæ Nocera, urbe Ducatus Spo-
leti, in statu Ecclesiastico siti, in varias
Europæ regiones transvehitur, &c.
Has, inquam, aquas per varios an-
nos exploravi, cum Oleo tartari per
deliquium, cum Tinctura Lunæ, cum
Mercurii sublimati in spiritu nitri solutione,
cum solutione Plumbi, sive in Aceto, sive
in Acido spiritus nitri facta: at vero incre-
dibile est, quanta experimentorum alio
anno, alio anni tempore, petitorum,
diligenterque quo instituebantur tem-
poris momento, conscriptorum, discre-
pantia daretur. Quin ipse Scheuzerus
fontem fabariensem ipsa in origine ejus-
modi tincturis & solutionibus tentans,
nullam quidem deprehendit aut præci-
pitationem, aut mutationem saltem non
alico: diu enim commorari in Antro horrido,
simul & squallido, non licuit. (Itin. alp.
se-

secundo pag. 85. & seq.) Verum postea narrat J. F. Vicarium hasce aquas uno tempore præcipitabiles, alio non item, deprehendisse. (*Hydrophylac. pag. 87.*) Ego duplo puriorem, impurioremve, alio atque alio tempore eandem deprehendi, ut & reliquas aquas omnes, ne exceptis quidem *Nocerianis*, vel *Schneebergianis*. * Quid quod ne ipsæ quidem destillatæ officinarum Aquæ vim experimentorum nostrorum, sinceritatis defectu, constanter sustinuerunt?

Re-

* *Aqua Schneebergica* ceterum optimarum aquarum est, & se patitur in longinquiora deferri illibatam. Anno 1760. cum *Parmæ* essem, Aquæ *Nocerianæ* copia parabatur, qua qua in itinere, *Parma Viennam* suscipiendo, uteretur *Regia Infans*: respondente me, cum in sinem nobis *Schneebergianam* adesse, *Parmensis Archiater Ponticelli*, Vir doctrina & pietate clarus, & ceteri Medicis aulici, hanc experimentis tentarunt, decreveruntque *Noceriana* aqua opus non esse, quibus *Schneebergica* adesset, ut quæ puritate ad illam quam proximo accederet. In meis experimentis nonnunquam puritate inter sese certare ambæ

Regeret quis forsitan mihi Mercatorum, Chemistarum, Pharmacopæorum astutia, & fraude, complures Spiritus & Aquas adulteratas vendi; nec non ipsas fontium aquas seu majore aut siccitate, aut humiditate tempestatis, seu etiam transvectione, sæpe mutari; hincque non raro fallere experimenta debere, quæ iisdem rebus sinceris, illibatisque, forsan non fallerent. Neque repugno ego: sed non minore jure inde videor conficere posse, dum ad explorandam humorum nostrorum naturam has ipsas res fraudibus, infortuniisve nec detectis, nec detegendis, adhibemus, in-

vise sunt, nonnunquam nostra superabat. sinceritate Italicam. Inter communes Urbis aquas ea Palatii Celsi. Princ. de Schwarzenberg inter minus impuras esse mea tentamina, iterata docuerunt. Fontis R.R. P.P. Capucinatorum & Nosocomii Civici, Schwanzenburgiano contermini, puritate illi multum cedunt.

incertum variumque frequenter esse oportere experimentorum eventum.

An denique ipsæ hæ potæ ab homine aquæ, variæ, oppositæque naturæ alimenta, ac potulenta, quibus ante morbum usi sunt ægri; an varia virtus chylopoietica, & hæmatopoietica viscerum, diversitatem humorum incredibilem sæpe exhibere non debeat? Cur in sanis, qui tempore Majali ex mera consuetudine feriri sibi venam curent, tam diversa contrariaque sæpe natura cruoris?

Quid ergo de eo experimento censendum est, quod in morbis inflammatoriis, & calidis, evincere dicitur sanguinem & copiosum esse, & spissum, & denso, inflammationis lardo passim tectum? In morbis febrilibus nervosis autem, inque vocatis ita malignis, parciores copias esse cruorem, sæpe æjiciemem, tenuem præterea, ac dissolutum?

Hoc

Hoc porro non potest nisi misso de vena cruore cognosci. Cupidus harum rerum, in mea 37. annorum praxeos exercitio, inque Academicis 18. annorum demonstrationibus, nihil unquam incertius deprehendi, nihil aut mutabilius, aut fallacius. Centies viderunt mei Auditores sanguinem malignis in morbis spissum, ingenti-que corio tectum: ita quidem ut in febre cum pulsu debilitatem simulante, cum urina sive naturali, sive foetida, cum extantibus aut Petechiis, aut Scarlatina pessima, aut Morbillis, Variolisque pravi moris, sanguinem conspexerint vel crusta tectum ingenti, vel in rubra parte vix cultro percindendum, vel etiam omnibus bonum notis; idque adhuc paucissimis ante mortem horis: & e contrario in Acutis inflammatoriis, in quibus rubram partem densum corium sæpius con-

contegit, haud raro tamen aut compactum sanguinem sine crusta conspexerunt, aut æque in crassamine, quam in tegmine, dissolutum; aut massam rubram, vix formantem insulam; longe autem adhuc crebrius in priore vase concretum, in altero solutum, in tertio crusta alba vix scissili tectum, in quarto solutum; idque iterum mutato in alia phlebotome singulorum ordine; absque nulla regula aut dissoluti sanguinis, aut compacti, aut inflammati, ad primum ultimumve jactus impetum, aut ad jactus celeritatem, tarditatemve, ad majorem minoremve aperturam, seu lumen, ut vocant, sed inverso sæpe ordine, tempore, modoque.

Rogabit forsan quis: si per omnem morbum decies pluriesque missus cruor, & crassus perpetuo, & inflammata pelle tectus esset; & ex adverso,

si

si in alius morbi decursu toto sanguis etiam pluries effluens, vix cohæreret, crustaque careret; nunquid erraret is, qui in posterioris corpore dissolutos, in prioris spissos autumaret, inflammatosque esse humores? An ad hanc sententiam internæ Medicinæ externæque præsidia illi admovens, non recta incederet, tutoque mederetur?

Respondeo 1^{mo} a causis quinque paulo altius pag. 182. expositis, patuit non exhibere solere, imo ne exhibere quidem posse sanguinem vase exceptum sive similes, sive omnes, quas pleno in corporis rivo habet, dotes ac proprietates. In vivis animalibus experimentum urgens, vidi protinus mutari aperto corde, majorive arteria, sanguinem, ab exhalatione subtilioris auræ, ab aëris admistione, ab heterogeneis in aëre volitantibus, ab
athmo-

sphæræ frigore, a vasorum convulsione.

Resp. 2^{do} in multis admodum ægris uno die sanguinem prodire dissolutum, alio die concretum, adeoque eum, qui juxta oppositissimam hanc sanguinis conditionem indicationem formaret, oportere alio, atque alio die, medendi methodo, e diametro opposita, aggredi morbum: & quia hæc alternatio intra unum, imo intra medium diem observatur, ut multis nobis exemplis constitit, oportere bis ter in die pugnancia dari.

Resp. 3^{tio} Argumenti vanitatem ex eo potissimum apparere, quod adversæ omnino sanguinis dotes in eadem phlebotomia diversis in vasis exhibeantur sæpe nobis. Unde siquid valeret hæc opinio, necesse foret adversæ naturæ remedia ægris mixtim præbere, ut una & compingerent cruorem, & dissolverent.

N

Resp.

Resp. 4^{to} In febribus putridissimis, in quarum his Miliaria, illis Petechiæ, aliis iterum Variolæ prodierant, sanguinem nobis olim frequenter visum esse aut condensatum duntaxat, aut & crasso corio tectum: idque æque in paucioribus, qui tandem obirent, atque in illis, quibus rediret postmodum salus.

Sic sponte devolvimur ad tertiam considerationem de damno, quod hæc opinio inferat in ægrotantes. Theoria nos hic juvat, deinde Praxis, seu potius rerum eventus. Theoretice enim facile capimus, si sanguis evacuandus sit, nec evacuetur; si attenuandi diluendique humores sint, & e contrario densentur; si qui moderandus fuisset, nunc incitetur motus; oportere ut multi, alias fervandi, infortunato pereant, neque eorum ferventur alii, nisi iis pares, quos *Hippo-*
po.

pocrates invenerat naturæ esse adeo valentis, ut morbum pravam non modo superent, sed etiam prave medicantem. Præfice autem rem contemplati, volentes nolentesque fateamur oportet a morbis malignis, hoc principio tractatis, plurimos ceterum servandos, diem obiisse, ipsamque huius testem Pestem esse; cuius asserti veritatem superiore anno, in altera XIV. Tomi parte, petitis ab autoritate argumentis, invicte, ni fallor, demonstravi, pluribusque sequenti Capite demonstrabo: ad quod porro ordine rerum nunc ducimur.

CAPUT X.

De Febre Pestilentiali.

S. I. *Rejicitur divisio in Pestem, & Febrem Pestilentialem, quod & inutilis sit, &*

N 2

super.

superflua, & simul damnosa. §. II. Necessitas hisce temporibus hanc materiem repetendi, tum quod apud alios ignis, facile communicabilis, ardeat; tum quod consuetus pestem tractandi modus appareat defectuosus in multis esse. §. III. Morbi maligni quid contagiosi habentes, licet ceteris pestis signis necdum sociati, si ea cautela tractarentur, qua ipsa Pestis, nunquam hæc, sub illorum larva, popularetur civitatem. Animadversio ampla in Lazareta, seu Nosodochia publica, quod eo, quo instrui modo solent, contagia, mortesque, vehementer augeant. Lex divina consulitur super contagio. §. IV. Consilium, quo sisti, præcaverive contagium posset, si multos homines epidemica febris invasisset, quorum cohabitatio, mutæque Athmosphære communicatio, aut facere contagium, aut multiplicare posset. Sententia in Lazaretorum laudem refutatur, ex pathetica eorundem descriptione, a veracibus Autoribus petita. §. V. Si admitti tamen debere illa quis censeret, oporteret talem eorundem cum constructionem, tum
dire-

directionem esse, ut ægris curandis, non lædendis; contagio minuendo, non augendo; conducere. Modus quo id sperabile fieret, proponitur. Hic modus Erarii profusionem primo contuitu facere visus, vere Oeconomicus mox ita adparet, ut omnium maxime Fisco consulat. Præcipue autem in Peste, maximeque in his Nosodochiis, Antiphlogistica Methodus, largaque non minus, quam frequens, Missio sanguinis necessaria est. Discussio hac occasione fit de vera, ac simulata, Acutorum debilitate. Laus Cottenii, & Trilleri. Larga, ac repetita Venæ sectio, in debilitate Pestis ostenditur inevitabilis necessitatis esse, ex Platero, Sydenhamo, Riverio, Botallo &c. Fortis objectio contra hanc doctrinam. Responsio ad eandem invictè demonstrat, ex bene intellectis cum Antiquissimorum, tum subsequenter cujusque ævi Scriptorum, monumentis, Missionem sanguinis & profusam, & repetitam, in Pestis debilitate laudatam summo opere, perpetuoque fuisse; nec Scholarum opinionem de non, aut vix non.

*facienda Venæ sectione, nisi ex male-intellecta Veterum, Recentiorumque sententia, originem duxisse. Recensio Pestis Smyrnenfis sententiam nostram confir-
mans.*

§. I

Pestem Tomo proxime priore ex potiore parte Bibliothecæ Medicæ descripsi; passim difficilem cognitu suo in exordio esse, ex illa ostendi, ejusque in cura multa, eaque præcipua, desiderari; desiderata hæc suppleri posse, curamque vulgari certioremtutio-remque dari, ab antiquissimis temporibus, in nostros dies usque, autoritate irrefragabili, atque indubitatis experientis demonstrasse me arbitror. In Autorum numerosorum sententiis referendis constitit, Pestilentialem febrem distingui ab ipsa Peste a multis, ab aliis vero utramque confundi. Negare nequeo eorum plausibilia argumenta esse, qui distin-
guen-

guendas has a se mutuo esse censuerint. In Peste quippe nulla febris signa haud raro adverti, idque aut per totum morbi decursum, aut per notabile ejus spatium: quæ ergo & citra febrim oriri, progredique, & cum febre ingruere, atque perseverare possit, unam eandemque rem non videri: adeoque cum pestis adsit utrisque, & non febris; alteram *pestis*, alteram *febris pestilentialis* nomine, esse appellandam.

At vero distinctionem hanc & inutilem esse, & damnosam, gravissimis Medicis visum fuit. Sapientibus quippe inutilem, imo detrimentosam semper haberi *entium*, citra necessitatem, multiplicationem, eoquod memoriam absque necessitate oneret, artem turbet, semelque admissa in causa sit, ut alios morbos complures æque noxie, quam inutiliter, a se mutuo

sejungere debeamus. Variolæ quippe, Morbilli, Scarlatina, quemadmodum valida febre frequentius sociantur, sic haud raro vel exilem, vel nullam omnino, comitem febrem habent. Igiturne Variolas ob eandem causam in *Febrim Variolosam*, & in *Variolas*, non Sydenhami, sed horum Scriptorum sensu, dispesci oportet? Inducet certe nos in tædiosas Vocabulorum multiplicationes. Sed cum ipsa hæc divisio toties in causa fuerit, ut vera Pestis longe lateque popularetur, antequam munitionibus sepiretur, quemadmodum præteriti anni dissertatione tot exemplis ostendi, videtur famosa hæc distinctio rejicienda esse. Quapropter de *Febre pestilentiali* acturus, una de *Peste* agam. Id autem quo debito modo præstem, ἀνακεφαλáωσι præmittam observationum quarundam, quas mihi morbi centies a me tra-

tractati suggererunt: has ad Morbum pestilentem, quem non ego, sed alii, frequentem viderunt, & a quibus ejus descriptionem mutuatus sum, accommodabo.

§. II. Profecto tempora calamitosa, quæ impendunt cervicibus nostris, eo me adigunt, ut id omne, quod ad Pestis cognitionem, curationemque, facere vel minimum possit, aperte proponam. Haud ita pridem *Russicæ Metropolis*, dira lue horrende infecta, *Borealibus* populis hanc minabatur, hique iterum, commercii causa, universæ *Europæ*. Adventans hyems suppressisse vim ejus videtur; sed mitior cum ibidem, æque quam hic, hyems fuerit, eandem extinxisse nondum credi potest; neque id *Petropoli* credi, severæ ad eandem arcendam leges innuunt. Commercium fatale *Russorum* cum *Thracibus*, pestilentiosa annuatim gente, cap-

N 5 ptarum

ptarum eorundem Arcium, Urbiumque, præfidiaria mora, aliæque occasiones, quas inevitabiles triste hoc bellum reddit, Pesti profecto metum augent. Ut eam a nobis averruncet DEUS, vota humillima omnium diu noctuque illius aures circumsonant; at vero hinc ejus judicia, *quæ abyssus multa*, ignorantes, illinc infectionis facilitatem agnoscentes, an nostram, qualiscumque demum sit, industriam, an omnem animi sollicitudinem, an improbum quemcumque laborem, graviori atque urgentiori negotio admoveere unquam poterimus? Ubicumque morbus sævit, sternit mortalium ingentem vim, populatur urbes, populosasque Regiones in mendicitatem solitudinemque convertit. Quod vero maxime formidandum, ignota subit, ignota sævit, nec sæpe cognoscitur, nisi depopulata civitatem. Annon Polo-

narum

arum atque *Russicarum* Civitatum hinc vastitas nata, metusque interitus? Et an periculum in alios minus impendit, qui ficta malignos inter, pestilentialesque morbos distinctione, indigne de morbi natura altercantur, atque aut ignorantia, aut astutia, aut Magnatum verecundia, lucrive amore, pestem negantes, maligni morbi vocabulo turpiter abutuntur, donec vastificum malum diruerit urbem? Ingensque infectorum strages, quos inveterato præjudicio innixa Methodus medendi, uti neque Patrum nostrorum memoria, ita neque postremis hisce temporibus, fervare a morte potuit, an nos non adigit, non compellit, non urget, ut quam (me id anno proxime priore ostendente) *Hippocrates* tradidit, quam *Galenus* & *Oribasius* laudarunt, quam *Mediolanensem* *Septalius*, Gallorum *Botallus* & *Rive*.

Riverius, in coelum extulerunt, Anglorumque *Sydenhamus*, suis cum numerosis, tum fortunatis experimentis confirmavit; ut, inquam, hanc tam certam, tamque tutam esse probemus, ut complexis eam Medicis, Lues brevius parciusque vastet? Igitur quos DEI caritas, quos Patriæ amor, quos proximum, se, suosque servandi, studium, explet, his volupe fore arbitror, si, quæ de Peste nuper differueram, paulo enucleatius, quibusdam saltem in articulis, tradidero.

§. III. Versabatur igitur prior in eo sermo, quod Pestis definitio, ejusque proinde cognitio, talis non esset hucusque tradita, ut quandiu rarior adhuc est, inchoansque duntaxat, Pestifera, an Malignus morbus esset, certo definiretur. Constabatque hanc ambiguitatem in causa esse, ut Medici variis de causis mitiorem sententiam

am-

amplexi, eam præsentem, nisi bonam urbis partem prius populata sit, fateantur: qui tamen si ad illam, dubiosam in principio, averruncandam, omnem animi sollicitudinem adhibuissent, hanc non doluissent vastitatem. Hæc paucis elucidare confert, ne dubia in re periclitemur quidquam.

Ac primo quidem, si omni ex parte constiterit serius, ocysusve, cuncta Animalia mori, quæ in aëre aut non renovato, aut propriis expiratis inquinato, diutius detinentur, quemadmodum per experimenta Sgravesandi, Musschenbroeckii, Boerhaavii, Boilei, Halesii, aliorumque, Tomo XIII. Cap. I. evici; si ex iisdem experimentis, nec non ex similibus in homine demonstratis, observatum sit, quemcunque morbum acutum facilius, tutiusque, in aëre libero, quam in eodem aut coacto, aut immutato, aut

im-

impuris aliorum ægrorum exhalationibus infecto, curari; si nota res sit Malignum morbum acutum, vix contagiosum, talem nihilominus reddi in descripta Athmosphæra, eoque magis, quo plures una decumbant; si denique evictum fuerit Malignorum morborum cum malitiam, tum infectionem, quæ non minus assistentibus, quam ægrotantibus, damnosa, certissime, tutissimeque, per aëra liberum renovatumque, aut minui notabiliter, aut penitus sisti; consequitur necessario inde id, ut oborta de ambiguo morbo quæstione, Pestifne, an Malignus morbus sit, is eodem modo tractari debeat, quo morbos, natura malignos, malignitatem, atque inficiendi vim deponere, per superiora nostra constitit.

Secundo. Dubia de morbi natura, litesque de eadem natæ, desinent detrimentum.

trimentosæ Reipublicæ esse, si Medici ejus, quo de dixi, convicti, Malignum morbum sic tractent, ac si Pestem, si adesset, tractaturi fuissent.

Tertio. Si in morbo acuto maligno, unaque plus minus contagioso, commercium noceret mercium, hominumque; neque interea propter deficientes Bubones, Anthraces, aliave signa, Pestis veræ caracteribus morbus innotesceret; commercium hoc arte ea, qua in nota Peste, suspendendum esset.

Quarto. Sed hic ad ea attendendum est, quæ N^o primo dicta sunt. Febres acutas, minime malignas, aër non renovatus, aër plurium ægrorum similium exhalatione infectus, vere malignas reddit: Febres acutas malignas ex parum contagiosis in valde contagiosas mutat: Contagiosus morbus in ejusmodi Athmosphæra contagium

gium multiplicat sic, ut, etsi vera Pestis vocandus non sit, haud multis tamen parasangis distet ab ea: ipsa denique sive agnita cunctis, sive pluribus negata, vera tamen Pestis, contagium incredibiliter auget, per observata *Tomi XIV. cap. IV. pag. 313. & seq.*

Hinc sive in Peste, sive in quocunque alio maligno morbo, nocentius nihil aut ægris, aut Reipublicæ erit, ejusmodi ægrorum sive intra proprios Lares, sive in dictis barbære *Lazaretis*, inclusione. Et quidem ægris; quia eorum quisque cum propria, tum una decumbentium, atmosphæra inquinatus, si non moriatur, summo saltem exponitur vitæ discrimini: *Reipublicæ* vero; quia harum ædium aër multiplicato miasmate inquinatur sic, ut qui hos miseros necessario convenire, saltem eminus, de-

debent, Medici, Chirurgi, Pharmacopæi, Sacerdotes, Altiores, confertissimum contagium hauriant, vestibusque colligant, & vel ipsi hinc infecti moriantur, quemadmodum in variarum Pestium historia Medicorum, Confessariorum &c. exempla crebro monstrarunt; vel sua contagione quotquot convenerint ædes, hominesque, inficiant, universamque tandem contaminent urbem.

Num Lex divina facem hic nobis non præbet? Leprosos, ob idque contagiosos, profecto non in ædibus sive privatis, sive communibus, ne ab aliis serperet in alios lues, concludi, verum *extra Castra Summus* LEGISLATOR, physicarum causarum omnium Cognitor perfectissimus, solusque Autor, relegavit: Sacerdotibus autem in mandatis dedit Leprosorum ut ædes mundarent, mundabiles si forent,

sin minus, diruerent. *Libr. Lev. cap. 13.* Nec autemet quis hoc ad tempus duntaxat sic a DEO institutum fuisse, quandoquidem communes excipiundis Leprosis ædes construere, mutabilis quadraginta annorum Castrametatio vetuerat; nam hanc opinionem Leprosi Evangelici subvertunt, BENIGNISSIMUM NOSTRUM SERVATOREM itinerantem misericordiam precati.

§. IV. Argumentum hoc, diceret forte quis, videtur suadere, ut contagiosi omnes suis de ædibus in prata, suburbanosque locos, pellantur, & ibidem aut moriantur si non sanescant, aut morentur, donec reconvaluerint.

Id equidem inde sequi minime censeo, sed hoc duntaxat: si infectorum hominum siue privatis, siue publicis in ædibus, inclusio Contagio præpediendo conforet, illam a DEO præcipien-

piendam suo populo fuisse: quod autem jussu contrarium, signum esse videri ejus, quod inde in sanam plebem incidisset, detrimenti.

Quid ergo consilii hic? Suppediat hoc Variolarum naturalium, insularumque, tractatio. Variolosos quondam in propria sua Athmosphæra fere suffocabant tum Plebs, tum omnis Medicorum turba: athmosphæra cum Aedii, tum Conclavis, & Lecti, mutata, perpetuoque renovata, Variolosorum plerosque Medici servant. Acutorum morborum, malignorumque historia usum emolumentumque aëris fereni, aliorumque exhalatione non inquinati, docuit manifesto. Contagium hac libertate multiplicari quicquid censet, is minime advertit quam facile in spatiosam auram tantillum contagium, ne eo accedentibus periculum inferat, evanescat: quamque ex

adverso periculum crescat a condensata collecti copiosi miasmatis mole.

Quid igitur si una domo plures morbo cubant eodem? Januæ fenestræque, ut *Tomo XIII. Cap. I.* exempla docuere, prudenter apertæ, quo aër liber ædibus admitti recens, fugarique vetus possit; Lecti, quoad ejus fieri possit, remotiores; ægrorumque per diversa cubicula, si adsint, distributio, potenter labefactabunt contagium. Si enim quid majoris contagionis a pluribus, quam ab unico ægrotante, verendum est; utique ejus minus verebimur, quando ne colligatur, condenseturque, præcautum fuerit.

Quid tandem aucto contagio faciendum, dum 10000. 20000. hominum contagioso morbo afficiuntur? An saltem tunc conduci illos in *Lazareta* non oportet; cum in plebeculæ
tugu-

tuguriis nequeant multi locari, nisi eo, quem toties damnavi, modo, in unum coacti? Si enim *Lazareta* non prostarent, plebs egena, peregrinaque, strata in plateis inveniretur, multaque periret, eo quod temporis lapsu in Diverforia, Hospitibus, eorumque famulis paulatim extinctis, suscipi, ali, curarique non possent. Civium etiam haud pauci defectu alimentum, ac corporis, animique auxilii, misere perirent, extinctis his, qui hæc subministrarent.

Ad hoc ut respondeatur, *Lazaretorum* conditio, & modus, examinentur oportet. Publica sunt, vastaque admodum ædificia, in quibus centena plura, milliaque ægrotantium, una locantur, plurimum illis famulitium adest, gensque præterea haud pauca Ecclesiastica, Medica, Chirurgica, Pharmaceutica. Quantæcum-

que amplitudinis hæc ædificia sunt: numerosioribus intrusis quotidie ægris, arctiora demum inveniuntur, quam ut commode locent omnes: unde eos arctius jungi oportet, recentesque ægros admitti ultra non licet, nisi in quantum mors truculenta evacuet diem aut Lectos, aut Lectorum penuria straminum acervos.

Quicumque hæc serio reputat fecum, an non athmosphæram horrebit, millenorum pestiferorum coagmentato veneno gravidam? annon a præjudicata opinione de aëris, apud Pestilentiosos ventilati, damnis, intolerabilem? annon recens illatos rapidissima vehementia venenantem? eosque qui novos ægros, ut in Lazaretum fuscipiantur, vel eminus ad sola vestibula conduxerunt, vehementer temerantem, ac toxico inficientem? Mirabiturne idem, dum, quod
pror-

prorsum inevitabile est, horum ædificiorum januæ panduntur, coacervatumque miasma cum minus infecto aëre communicatur, & in vicinia augeri, & tota in urbe pestem? Civesque in id deputatos, ut per intima eorum penetralia visitent, & num debita ordinataque rerum administratio sit, examinent, venenari, totamque incendere civitatem contagio? Cumulusne calamitatum non adest, dum ad universi famulitii interitum, quod in *una* peste *pluries* contigisse constat, cadavera pluribus diebus inhumata jacent, sicque incredibiliter contagium augment aëris, ædium, hominumque? Quis demum mirabitur ultra horum Nosodochiorum Necrologia? Quis terroris panici inculcabit gnaram horum plebem, quod pejus inferno has ædes horreat? Et quis ob id non videt urbis pestilitatem augeri

debere, ubi infima plebs, Civium scilicet pars maxima, ipsique minoris ordinis Cives, hæc *Nosodochia* veriti, suffocent primordia morbi, quærelam suppressant omnem, donec opportuni auxilii neglectu demum ægrotent insanabiliter? Quid si, Senatu jubente, quicumque civium pestis suspitione laborat, confestim a cara conjuge, proleque beata, violente sejungitur, & in hæc *Receptacula* lethi, suos nunquam revisurus, conjicitur? Profecto si inter omnia, quæ hanc publicam calamitatem exasperare solent, *Loimologici* nihil nocentius toedio ac moerore uno omnes ore meminerunt, spem vix ullam de eorundem salute in venenatis his latibulis concipiemus. Quod si ea animi sententia iis est, qui huic miserandæ plebi ministrant, a Baccho præcipuam præservationem Pestis esse petendam, quemadmodum

dum eam multorum sententiam fuisse, hosque vino assiduo maduiffe, multiplex sane in historia pestilenti testimonium est, facile quisque per se perspicit quanta ab his ministris sufferre debeat illa pæne desperata multitudo; quot errores in commutandis auxiliis, ita ut quod alteri dandum fuisset, datur alteri; iniquam ejusdem dosin; Medicamenti, Alimentique præbendi negligentia; vultum horum torvum, illorum comicum; ineptas reprehensiones; asperas objurgationes; mutuas altercationes; diras imprecationes; & quæ hisce pejora Vinum parit.

Qui Loimographos perlegit, *Muratorium*, *Hecquetum*, *Gorbaitium*, aliosque complures, nihil me hic exaggerasse, nihil protulisse a vero alienum, sed quod res est, candide notasse, ultro fatebitur. Oportebat autem

hæc ex iisdem semel proferre in apri-
cum, ut commoda & incommoda re-
rum ex æquo cuique paterent.

§. V. Jam multos mihi videre vi-
deor, qui serio me rogent num hisce
Nosodochiis tempore pestis Rempu-
blicam carere posse autumem? Et,
An non ea absoluta horum necessitas
ex tota Historia pateat, ut Senatores,
ut Medici, ut Cives ipsi, nihil acer-
bius, quam eorum raritatem, lamen-
tarentur? Nonne *Viennensis Senatus*,
cum *Facultate Medica*, anno 1679. om-
nem lapidem movit, ut præter Noso-
dochium consuetum, in *Via Regia*
(*Landstrasse*) alterum; in loco quem
Laimgruben vocant, tertium; quar-
tum ad *S. Udalricum*, construerentur?
Profecto egenæ plebs medicinæ, vi-
ctusque inopia, suis in tuguriis peribit,
eo quod demum deficere! soleant hi,
qui medeantur, qui alant. Cadave-

ra non inhumata putredine indelebili
aëra inficient, ubi lue adulta, omnis
deficiet pollinctura. Verbo, Noso-
dochio agminatim excipiente pestife-
ros, horum in urbe raritas pestem mi-
nuit, occasionem sanos inficiendi tol-
lit, aërisque revocat serenitatem: sin-
secus, increbescit Pestilentiosorum
multitudo sic, ut vix, qui maneant
intacti, invenias, ut trahat lues mo-
ras, neque hyemi quidem, quod
alias sæpe solet, cedere noscat.

Hæc ipsa incommoda & commo-
da Nosodochiorum, qua late patent,
candide utrinque prolata, aliquam
responsionem ad quæstionem, difficul-
ter solvendam, suppeditabunt.

Ac primo quidem, quæ horum
emolumenta sint, evicimus dudum &
minora, paucioraque jactatis existere,
& pestis efficere incredibile augmen-
tum. Cui bono milleni dispersi per-
ur-

urbem, ex ea in Nosodochium pellantur, si aërem venenatiorem reddant inibi acervales? Quid profuerit illis, ne omnium penuria rerum pereant in urbe, ea in loca intrusos fuisse, in quibus horrendo incolarum afflatu multo tetrius afficiantur? In quibus major multitudo locatur, quam ut debita singulorum cura sit? In quibus toties & auxiliariæ manus inopia, & inclementia, crudelitate, insolentia, importunitate, ebrietateque Ministrorum, numerosi intereunt? Quid boni a gentis pestiferæ expulsiōe augurabere civitati, si expulsiōum agmina in Nosodochio Athmosphæram longe venenatiorem parent Civitati? Et si qua Diariis, atque Necrologiis fides, an Civium frequentia conservandæ augendæque favebunt longe numerosiores perpetuo mortes in his Nosodochiis, quam extra eadem? Quod

Quod vero Pestem coarctare ac brevare hæc loca ferantur, deficientibus, quæ id probent exemplis, gratis asseritur. Nunquid *Thraces* minus nobis, adventante hyeme, fenescentem Pestem vident? statuta plerumque lege eam, sive *Nosodochia* populus habeat, sive non habeat, æstas parit, ver fugat. Hoc ipso anno 1771. *Smyrnam* depopulata Pestis est, citraque *Nosodochiorum* opem cessit Autumno. * *Turcarum* Negligentia, in numerandis mortuis suis, ea nos occasione privat, ut, pluresne an pauciores mortes ii absque cautelis, quam nos cum nostris, numerare soleant? quæ *Christiani* apud illos notarunt, arguunt se in suo *Nosocomio* ordinatissimo plures mortuos a Peste habuisse, quam domesticatim *Turcæ*. Vide *Algerinum* exemplum *Rat. Med. Tom. XIV. pag. 317.* Se-

* Cæteræ quidem nationes ibi *Nosoc.* habent, non vero *Turcæ*, qui longe maxima civium pars sunt.

Secundo. Hisce eum in modum consideratis, non videtur Nosodochiorum constructio ea Reipublicæ commoda præbere, quæ vulgo creduntur; quin eidem potius detrimentum afferre.

Tertio. Si a me quæritur an non eum in modum & construi illa, & instrui possent, ut omnino conducerent? Annuo; sed ea lege, ut 1^{mo} construerentur spatiosa, ampla, altorum contignationum, multarumque late patentium fenestrarum & januarum; ut Ventus vi plena ædes lustrare totas, serenumque inspirare aëra possit. Ut 2^{do} hæc sic constructa Nosodochia numerosissimo ægro non scaterent, ne singulorum singulis venena nocerent. Unde 3^{tio} ædificanda id genus plura forent, quibus excipi, curarique multi, citra mutuum nocumentum, possent; quoque sententia senatus, facultasque
me.

medica *Viennensis*, anno 1679. fuerunt. Ut 4^{to} singulis his ædificiis sufficientes cum Medici, tum Chirurgi, præfiantur, idoneumque famulitium. *

5^{to}

* Haud paucos esse anguros, qui ab Ærario publico plus peti, quam præstare aut posset, aut saltem vellet, autument. Perperam sane illi. Computatione inita constabit longe minus Ærario publico pluribus, quam paucioribus Nosodochiis, iisdemque bene, quam male administratis, detractum iri. Si enim id constiterit, quod infinita vis hominum in unico excepta perierit; si id experientia evicerit, quod in quovis morbo contagioso ægri in Nosodochiis eo numerosiores intereant, quo una jacuerint confertiores; ipsaque pestilentia congesta contagione virulentior reddatur; Si tandem sagaciorum Medicorum metus fuerit, ne ejusmodi compacti Nosodochii evaporans aër cum Civitatis redderet venenatiorem; Sponte patet omnem eam copiosam pecuniam, quam in construenda tot ædificia profusus Senatus civitatis, aut Princeps ipse, foret, in æratum necessario, salvo plurimo cive, redundaturam: Salvo quippe eo plurimo, Mercatura, Artes, Agricultura, Fiscus scatufigines, brevi reflorent: ubi ex adverso, quemadmodum id nos omnium temporum Historia docet, tellus penuria hominum inculta jacet, annonæ caritas sequitur, commercium, studia, artesque languent, Fisco non modo nihil reddit, sed in sublevandam pauperis plebis egestatem, is emulendus est.

5^{to} At vere nihil hæc omnia proderunt, nisi sive in urbe, sive in ejusmodi potissimum Nosodochiis, alia methodus instituatur pestiferis medendi, quam instituta hucusque fuerit. Cunctarum multis a sæculis Regionum Medicis, atque Chirurgis, ea animi stetit, statque hucusque sententia,

Hæc occasione incidit mihi in manus Opusculum, quod de febre epid. Senensi anni 1766. & 67. scripsit Octavius Nerucci, in Senensi Lyceo Medicinæ Professor, ubi de hujusce febris, dudum fatiscen-
 „ titis, reditu egerat „ Novum hoc morbi incremen-
 „ tum, ait, maxime se prodiit in Nosocomio, ubi
 „ calore tempestatis, & MULTITUDINE ÆGRO-
 „ TANTIUM, aër corruptus magis, magisque
 „ alcalescens, factus est: unde non solum ibi per-
 „ petuitas morbi, & constantia, sed nova quoque
 „ ejusdem propagatio per urbem universam ti-
 „ menda est. Quam facile conferta Sanorum quo-
 „ que hominum multitudo, in spatio angusto vi-
 „ vere coacta, Epidemicos huiusmodi morbos ex-
 „ citare possit, nemo est qui non videat: quare
 „ nullum hac in re efficacius, atque opportunius
 „ remedium inveniri potest, quam RARITAS Æ-
 „ GROTANTIUM, tantopere necessaria ad epidem-
 „ icam labem penitus extinguendam &c.

tia, Morbos cum Malignos, tum Pestilentiosos, ejus esse naturæ, ut aut raram, initioque duntaxat, aut nullam ferant Phlebotomiam; utque præcipue curentur sudoribus, aliisque evacuationibus. Universalis hæc omnium fere temporum & Medicorum, & Regionum, sententia sola in cunctis Scholis tradita fuit, solaque direxit medentes. Scilicet „ debilitatem esse proprium Pestis caracterem: Venæ sectione debilitari hominem; proinde exulare debere ex methodo Pestis, per se adeo debilitanti, medendi, “

Profecto *Vera* debilitas rite erit a *Simulata* interstinguenda, antequam illam in ægris adesse statuamus. In malignis morbis rara adeo hæc vera debilitas est, ut nihil magis, quam ejusdem frequentem in illis miremur mentionem. Experimenta tam pro-

P

pria,

pria, quam aliena, quisquis animo æquo consuluerit, idem fatebitur. Quotiesne contingit ut in Morbi acuti Metastasi periculosa, debilitas ab universo consilio Medicorum tanta judicetur, ut nisi mors certa crederetur præforibus adstare, ad eamque propulsandam anceps Venæ sectio adhuc posset concedi, nullatenus concederetur; & ut interim facta tunc Venæ sectio, eaque iterata, tam belle sustineatur; ut quæ vires prius nullæ apparuerant, eæ jam valentiores, morboque conquendo aptiores, omnibus videantur? Optimum Virum, magni Regis Archiatrum, *Cothenium* laudo, quod ut Artis universæ, sic quoque hujus Observationis, probe memor, ægrotanti V. D. Præconi, quem maligna valde Peripneumonia invaserat, IN MAGNA VIRIUM DEJECTIONE Venam tutuderit, & in septimam usque

vicem phlebotomiam repetens, hominem brevi reddiderit sanitati. *Vid. Ill. Halleri disp. de morb. hist. & curat. Tom. 2. N° 52.* An unquam de hac veritate magno Trillero quis extitit persuasior, qui *Libr. de Pleurit. ægr. I.* venam credidit quinto Pleuritidis die secandam homini esse, quem moribundo, imo mortuo simillimum, se reperiisse scribit, quippe „ cui facies „ pallida, nasus acutus, tempora col- „ lapsa, os lividum, oculi torvi, „ rigidi, & obscuri, frigus per totum „ corpus, pectus cum sterno tumi- „ dum, & elevatum, abdomen con- „ tra retractum, pulsus intermit- „ tens, myurus, & adeo debilis, ut „ sæpe vix percipi posset, respiratio „ plane interclusa, caput cum collo „ flaccidum, pendulum, & in hume- „ ros recumbens, vivida ubique mor- „ tis imago. . . . Mihi vero in his

supremis angustiis constituto, con-
siliique inopi, experiri tum demum
placuit, ecquid tandem tertia Ve-
næ sectio præstaret... Jussi igitur
ut pedes frigentis & jamjam mori-
turi, calido balneo statim immitte-
rentur. Quo facto, dextri pedis
venæ vulnus sat vastum lanceola in-
flictum; ast incassum prorsus, ne
guttula enim cruoris quidem prodi-
bat: idem mox tentatum in altero
pede; sed eodem irritò plane mo-
limine... Mandavi iterum ut fer-
ventior adhuc aqua, imò ferven-
tissima affunderetur. Quod tanta
quidem sollertia præstitum fuit a
ministris, ut bullulæ excitarentur
in ægroti pedibus, & Epidermis
abscederet. Sed saluberrimo per-
DEUM, & felicissimo eventu, ef-
fectuque. Utraque enim vena an-
tea frustra percussa, nunc voto no-
stro

„stro perfecte respondebat, fatisque
„largam copiam læta scaturigine
„ejaculabatur; ita ut 12 & amplius,
„vitalis laticis unciaë in aquam de-
„fluèrent. Tum vero mirabilem
„prorsus rerum vicissitudinem, læ-
„tamque Catastrophen vidisses. Mox
„enim a sectis venis vividus color fa-
„ciei, blandus calor corporis, libe-
„rior spiritus pectori, & fortior or-
„dinatioque ictus arteriis redibat,
„nosterque semimortuus venator sen-
„sim reviviscebat “ &c. Sputo, fu-
„doribus, & urina, ad nonum mor-
„bi diem iudicio integro absolutus
est.

Tandem an non in ipsa debilitate
pestilentiali suas largas iteratasque
phlebotomias, tanto cum ægrotan-
tium emolumento, illi Practici fece-
runt, quorum *Felix Platerus* meminit
„qui extremum ex Phlobotomia re-

„ medium facientes, tam copiosa
„ emissione sanguinis facta, ut animi
„ inde sequeretur deliquium, se mul-
„ tos liberasse fateantur, & nullam
„ aliam nisi vehementem sanguinis detra-
ctionem probent: an, nondum appa-
rentibus Bubonibus aut Anthracibus
Sydenhamus; an non iisdem jam extan-
tibus, Riverius, Botallus, Marescottus,
Sinapius, desperatos suos Pestilentes,
& communi methodo passim pereun-
tes, mortis e faucibus eripuerunt?

At vero hic oggerere mihi audio il-
lustres, quos veneror, æternumque ve-
nerabor, Collegas meos, spectatissimos
in arte Apollinea Viros, me viam ad
millena homicidia sternere, siquidem
ex hoc consilio Tirones mei conclusu-
ri sint, in quavis debilitate ægrotan-
tium Venam tundendam esse; & Ve-
næ sectionem, quam tot tristia exem-
pla in debilitate ægrorum vitæ dele-
tri-

tricem esse demonstraſſent, jam vitæ deficientis conſervatricem habituri, vimque proinde ingentem peremturi mortalium. Ex motu, ac pulſu, Medicos ab omni ævo judicaſſe de viribus ægrotantium; in eoque exercitatiores felicitate praxeos, ſummaque qua cluerent laude, ejusmodi judicii veritatem demonſtraſſe æternam: Naturam humanam haud aliam nunc exiſtere, quam ſæculis elapſis: ſi virium defectus Venæ ſectionem olim vetuerit, quod vires ad coquendam, movendam, expellendamque morbi materiem, abſolute requiſitas, ſterneret, educitoque cruore pauculo, quo vita aut aliquantisper adhuc protrahenda fuiſſet, aut augeri paulatim, repararique potuiſſet, ſalutem desperatam redderet; idem & hodie verum eſſe: verbo ſic intempeſtive admodum reſuſcitari *Leonardi Botalli*, in quo-

vis morbo, etiam debilissimo, vena n-
fecantis opinionem, quam in *quinta*
parte Institutionem suarum Boerhaavius ar-
gumentis invictis explosisset; jamque
vacillantes in praxi Tironum animos
reddi, quos tantus ille Vir certos,
firmos, securosque reddere, anni-
fus esset. Homicidii reum æque eum
esse qui languentem vitam adimat,
quam qui tollat valentem. Et cum
conscientiæ lex dicat in rebus dubiis
tutiorē partem semper amplecten-
dam esse; quando tanta debilitas te-
neat ægrotum, ut, utrum vera illa,
an personata sit, Medicus dubitet,
cum a Phlebotomia abstinere oportere,
ne auctam debilitatem mors ejus
culpa excipiat. Porro hanc dubita-
tionem in quocumque malignorum
morborum genere frequenter occur-
rere, adeoque in eorundem debilitate
a Phlebotomia religiose abstinendum
esse.

esse. Meum proinde consilium, quod praxin omnium sæculorum subvertat, quod sanæ Theoriæ adversetur, quod conscientiam lædat, ac Medicum denique, Vitæ qui conservatoris officio fungi debuisset, in carnificem convertat, hoc, inquiunt, consilium ab omni eo, qui Medicus Christianus, aut saltem humanus, audiat, relinqui, damnarique oportere. Eoque magis, quo abundantiora exempla prostant, restauratæ vitæ languentis per cardiaca, quam eandem in aliis temeraria Venæ sectio extinxisset.

Ad omnia hæc argumenta ordine responsurus dico *Primo*: Ad difficultatem omnem hujus quæstionis tollendam necesse fore, ut ex meris veracibusque observatis Lex sanciretur, quæ omnem tollens in omni casu litem, sic veram interstringeret a personata debilitatem, ut falli postliminio nemo posset.

Dico *secundo*: Hucusque Observationes, ex tota Bibliotheca medica collectas, necdum sufficere, ut Lege adeo præstanti ditari ars, ornarique possit.

Inde *tertio*, Observationes, quæ extent, consulendas esse, ut quousque Medici in enodanda hac difficultate, progressi fuerint, evidenter pateat.

Hinc *quarto* affirmare audeo saltem malignis, pestilentialibusque in morbis, provectos eo esse Medicos, ut si non velis omnem, saltem præcipuam sustulerint hæsitationem.

Hæc res ut constet, paulo altius repetenda est. Ex Pestis historia(a) constitit eam morbum esse, qui majorem eorum, quos invadit, partem occidat. (b) Totam consuetam medendi pesti methodum ineptam fuisse, quæ ne tot strages ederet Pestis, impediret. (c) Cunctorum sæculorum Methodum fuisse,

fuisse, ut vel nulla, vel modica, ea-
que principio tantum, Venæ sectio
fieret, ægrorumque corpora aëre, te-
gumentis, & medicamentis, ad sudo-
rem potissimum compellerentur. (d)
Hunc modum medicandi adeo univer-
salem in Scholis fuisse, & adeo sacrum
ab omnibus habitum, ut unica Con-
scientiæ Medicorum quies videretur
in eo sita esse, ut quæ peribat multitudo
prodigiosa, non, nisi ad amussim ad-
tritas Scholarum regulas, tractata pe-
raret.

An tamen parta sic conscientiæ
quies, solida est? Si mente præoccu-
pata multitudinem sequutus, nihil
plus multitudine proficio; si æque
multas consuetudinis victimas lugeo;
intereaue salubriorem, prioreque
longe feliciorem methodum, sciens
volensque non arripio, suspecta mea
tranquillitas est, falsa est, & humano
ge-

generi damnosissima. Si consuetudine populum turmatim cadentem video, neque nisi raro, in Luis vigore saltem, emergentem; more autem haud quidem infueto plane, at infuetiore, numero longe plures, idque citius, fanescere; non est ultra mihi integrum, aut huic illum antepondere, aut alterutrum pro arbitrio sequi. Vel enim tot gravissimos Viros dedita opera nobis imponere voluisse, vel vera, demonstrataque tradidisse, statuamus oportet. Sed imposturam non esse evincunt tam eadem notissima multiplicis curæ exempla, quam libri, iisdem in urbibus typo excusi, in quibus contigerant. Reclamavit enim nemo, siue Magistratum, siue Civium, siue Medicorum; a quibus plusquam credibile est ejusmodi Syco- phantas publice prostituendos fuisse; imo potius alii aliorum experimenta con-

confirmarunt. Tandem Analogia, a ceteris malignis morbis petita, probare hanc posteriorem methodum videtur.

Tom. XIV. Vix numerandis testimoniis ostendi Missionis sanguinis in Peste præstantiam laudatam, & commendatam fuisse, ab omnibus illis Medicinæ Scriptoribus, quos laudavi ibidem; idque, quod bene notandum, haud fecus ab his, qui Venæ sectionem, ut letiferam, in peste, proscripserunt, quam ab illis, qui eam, veluti Pestis anchoram sacram, salutaverunt. Constitit enim multiplici testimonio quam impense illi, qui phlebotomiam damnabant, scarificationes, narium, uterique hæmorrhagias, uno omnes ore laudarent, ab huius corpora non debilitari, ab illa autem maxime, arbitrati. Eadem occasione ostendi ibidem, per multorum experien-

rientiam, parciolem Venæ sectionem nocere utriusque partis testimonio: qui enim Phlebotomiam respuebant, non nisi aut unica, aut si iterata, semper tamen parca ea, suos periisse viderant ægros; id quod sponte Phlebotomiæ in Peste patroni fatebantur, nec eandem, nisi per omne crudi morbi tempus, nisi largam, nisi sæpius repetitam, laudarunt unquam. Excepta autem sola phlebotomia, utraque pars largas, repetitasque sanguinis evacuationes in genere mirum in modum extulit.

Constitit ergo non quamlibet sanguinis evacuationem, sed eam modo, quam in vena lanceola facit, damnatam fuisse; omnes vero Medicos aliquam, eamque profusam, laudasse sanguinis missionem, & hos quidem quamcumque, illos autem eam duntaxat, quæ aut scarificatione prodiret, aut quam Natura ipsa excitaret. Sic

Sic in Methodo medendi controversiæ omnis esse finis videtur : qui enim Medicorum, venam pestilentis secantium, exemplo motus, secat in peste venam; & qui veteris opinionis tenax, non secat venam, sed veterum hortatu scarificat; & hic, & ille, copiosum cruorem evacuans, id facit, quod quæritur, & de quo disputatur. Quid ultra ergo altercamur? Quid causæ, cur sententiæ affirmantis auctoritas nos in Scholis nostris non urget magis? cur ejusdem non convincit demonstratio? cur non parit in exercitio artis concordiam?

Ratio in promptu est. Provoco ad medicos Scriptores omnes, qui in Peste Phlebotomiam proscripserunt, a Peste virium vitalium summam gigni debilitatem rati: utique Phlebotomiam alia de causa non damnant, nisi quod ipsa per se debilitans, pestilentem

lentem debilitatem immedicabilem reddat: eandemque in singulo maligno morbo tuentur sententiam. Unde demum principatum obtinuit hæc per universam medicinam doctrina, quod in morbis malignis, ac præcipue in pestilentiosis, aut in initio parca, aut potius nulla Venæ sectio instituenda esset, quod hæc aucta debilitate vel in gravius discrimen conjiceret ægrotantem, vel ipsa etiam vita privaret. Imbuti hac Autorum, Scholarumque doctrina ab ipso studiorum exordio juniores, mature discunt nil plus Venæ sectione in Peste, malignaque febre formidare, nihil ea habere exitiosius. Hoc quidem ipsis condonare debere videmur. An vero eadem facilitate ipsis condonari oportet, quod ab una parte Veteris Scholæ odium in Venæ sectionem, ut vires projicientem, animadvertentes, unaque imbi-

imbibentes, non perceperint quoque approbationem & laudes, quibus cruoris evacuationes, easdemque cum profusas, tum iteratas, quas aut natura per naturales evacuationes, aut scarificando Medicina faceret, idque potissimum quod hæ non debilitarent hominem, extulerit eadem honoranda Vetustas? Equidem inficias non ibo, dum veteres a parca Phlebotomia Malignorum, Pestiferorumque, plurimam partem interire intelligerent, eosdem in odium ejus adeo implacabile ruisse, ut quam evacuationem aliunde a natura arteque factam, iteratam, etiam & abundantem, quod non demeret vires, laudassent, oblivioni tradidisse viderentur, neque feris commendasse nobis, eorundem nepotibus. An vero hic attentionis, judicii-que defectus, nos excusabit, qui sedato animo febrium malignarum, pestilen-

Q

stidentialiumque historiam, atque curationem, scrutati, viamque curandi duplicem fuisse persuasi, nihilominus cæca erga antiquos veneratione, sic illorum præjudicia animo imbiberimus, ut alteram sine altera amplexemur? Nos, meliora edocti, erroneum id Veterum esse principium novimus, quod sola Phlebotomia debilitet, haud vero reliquæ sanguinis enarratæ evacuationes; utpote probe gnari & has, & illam, pro diversa morbi conditione vires cum minuere, tum augere, posse. Nunquid ab hæmorrhagia narium, hæmorrhoidum, uteri, tam profusa, quam repetita, homines minus projectarum virium esse, quam a Vena secta,prehendimus? Et si scarificatione lentior profiliat cruor, an eadem diuturnitate, crebritateque, quam veluti inviti laudabant, profusior, minorem creabit virium, quas deficere

cere statuebant, prostrationem? Candide igitur & audacter repetamus, Veterum hac in parte portentosum præjudicium fuisse, erroremque millionum Mortium genitorem, quod a media phlebotomia ægros in pejus rucere gnari, in pejora a liberaliore ruituros opinarentur; ubi tamen Naturæ opera contemplati, ob id servatos homines intelligerent, quod largæ illæ, crebræque hæmorrhagiæ, copiam corporibus ingentem detraxissent.

Adeoque *quanto* concludo obligari quemcumque, ut in Peste, eique consimilibus malitia morbis, sanguinem mittat largiter, si velit majore Veterum autoritate, rite perpenſa, tueri conscientiam; sive, phlebotome largissima, sive, eam Veterum autoritate veritus, saltem scarificando, sanguinisque evacuationes alias sollicitando, promovendoque.

Tandem *sexto* si in Acutis, Chro-

nicifve morbis cujuscumque generis, rarior ille existeret incertitudinis gradus, ut, utrum a vera, an a falsa debilitate, vires profternerentur, indeterminabile foret; in eoque, ne ingens damnum ab evacuatione cruoris nasceretur, merito quis metueret; is ab eadem abstinendo tutiorem partem sequeretur.

Terminabo hoc caput Rescripto, quod non nisi absoluto opere accepi. Nequid ad elucidandam hanc materiem præterirem, scripseram ad *Ill. Comitem de Hauchepied*, *Commercii Batavi Smyrnæ* Directorem, ab eoque petiveram ut ad XI. quæstiones, quas mittebam, curaret mihi a Medicis, Chirurgisque, harum rerum gnaris, responsum adornari, quo demum certior de singularum *Smyrnenfium* Nationum Methodo cum Pestiferis agendi fierem; *Thracum* scilicet, seu *Turcarum*, qui ceteris Nationibus una captis longe

ge numerosiores sunt, deinde *Armenorum*, tum *Græcorum*, atque *Judæorum*, tandemque *Europæorum*. Responso me honoravit Ill. Comes, a suo Medico, Exp. Domino *Zimmermann*, qui XI. annorum spatio praxin ibidem exercuit, multum peregrinatus in Asia, multumque cum Turcis, atque eorum Moderatoribus (*Basschas*) conversatus est, doctissime, fuseque adornato; promissitque brevi relationem, quam alius Vir, egregius Chirurgus, pro me conficit. Ex hoc Responso patet.

I^{mo} Nullam communicari *Turcarum* Methodum posse, eo quod nullam prorsum methodum observent.

II^{do} Æque impossibile esse, ut ad quæstionem respondeatur, utrum, inito Peste affectorum enectorumque calculo, plures, an minores, apud *Thracas*, quam apud laudatas mox quatuor gentes, quotannis pereant? *Turcis* enim

numerum pestilentioforum nunquam notantibus, proportionem perpetuo ignorari. Anno 1771. ceterarum *Smyrnæ* gentium 4000. circiter homines peste laborasse, vixque superstites ex illis septingentos fuisse; sic ut ne sextus quidem servatus in vita fuerit: *Thracum* autem 15000. periisse; sed cum, quot lues invaserit, minime notent, proportionem illorum mortuorum cum reliquarum gentium mortuis nullam inveniri posse. Conjecturari quidem solere plures *Turcarum*, quam harum gentium, peste perire; sed dicta de causa incertam conjecturam esse.

III. *Turcis*, quemadmodum Methodum curandi, ita quoque Nosocomia deesse. Ceteras gentes quasque, nota jam Epidemia, sua Nosocomia ordinare, turmatim in illis popellum excipere, initoque calculo deprehendere, si de centum ægris, singulis privata

in

in domo ægrotantibus, quinquaginta pereant, eodem tempore in Nosocomiis 80. de 100. mori. Subjungitur autem adesse in Nosocomiis numerosissimam ægrotantium turbam, rerum necessariarum inopiam, administrationis requisitæ defectum.

IV. Medicos, Chirurgosque, five privatis in ædibus, five in Nosocomiis, curam Pestiferorum vix habere; hanc potissimum relinqui Empiricis; illos solos Medicis atque Chirurgis gaudere, quibus ampla res domi sit. Empiricos hosce passim eos esse, qui pessima peste ægre emergsi, seque ideo immunes ab illa in posterum arbitrati, Pestiferorum curam impavide suscipiant; licet præcedenti proxime anno hæc eos opinio sic deluserit, ut hi ipsi numerosiores cum affecti peste fuerint, tum per eandem mactati.

V. Methodum interim privatis in ædibus

ædibus Urbis, ac Suburbiorum, observari a Medicis, Chirurgisque, qui ornatiores ac ditiores adeant. Fortunatissimam suam esse Responsi Autor testatur, qua Vena largiter, iteratoque, fecet, & Spiritus acidus minerales propinet abunde; hisce enim excretiones Pestis criticas optime promoveri: Empiricorum autem incertum Vulgus studia in contraria scindi, sicut pars omnium plurimos Missione sanguinis servari; pars plures, eo non misso, a morte præservari, contendant. Afferit autem Autor se suæ Methodi præstantiam mero didicisse casu, cum nonnullis venam largiter secuisset, quibus inflammatorium adesse morbum credidisset, in quibus tamen a Venæ sectione veræ pestis signa se manifestarent: his autem salutem tutius citiusque rediisse.

F I N I S.

RATIONIS MEDENDI
CONTINUATÆ

T O M I I.

PARS ALTERA,



DE RESUSCITANDA VITA
SUFFOCATORUM,
SUSPENSORUM,
&c.

*De manu hominis, de manu viri, & fra-
tris ejus, requiram animam hominis...
ad imaginem quippe Dei factus est homo,
Gen. IX.*



Elenchus Capitem SECUNDÆ PARTIS.

Caput I.

Computatio multiplicis in vitam revocationis Submersorum, in Belgio fœderato præcipue, tum & in Republica Venetorum, & in Austria, &c.

Caput II.

Recensio novorum experimentorum ad illustrandum, promovendumque, Submersorum auxilium.

Caput III.

Animadversiones in Capitis ultimi, ac penultimi tentamina, quæ partem quidem difficultatis illustrasse deprehenduntur, partem vero minime.

Caput IV.

Ad quæstionem: Utrum iis, qui laqueo suspensi sunt, eadem auxilia præstanda, quæ Submersis, an vero alia? ut respondeatur, examen præmittitur de causa proxima mortis Suspensorum.

Ca-

Caput V.

Nova experimenta ad demonstrandam causam mortis proximam, tam Susensorum, quam Demensorum, quæ dubia plura, prioribus experimentis non sublata, sustolunt; Et quorum in ultimo prima vice turgidus aqua Ventriculus Autori apparuit.

Caput VI.

De prima nostra Anatome demersi hominis, hominisque suspensi: de captis novis Brutorum experimentis, ad ea hominum examinanda, Et illustranda: deque certa experientia deglutitæ aquæ.

Caput VII.

De errore ex experimentis. Nonnulla de vulgimore pedibus suspendendi Submersos, Et in aperto utrimque dolio circumagendi; nec non quædam necessaria de Laryngotomia.

Caput VIII.

Responsio ad graves duas Objectiones.



CAPUT I.

Computatio multiplicis in vitam revocationis submersorum, in Belgio foederato praecipue, tum & in R^{ep}. Venetorum, & in Austria, &c.

§. I. *Felix vitae revocatio in Belgio foederato submersorum hominum, numero quinque supra quinquaginta, trium in Italia, unius in Belgio Gallico. Subditur praeterea casus per omnia mirabilis, qui in Hollandia contigit hac aestate: sic ut spatio sesquianni ultra sexaginta submersis revocata vita ibidem sit.* §. II. *Recensio 27. auxiliorum, quibus usi ad hoc Batavi fuerunt.* §. III. *Defectus in illorum Relatione notatur, quod ii in ea desint, quibus au-*

xilia hæc minime profuerunt. §. IV. Relatio submersorum Austriacorum, & quidem duorum, quibus, quod penitus putrèrent, nihil adhibitum operæ est; Pueri, Studiosi, ac Fabri lignarii, quibus plurimus impensus labor fuit, citra & spem, & effectum; propter vel moram diuturniorem in undis, vel dilatum nimis auxilium, vel utrumque. Felix tandem cujusquam Operarii in vitam revocatio.

§. I.

Tomo hujus Operis XIII. in Submersorum Suffocatorumque Historia multus fui, &, ad experimenta quæ retuli variorum Autorum, multa mea propria adjeci, brutorum, hominumque; quantulacunque autem mea propria fortuna erat, hæc tamen ipsa multis de causis, fortunaque multo celebrior aliorum, adigebant me, ut publicum in usum dissertationem paulo fusiores adornarem: sic quidem
ut,

ut, & quos felices auxiliorum eventus aliæ Regionēs lætatae fuerant, atque communicaverant, referrem exacte; & meos in rem eandem laboriosiores, quam fortunatiores conatus, ob id præcipue enarrarem, ut quibus similia promovendi animus foret, hi, quousque jam provectum negotium esset, ictu citius contuerentur, quæque ultra ipsis agenda forent, ut perficeretur idem, intelligerent.

Neque multo absimilior labor hic hornus est. Historiographus resuscitatorum Submersorum, tot dabo, tantosque casus, ut nemo mortalium stupendiores, numerosioresque, collectos viderit unquam. Tradam deinde quos exantlavi labores, multos, molestos, graves, assiduosque, quibus Naturam rerum, quousque Mortalibus exiguis nobis licet, ex latebris prodire suis cogere, reddereque

manifestiorem, annifus fim. Id autem benevolos Lectores rogo, ne immanitati aut crudelitati, tribuant frequens meum Canicidium: amo, colo, aloque hoc fidele animantium genus, grati animi natura doctorem, atque nobis ingrati animi crimen erga boni omnis Largitorem perpetuo exprobrantem; ea tamen mihi stat animi sententia, si in alimentum vitæ pecora immolare expedit, idem nobis in tentandam vitæ suffocatæ refocillationem, restorationemque, licere. Favēbat autem impense desiderio meo plebecula, ad canes, quotiescunque illis indigebam, mihi vendendos, præannonæ, victusque omnis caritate, facilis, & ultronea.

Itaque ut ab exteris incipiam, prodiit *Amstelodami* pars tertia *Historiæ Act. Soc. in Submerforum auxilium ibidem collectæ*, referens nobis tres supra quinqua-

quaginta casus hominum, quos sesqui
anni spatio unda merfos, multimoda
auxilia in vitam revocarunt. Porro
animadvertimus horum multos pauca
minuta submersos fuisse; non paucos
horæ quadrantem, nonnullos me-
diam, integram unicum horam. 2^{do}
Horum quadraginta & octo, mox ex
aqua elatis, admota auxilia esse, uni-
co post horæ quadrantem, tribus ela-
pfa hora media, unico decurso trium
horæ quadrantum spatio. 3^{tio} Signa
vitæ in eorum novendecim haud diu ab
incepto modo labore apparuisse; in uno
minutis horæ secundis octo elapsis, in
altero post horam laboris, in duobus
post sesqui horam, in alio elapso la-
borum bihorio, iterumque intra duas
cum dimidia horas in quodam homi-
ne, in alio vero non ante tres cona-
minum resuscitandi horas; non me-
morato eo tempore in quatuordecim

Submersorum. 4^{to} Operam hanc post observata indicia vitæ promotam esse tempore duarum, trium, sex, octo, sedecim horarum, in non paucis plurimum dierum usque ad perfectam salutem. 5^{to} Horum in vitam revocatorum unum post biduum obiisse, qui ebrius incidisset in aquam; eam ebriorum sortem sæpe esse prioribus Tomi XIII. exemplis constitit; alteram elapsis ab inde diebus quinque, quam necdum bene a Pleuritide curatam fuisse velint; tertium brevi post percepta prima indicia vitæ; quartum forsan post bihorium, quem vulgi more pedibus suspensum rudius agitaissent; quintam quinque, ut videtur, elapsis a revocata vita horis; sextam sexagenariam, quam plebis ad exemplum supra dolium ruditer movissent, tertio postmodum die. Sic ut pars sexta illorum, quibus vita resuscitata fuerit,

ve-

veram brevi mortem occubuerit. 6^{to} Septem in vitam revocatos esse, integreque sanatos, quibus livor faciei, quibus os naresque multa spuma foedasset; unicum febrim, nonnullaque alia, quæ non exponuntur, passum esse; uni denique alterique sanatorum vultum tumidum a submersione lividumque fuisse.

Adduntur ad calcem duæ Submersorum in *Belgio* eodem historiæ, quorum alter post semihoram laborum, alter exacto eorundem bihorio, vitæ indicia præbuit. Hisce subjungitur Epistola, cum Societate communicata, Exp. Viri *Jacobi Maggioni* P. P. in Univ. *Pataвина*, tradentis historiam pueri septem annorum, minutis 25. submersi, dumque extraheretur, facie liventis, ore spumosi, ventreque inflati; quem demum post mediam operæ horam, ipse cum suis in vitam revocasset. Sequitur tertio Epistola

Chirurgi Officii Sanitatis, *Bassani Vetus*, nautæ casum referens, qui horæ quadrante merfus, post mediâ datæ operæ horam vitæ latentis primordia exhibuit. Ex Parochi Reverendi testimonio, quod adjungitur, patet horam forte elapsam esse, antequam illi, ex flumine erepto, auxilium ferri ceptum esset. Quarto, Epistolæ duæ Doctoris *Canestrati* casum referentis feminae 55. annorum, quæ ipsa sese præcipitem dederat de ponte in fluvium *Athesin*, & miliaris quadrante distante abinde loco elata, post inspirati mox in pulmonem aëris minuta septem, obscurum præbuerat indicium vitæ, triduique restituta tempore fuerat. Adduntur testimonia Magistratus Sanitatis ad hæc tria exempla, donaque, quibus serenissima Resp. Ven. gratificata est Sospitatores. Quinto accedunt *Insularum* (*Rysfel*)

sel) Prætoris, Comitis Du Bus Litteræ referentes, ad fumum in Rectum Intestinum injecti Tabaci signa vitæ comparuisse in quodam Submerso. Sexto demum scriptum Exp. Medici Ultrajectini *Stilting* memoratur, quo hominis, vapore carbonum suffocati, cura communicatur. Ad hos casus notabilis alius addendus est pueri octo annorum, qui anno hoc 1771. die 30. Maji, in pago hollandico *Zoetermeer* ad Molendinam, aquarum motu agitatam, submersus, atque aquæ motu trajectus per spatium angustissimum in ipsum vorticem, tandem inde elatus est, tempore Submersionis ignoto; frictusque dein aceto & spiritu vini, denudatusque, & bene instructo foco expositus, ad se rediit, sed osse humeri sinistri, eoque sinistri femoris, fractis. Fractura autem utraque trium spatio mensium integre curata; historiam

riam Nova publica, five Diaria, communicarunt.

§. II. Operæ pretium erit ea auxilia enarrare, quæ ab illis plura, aut pauciora, quæ in aliis alia, infortunatis hisce adhibita sunt. 1^{mo} enarrantur validæ concussiones corporis, pedibus in altum ductis, ac humili capite, rotationesque super dolium, communi omnium temporum more. 2^{do} Prompta a vestibus madentibus nudatio. 3^{tio} Expositio corporis ad ardentem focum, furnumve pistorium, aut ejusdem in saccharificorum, spiritusve destillantium officina, statutio. 4^{to} Frictio universi corporis, five sicca, five humida; & quidem sicca aut simpliciter, aut cum vel fumo aromaticum, vel sale communi, vel cineribus; humida autem cum Spiritu vini, frumentive, aut simplici, aut composito, ut v. g. cum spiritu Melissæ,

liffæ, Sp. Vini Camph. Sal. vol. ol. Alexipharmaco *Bernardi Serraglia*, Sp. vini aut cum Pipere, aut Sale, aut rebus Aromaticis variis, aut Aceto, aut Lacte. 5^{to} Aëris five ipso ore in os submersi, five ope tubæ, in Trachæam inspiratio. 6^{to} Narium barba pennæ, spiritu falis ammoniaci madidæ, ope facta irritatio. 7^{mo} Infusio in Gulam Vini, Sp. Vini, Butyri, Olei, Vini rubri calentis, calentis aquæ. 8^{vo} Multimoda pressio & agitatio Thoracis Ventrisque. 9^{no} Fumi Tabaci in anum immissio, five communium fistularum, five adaptati ad id Syphonis ope. 10^{mo} Plantarum pedum percussio. 11^{mo} Venæ sectio variorum locorum. 12^{mo} Clysmata acriora. 13^{tio} Lecti calentis fatus. 14^{to} Cubitus inter duos homines sanos. 15^{to} Immissio aëris in Intestinum Rectum. 16^{to} Appositio tegularum calen-

lentium, linteamine involutorum, ad pedum plantas, ad utrumque & Ventris & Thoracis latus. Appositio itidem ad easdem plagas vel Suppedanei, ignito cespitem carbone calentis, vel stannei vasis, terreæve lagenæ, aqua fervida plenæ. 17^{mo} Lotio universi corporis cum calida aqua. 18^{vo} Emeticorum, Purgantiumve injectio. 19^{no} Involutio corporis in stragulis laneis, unaque ante focos volutatio. 20^{mo} Faucium, ac Epiglottidis, irritatio blanda, quo effectum, ut & vomitus excitarerur, & inconditus quidam perciperetur sonus. 21^{mo} Inspiratio fumi Tabaci in os, atque nares. 22^{do} Instillatio lenta, ac pauca, in fauces, non deglutiendi, sed irritandi causa, unde orta tussis. 23^{tio} Oris, Narium, Frontis, Temporum, frictio cum Sp. Sal. ammon. 24^{to} Puerorum lenis in incunabilis agitatio.

25^{to} Cucullus capiti circumpositus, ex cineribus calidis, inter duo lintheamina positus, confectus. 26^{to} Theriacæ ad cordis scrobem, eundemque ad locum, Cataplasomatis, ex Porris cum Aceto Lithargyrii & aqua confecti, appositio. 27^{mo} Vesicantia Suris, Femoribus, Nuchæ, &c. affixa, Pedibus Epispastica.

§. III. Numerus Servatorum profecto multus est, sic ut incredibilis videri iis posset, qui naturam Regionis, fluminibus circumdatam, fluminibus rivisque millies intercisam, lacubus ingentibus, magnoque maris Germanici sinu, quem mare Austrinum vocant, interruptam, non noverunt; qui vero noverunt, minime mirabuntur, ex Submersorum millenis non paucos, qui servantur, esse. Desideratur autem in ejusdem Societatis Historia numerus omnium, quibus ex aqua
ela-

elatis non profuerit quodcunque præsidium. Si commercium Litterarium cum Urbium, Pagorumque cunctorum Prætoribus, in universo fœderato Belgio eum in finem colerent, haud minus frustraneos, quam efficaces suos exfuscitandi labores, suis in actis referre possent, proportionemque Servatorum cum non Servatis manifestarent: hæc enim exacte habentur omnia in Notis prætoriis. Forsitan nos, aliorumque Regnorum Medicos, atque Naturæ Curiosos, exiguum Servatorum numerum dolentes, hæc consolarentur, si haud multum dissimilis proportio ex illorum nostrisque Historiis, inter sese comparatis, intelligeretur. At vero de hac re postmodum latius. Necesse primum erit eam cum Publico communicem, quæ in *Austria* gesta sint, propriosque, quos tam in hominibus, quam in brutis, five

sive submersis, sive suspensis, peregerim, enarrem labores.

§. IV. In Tomo XIII. trium mulierum historiam dedi, quibus Vulgi auxilium opportune, moxque, adhibuitum, vitam sopitam resuscitaverat, quarumque deficientis diu sanitatis curam in Nosocomio perfeceramus: exempla præterea duorum virorum, quibus cura maturiore ad amnem neglecta; nostri seriores non profuerant labores: Quæ deinceps pluribus in brutis experimenta eo fine ceperam, effectu cassa, spemque frustrata omnem, subjunxeram. Par illi erit, quam nunc tradam, opera; tentamina in hominibus primum, in brutis deinde suscepta, enarrans.

Die 30. Julii ex pago Ebersdorff, duobus cum dimidio miliaribus hinc distante, attulerunt in Nosocomium meum cadaver, quod in Danubio

sponte aquæ petierat superficiem, adeoque putridum; & cum post elationem ex aqua adhuc 20. horis æstivo calore expositum fuisset, corruptum adeo, ut lacera pellis undique a nigra carne propenderet. Non attigi, sed illico, eo misi, ubi Magistratus jussu primo lustrantur ejusmodi corpora, & sepeliuntur.

Die 25. Aug. ex Pago eodem, in ipsa meridie, aliud cadaver præ putredine natans, sex horis post exemptionem elapsis, inferre in Nosocomium voluerunt; quod cum non minus priore fracidum esset, ilico lustrandum, tumultandumque, ut prius, curavi. Jamque facile prævidebam fore, ut inde numerosiora ejusmodi cadavera afferrentur, cum arcuatus eo in loco *Danubius* inverfuram faciat, universa sistentem, quæ secundo flumine ex tota *Austria* eo feruntur. Verum
sta-

statim a Celso Regimine cura habebatur, ut & illius, & vicinorum Pagorum Judices, officii sui, lege Regia ipsis injuncti, serio admonerentur, discerentque spem vitæ omnem a putredine ademptam esse. Præteriturus casum utrumque facile fuisssem, ni in recensendis infortunatis meis laboribus hosce utrosque nonnulli retulissent. Neque multum dissimilis, quæ sequitur, historia est.

Die 9. Aug. in pago Eipolta, Eipolt-au, Leopold-au, haud procul hinc dis-
sito, puer duorum necdum annorum in ædium area ludens, incidit, ad horam pomeridianam quartam, in puteum duorum cum dimidio pedum altitudine, partim aqua, partim bovina fœce plenum. Elapso præterpropter horæ quadrante, quærentes illum parentes tandem resupinatum in superficie fœcalis liquidi invenerunt,

haud rigidum quidem, sed omnino frigidum, citra vel minima indicia vitæ. Territus ad hunc aspectum, atque ejulans Pater, ad Rev. loci Parochum accurrit, invenitque ibidem Balneatoris pagi Tironem, qui pro auxilio afferendo, Magistrove vocando, rusticum hominem quod de puero, irrevocabiliter mortuo, tantopere ejulet, increpat. Hora octava vespertina Pater convenit Judicem loci, qui secundum latam legem, quam primum inquirere debuisset, num pagi Chirurgus suo erga puerum officio functus esset; jubereque, si defuisset, actutum expleret. Nihil autem horum Judex, patrem vero misit ad loci, quem *Closter-Neuburg* vocant, Prætozem, ad quem spectabat omnis hujus pagi Jurisdictio; hic autem jussit *Viennam* mox pergeret, a celso Regimine, quid sibi agendum foret, auditurus. *Viennæ*

au-

audivit transferendum corpus in meum
Nosocomium esse. Ergo horis 26. a
submersione frustra elapsis, ad nos de-
latum corpus est. Relatione hac ad
Patris Matrisque testimonium in Char-
tam conjecta, mox totum necdum
foetens, siccum jam ab hesterno die
corpus, thoracem autem præprimis,
pannis calidis fricuimus, brevique ju-
gularem venam aperuimus, fluentibus
inde unciis duabus cum dimidia san-
guinis spissioris, plane frigidi, atrique.
Linteis probe calentibus involutum
corpus tunc in lectum; ignitabulo
calefactum, reposuimus, stragula cor-
pori imposita ignitabuli itu redituque
continuo in calore conservantes, sic
ut sensim caleret totum corpus. Vi-
num in os infusum gulam non subivit,
nisi ejus tantillum gutturis externi
contrectatione, denique ne quidem
sic; digito meo gulam paulum dila-

tante, nonnihil plus descendit; sypnone demum uncix tres. Aërem inspiravimus primum ore nostro, deinsolle, in Trachæam, interea dum ab aliis venter, pectusque, alium atque alium in situm, capacitatem, formamque, variata pressione, mutarentur. Ab initio autem, & hora deinde, pluriesque postea, fumus tabaci in Rectum Intestinum immissus est, naribus quoque & ori inspiratus. Barbaque penæ anserinæ, Spiritu Cornu Cervi madente, nares irritatæ faucesque sunt, & Balsamo vitæ fricatum corpus totum. Tandem post quinque horarum laborem, linteamine, calidis cineribus strato, involutum fuit, repetitusque fumi tabaci clyster. Lividum denique, ac foetidum post tot molimina cadaver, Magistratus examini, & sepulturæ, commisimus.

Pro-

Profecto longius exactum erat temporis spatium, antequam ad nos deferretur corpus, quam ut spem quandam conciperemus successus: verum necdum tempus determinatum a quoquam erat, ultra quod inane quodvis auxilium esset; neque foetebat adhuc puer; celso præterea Regimini patere omnino debebat nihil a me negligi, nulli labori a me supersederi, parcique, quamdiu absoluta mortis certitudo necdum adesset. Tandem satisfaciendum conscientiae erat. Hinc & similes alios ad me allatos non repuli, ut ultro constabit.

Die 12. Aug. ad horam nonam vespertinam duo viri, probe appoti, in Nosocomium sella gestatoria intulerunt Medicinæ studiosi corpus, in suburbana sylva ex *Danubio* elatum: quo autem modo eum merferat unda, quamdiu tenuerat, qua arte, quave

hora elatum corpus ex illa fuerat, rescire impossibile fuit de temulentis gestatoribus. Ne quid tamen negligere-
tur, quinque continuis horis per enar-
rata priore in casu artificia, imo plu-
ribus aucta, revocandæ vitæ allabora-
tum, sed iterum frustra, est. Cum
Justitiæ publicæ interesset nosse spon-
tene, an vi, esset in fluvium præceps
datus, contusione potissimum suspi-
cionem movente, cadaver, quod non-
dum multum putredinis ostendens lu-
benter, concessa venia, aperuissem,
Judicum examini relinquendum erat.

Die 18. mensis ejusdem adduxerant
in Nosocomium Fabrum lignarium,
quem pridie in hilaritate, ad jactum
primum ædificii lapidem consueta, sic
vina ceperant, ut ex porta Viennen-
si, quam *Stubenthor* appellant, vespere
egressus, nec pontem nactus, recta
se in fluvium Viennam præcipitem da-
ret,

ret, vadofam eo tempore adeo, ut media vix ultra fesquipedis haberet altitudinem. A tempore vespertino usque ad 4 $\frac{1}{2}$ matutinam horam fluminis incola, conspiciebatur tandem ab iis qui pontem transibant, in vultum pronus. Igitur supinarunt eum, hosque inter auriga, fune ad collum stricto, toties attollebat corpus, quoties transeuntium plures contueri vultum gestirent. Cursum intera fuit ad Suburbii Judicem, quo jubente effertur aqua, & hora octava infertur in meum Nosocomium. Quantulamcunque spem mihi daret corpus 10. vel 12. horas submersum, continuoque quadrihorio ad vota cujusque de curiosa plebe constricto collo eVectum, cum recens tamen esset, operam consuetam impendere illi debui. Unde primum syphone ei tabaci fumum in posteriora immisimus, aëremque in os inspiravimus. Frictio facta

deinde universi corporis linteaminibus fumo Mastiches, Olibani, Sarcocollæ, & Baccarum Juniperi penetratis, agitato præcipue, mutatoque inter fricandum pectore, atque ventre. Ex vena jugulari dextra aperta sanguis jactu pleno exiliit unciarum IV. quantitate, fluidus quidem, sed frigidus omnino, guttatimque alias IV. uncias vena dedit. In lecto ad ingens, copiosoque igne instructum hypocauftum admoto, collocatum corpus est, ignitabuloque stragula, quibus contegebatur, continuo calefacta sunt, quodemum universo corpori calor naturalis restitueretur. Tuncque Spiritus vini haud modica portio infusa illi in gulam est; protractoque ventris atque thoracis sub stragulis frictu, sanguinis guttulæ de naribus stillarunt: Frictio repetebatur primum sicca, dein aut cum Vini spiritu, aut Balsamo vitæ,

vitæ, aut spiritu Cornu Cervi, aut aromatico fumo, similiaque, ut & fumus tabaci, in os ejus & nares inspirabantur. Tunc quoque vena jugularis altera est, vix autem quidquam fudit. Enema fumosum iterabatur, lenteque & prudenter nostra Machina, *Italica* dicta, moderate calidam aquam in Intestinum Rectum injecimus. Repetito enemate fumoso, corpus cineribus calidis totum involutum bihorio jacuit. Ad hæc omnia non modo non revixit corpus, sed foetorem cepit adeo intolerabilem spirare, ut examinandum judici, tumultandumque, protinus fuerit.

En denuo quinque vicibus frustratum successu laborem, eumque improbum, assiduum, nec minus quinque sexve horarum spatio in plerisque, antequam vel hilum remitteretur, continuatum! Quanta in illo fortunæ dif-

differentia, præ ea *Batavorum*! Verum quanta quoque differentia, cum moræ in undis, tum præcipitis post elationem ex iisdem auxilii! Nunquam enim hucusque ea fortuna mihi obtigit, ut mox eductis de flumine merfis manus auxiliatrices admoveere licuerit. Sola tamen lege hac, casibus rarioribus, ac nonnihil forsan suspectis, exceptis, felicia aliarum gentium conamina fuerunt. Hac eadem conditione felices & *Austriacæ* gentis fuere conatus, ut trino exemplo *Tommo XIII.* ostendi, utque recens, quod nunc memorabor, exemplum testatur.

Contigit hac æstate in *Arce Stranersdorff*, ut *Operarius*, aliqua arcis in turre reparatione occupatus, de turre caderet sexaginta pedum altitudine in tectum arcis; inde resiliens, inque lacum, capite humili, præcipitatus, mox fundum peteret, iis, qui

qui aderant, haud ultra conspiciendus. Elapsa horæ pars quarta est, antequam extraheretur; extractus ne minima vitæ signa præbuit. Capite declivi agitato, parum aquæ ore reddidisse fertur. In ripam ductum solis ardenti tunc admodum calori exposuerunt, iterato concusserunt, pendulo capite agitarunt, ore autem exiisse nihil tunc dixerunt, nisi alimenti quondam sumti portionem, ac sanguinis grumosi tantillum. Soluto postmodum, quod collum arctaret collari, horrende boare, vimque ad respirandum ingentem edere cepit. Madidis vestibibus tunc exutus, in Letum repositus est, in quo varii spiritus, præcipue vero Aqua dicta *Pra-genſis*, naribus & affricabantur, & instillabantur, linteamine calido repetitive involvebatur, unguentum rubrum dictum, in potu Theæ solutum, in

os infundebatur, dorso pectoreque eodem fricabatur, vulnera seu ex- coriationes, cadendo contractæ, vi- no calido lavabantur, ac deligaban- tur; tandem a balneatore, procul in- de quæsito, nunc accedente, vena se- cabatur. Balsamo hoc diebus non- nullis adhuc usus, brevi tempore integre convaluit.

Quatuor hæc exempla docent haud infeliciorem ceteris *Austriam* fore, si matura auxilia his, quos unda diutius morata non est, præberentur. Mul- taque me nunc spes alit fore ut plures in vitam restaurentur, propter Excel- lentissimi atque Nobilissimi Comitis *de Seilern*, Urbis Prætoris præstantissimi, nunquam satis laudandam, ac pene incredibilem ad exequendas leges vi- gilantiam; Magistratusque nobilissi- mi assiduam eundem in finem curam solertiamque; a quibus id expectan- dum

dum est, ut urbium pagorumque & Judices, & Medici, Chirurgique, sui quique officii memores, neque ultra putrida neglectave cadavera ad me mittentes, AUGUSTISSIMÆ maternis pro subditorum suorum singulo curis, supremoque ejus mandato, prompti pareant.

CAPUT II.

Recensio novorum experimentorum
ad illustrandum, promovendumque,
Submersorum auxilium.

§. I. *Experimenta in XV. canibus capta, qui primum submersi, aut suspensi, dein tentamenti omnimodis, ut, si quā sopita vita superesset, resuscitaretur, subjeti; tandem omnem laborem ludentes, cultre anatomico lustrati fuerunt. In omnium Pulmone, duobus exceptis, signa plura, minorave, inventa sunt aquæ inspirate,*
de-

deglutitæ vero nulla; & in singulorum capite, duobus exceptis, nulla signa Apoplexiæ.

§. I.

Quamvis merito confidamus hocce negotium mortalibus magis cordi fore, pluresque horum infortunatorum in usum vitæ redituros, inficias nihilominus non eo, & gravè difficileque negotium esse, & eorum, quibus etiam mature admota sit manus auxiliatrix, neque notabilis fuerit nexa in flumine mora, plures non resurgere. Nondum clare satis evictum est, quodnam proprie & vere mortis genus sit, quod merfos necet. Equidem experimentis, analogia, confectisque inde ratiociniis, quæstio hæc quandam videbatur certitudinem adepta, post Plateri, Littrei, Beckeri, Dethardingii, Senaci, aliorumque, labores: ut ego sanè eorundem

autoritate permotus, litem fere decimam Tomo meo XIII. censerem; ita quidem, ut neque Ventriculus aquam hauriret, neque Pulmo, sed respiratione aëris penuria impedita, mortis primo simulacrum, brevique mors ipsa, sequeretur Verum enimvero haud perpauca contigere postmodum aliis, occurreruntque mihi nonnulla, quæ in meo Commentario, quondam super hac lite observata, notaveram, eam mihi dubiosiore, quam unquam, reddiderunt.

Hæc tandem me impulit causa, ut rem ad incudem revocarem, adeoque repetito meo Canicidio, primum aqua mergerem hæc animalia, deinceps quæcunque & antiqua & nova adhiberem incitamenta vitæ, ac denique singula mortua lustrarem; ut quænam eorum in corpore partes, sive eadem perpetuo in singulis, sive in

aliis aliæ, afficerentur; quidque in illis aut mutatum, aut corruptum, aut ratione quacumque vitæ continuandæ ineptum videretur, intelligerem. Quindecim hujus generis bruta prioribus experimentis laudati sæpius hujus Operis Tomi immolaveram: numerosiora longe novorum experimentorum Victimæ erunt.

§. II. Die 23. Aug. hujus quem vivimus, anni, XVI. canem in aquam, Curcumæ radice impense flavam, merfi canistro vimineo, cancellato, lato sic, ut movere se in eo bestia posset. Quinque minorum spatio mortuus videbatur. Crassa, flava, non pauca, eaque spumosa materies, aquæ superficiem texit, quæ utrum per superiora, an per inferiora, reddita fuerit, cane in aqua latente, discriminare non potui.

Bihorium integrum resuscitandæ vitæ impensum est. Tentamina con-

fimi-

similia eorum fuere, quæ in hominibus Cap. I. facta, retuli. Eadem facta & in cunctis sequentibus fuerunt. Cum tædiosa foret singulorum repetitorum recensio, monebo duntaxat, hic eadem, ut mox retuli, in singulis canibus sic facta esse, ut ordine vel turbato, vel inverso, vel geminato, vel denique truncato sæpe, perficerentur. Si autem quid novi aliquando tentatum fuerit, aut singulare quidquam a cuiuspiam applicatione contigerit, suo in loco docebo. Caniculi nulli experimento submissi sunt, sed omnes canes plurium mensium atque annorum, variæ speciei & magnitudinis.

Canem itaque hunc nulla vitæ signa edentem, aperuimus. In ventriculo nulla aqua; in aspera arteria atque bronchiis, subflavus liquor, copiosiusque idem, ac spumofus, percussisque de lobis sponte profluens.

Canem XVII. vitæ adeo tenacem reperiimus, ut non, nisi expletis decem minutis, sub aqua quiesceret. Consueta fuere molimina nostra; nisi quod ipsi butyrum aqua fustum in gulam, quo vomeret, injectum sit. Non vomuit. Horam hic laboravimus duntaxat.

Num in ventriculum aqua merfionis introiisset, asserere nequeo: Ille enim, nec non Intestina, ea turgebat, quam in anum Machina nostra injeceramus, aqua. In Trachæa parum liquidi spumosi inerat; paulo plus ex transcissis effluxit, compressisque, Pulmonibus.

Canem XVIII. majorem, fortem, intra sesquiminutum Submersionis tranquillum in unda vidimus. In hunc omnia nota artificia adhibuimus, prætereaque eum virgis primum, dein & baculo, molliter quidem principio, rudius autem deinde percussimus. In
bal-

balneo calido plus quam semihora fuit, continuoque in eo frictus; venam jugularem tunc sectus, unc. IV. cum dimidia sanguinis tepentis dedit.

Post septem horarum laborem fætuit sic, ut aperire eum noluerim.

Canis XIX. post sex horarum tentamina eadem de causa apertus non fuit.

Die 10. Septemb. Canem XX. in nigram ex atramento aquam mersimus, vita adeo tenacem, ut novem minutorum spatio, quemadmodum jubet *Virgilius Georg I.* cum ovibus a scabie mundandis facere,

Balantumque gregem fluvio mersare salubri;

Sic quoque mersare illum, aut sæpius mergere, debuerimus. Spatio quinque horarum operationes quatuordecim factæ sunt.

Horis circiter decem a cessato labore elapsis, apertus fuit. In ven-

triculo & cibos invenimus ; & nostræ injectionis liquorem. Neque in Trachæa, neque in singulis loborum bronchiis , neque etiam in transcissis lobis , aqua inventa est, quæ videretur nigricare debuisse ex atrata aqua. Parum quidem liquidi spumosi premendo expressimus, at vero idem ex omni quidem cadaverum pulmone exprimere solemus : eratque tam parum, ut quotquot eramus, hæreremus ancipites, an plus foret, quam ex pulmone non submerso. Quod autem non nigresceret hic liquor expressus, non valde urgeo : nam aquam postmodum examinantes, adeo leviter tinctam deprehendimus, ut vix tingeret chartam, utque eam in posterum atriores parari oportere statueremus. Num pulmones turgidi fuerint, potius annuerem, quam negarem. Quia tamen in serie experimen-

mentorū , ipso , quo fierent , momento , conscriptā , hoc omissum fuit , neque unquam in ejusmodi casibus memoria supplere quidquam amo , dabo hoc experimentum ut dubium , & defectuosum.

Canis XXI. , non parvus , in aqua pura submersus , mortuus videbatur expleto quinto minuto. Præter experimenta consueta , injectum in gulam emeticum fuit , compositum ex Aqua , Tartari emetici granis quinque , & Radicis Ipecacuanhæ scrupulo : a quo cum vomitus non excitaretur , aqua tepide injecta est ; verum & frustranea hæc. Tempus operandi septem horarum fuit.

Post X. horas aperuimus canem. In ventriculo & cibus inerat , & injectæ aquæ tantillum ; in cibos quippe siccos pars imbibita erat , pars inter operandum agitandumque de ore

manaverat. Pauca spumosa materies in pulmone, ut in proxime priore. Nihil ultra in notis invenio.

Canis XXII. in quinque minutis secundis mortuo viso, protinusque exsiccato, ictus electricos centum spatium 16. minutorum dedimus, ictusque plures in nares determinavimus, in fauces, in oculos, inque dentes. Postea frictus spiritu vini camphorato est min. sec. decem spatio.

In ventriculo nulla aqua, cibi autem non pauci. Spumosum & cruentatum serum inventum in Trachæa est, idemque plaga incisi pulmonis quæcumque copiosum fudit.

Canis XXIII. intra quinque minuta mortuo viso, vim electricam admovi, ictum *Muschenbroeckianum* infligere frustra conatus.

Nulla in ventriculo aqua: spumofus liquor pulmonis, aliquanto, quam
in

in priore quidem parcior, haud tamen paucus.

Canis XXIV. post septem minuta Submersionis quietus, tremulos convulsivosque Musculorum Crotaphytôn & Masseterum manifestiores, diuturnioresque, quam quisquam præcedentium, motus habuit. Post detersionem atque frictionem octo minutorum, dabantur fortes admodum electrici ictus numero decem, ad roboratam egregie Machinam. Post quatuor minutorum quietem, alii ictus valentes viginti; iterumque post aliquam pausam ictus adeo validi, ut ignis ex eo eliceretur. Tentaturi ictum *Musschenbroeckianum*, vitrum, requisita aquæ copia plenum, ad posteriores bestię pedes arcte alligavimus, pedem priorem ad electricum tubum admoventes: at vero ictus non nisi debilis prodiit, minorque longe,

quam ad ictus priores, corporis universi concussio. Suspicati num pili forsitan obessent, longe lateque totondimus eas, quibus vitrum exipiendum esset, partes; at vero ne sic quidem concussio validior: aqua vitri tamen tanta vi electrica prædita erat, ut ad appropinquans ferrum fortem ictum, scintillamque, generaret.

In ventriculo nihil; abundantiorrem autem aquam spumofam neque ex aspera arteria, neque ex singulis lobis pulmonum percissis, unquam eduxeramus.

Subiit deinde animum, noscendi quid omnia nostra tentamina in laqueo suspensis facerent, desiderium. In mandatis quippe erat haud minus his quam submersis, auxilium tentare. Vir inclytus *Morgagni* Epist. XIX, feminam noverat, quæ strangulata a nocturnis furibus

ribus, quo tuto ædes expilarent, sic ut interemptam esse nemo dubitaret, demum ad se redierat, sanguine de brachio ac pede misso, datisque Cardiacis. Similibus auxiliis, quibus apud *Riolanum*, & *Baconem Verulamium*, fomenta, calidaque balnea, addita legimus, ejusmodi alios ad sanitatem rediisse comperiimus.

Canem itaque XXV. fortemque eum, atque minacem, laqueo strangulavimus; quo in opere antequam ille caninam suam animam efflasse videretur, minuta elapsa decem sunt; quin & tremuli in capite musculorum motus longe & validiores, & diuturniores, quam unquam in animali submerso, apparuerunt. Mox mortuo, atque picea in tabula locato, tempore electrificationi egregie favente, ictus fortissimos conciliavimus numero viginti. Deinde canem totum electrea

vi imbuimus sic, ut ex illo validus ignis eliceretur, utque inconsiderate ego illum tangens, ictum tulerim, quam nunquam in vita mea, valentio- rem, ingratumque illum, & adeo dolorificum, ut digitus ultra horam doleret, humerus autem ultra quadri- horium. Porro ictus ejusmodi qua- draginta tulit canis. Ut ille profecto ictus experiretur *Musschenbroeckianos*; pe- de quippe cum anteriore, tum poste- riore, peculiari catena ligatus, recta a Machinæ accremento oriunda. Mo- nendum tamen est concussus anima- lis eo debiliores observatos esse, quo Machinæ diutius subiectum fuerit; sic ut tandem vix moveri, vel a va- lentissimis ictibus, videretur. Hisce integram occupati horam, clyisma tabaci fumificum injici, abunde fri- cari, unciamque spiritus vini cam- phorati, cum tribus aquæ unciis, in-
ven-

ventriculum instillari, curavi: quorum deinde ad singulam femihoram unum, alterumque, per horas quinque repetitum fuit.

Sequenti mane rigidissimum canem aperientes, vidimus omnem nostrum injectum liquorem ossibus, ceterisque valde copiosis ventriculi alimentis, ita imbibitum esse, ut ille fere ficcus appareret. In pulmone non videbamus plus feri spumosi invenire, quam in pulmone sive non suspensi, sive non submersi, animalis.

Canis XXVI. magnus ac ferox, sic submersus est, ut in suo cophino nunc sub unda, nunc supra eandem detineretur, quo & respirationem sæpius revocabat, & recolligere sese videbatur; idque ad quartam usque vicem; postquam in altum ductus, penitus quievit. Novem tunc elapsa minuta erant. Convulsio maxillæ pauca,
le-

levisque, supererat modo. Mens quippe nobis erat explorare an, qui emer-
si aliquoties, adeoque aliquoties re-
spirantes, ac demum subsidentes, pe-
rempti videntur, facilius his, qui ab
initio recta fundum petunt, in vitam
revocentur? Vulgique nunc more
curam aggressi, in pedibus sublatum
eum, & capite declivi, concussimus:
quo in opere eam mirabamur sive pu-
ram, sive turbidam, sive spumofam,
sive denique cruentam aquam, quæ
vel ex ore naribusque, vel separatim
ex alterutro, profluebat. Cessante
hoc profluvio, si repositus parumper
canis denuo ferebatur in altum, pro-
dibat hic fluor iterato, paulatim ta-
men minor, in quartam usque vicem.

Pannis ficcis calidisque fricuimus
eum sex minutis, aërem nostrum, tu-
bo in glottidem immisso, inspiravimus
minutis duobus, deinde per undecim

mi-

minuta follis ope; pulcre motum co-
starum ventrisque, ut in vivo anima-
li, interea contemplati. Prima autem
vice notabile quid observavimus, im-
misso, inter aëris enarratam inspira-
tionem tabaci in Rectum fumo, qui
minuti primum spatio injiciebatur,
pausaque minuti interposita, iterum
per duo minuta continuabatur: den-
sus enim, copiosus, nec interruptus,
tabaci fumus animalis ab ore expira-
bat. Postque frictionem interpositam,
repetito eodem fumoso clystere, pro-
tinus denuo exivit ore fumus. Per
quinque horas variæ operationes fa-
ctæ sunt; fumus tamen repetito inje-
ctus, haud ultra ore expiravit.

Sequenti mane aperiens, inanem
liquido ventriculum reperii, ita ut,
quod iterato pauca simul copia inje-
ctum in illum liquidum fuit, id siccis,
quibus ventriculus turgebat, alimen-
tis,

tis, absorptum esse, vel Pyloro jam transmissum, necesse sit. Pulmones vulnerati profuderunt rivos aquæ spumosaë.

Dixi aquam copiosam, suspenso posticis pedibus cane, juxta caput defluxisse. Vulgo ore eam naribusque profluam censent, quantum ejus toto de corpore juxta caput defluat, non advertentes. Id porro quo discriminaremus, deterimus sic bestiam, ut de corporis superficie defluere ultra nihil secundum caput posset; evidenter tunc, quod paucum prodiit, id naso & ore prodire vidimus.

Coli atque Intestini Ileï bonam portionem, cujus in medio Valvula Tulpïi erat, excindentes, aëremque flando æque facile illac, quam istac transprimentes, nullam invenimus resistantiam Valvulæ a Cœco in Ileum, pro-

proptereaque fumum tam facile, tamque cito, ore exhalasse conclusimus.

Canem XXVII. mediocrem, nigrum, laqueo strangulantes, octava horæ parte laboravimus, priusquam mortuus videretur. Incisa mox jugularis vena fuit, quo revelleretur a capite cruor, vix autem turgebat vena, vixque sanguinem dabat. Igitur altero in colli latere secturi, venam adeo vacuam invenimus, ut nullo modo sub conspectum caderet. Non collegimus plus uncia. Spissitudinem autem cruoris falso quis hic accuset, nam fluidus erat, sanique sanguinis instar in insulam serumque stando abibat. Nihilo plus sanguinis incisa dabat sinistro in femore vena. Guttulæ sanguinis quidem ex naso stillaverant, sed hæ vix universi copiam imminuere cruoris. Canem tunc in balneum moderate calidum conjecimus, ore naso-

que surrectis, ea spe fore, ut venæ apertæ abundantius fluerent, præcipue frictione corporis perpetua adjunctæ; nihil vero dederunt. Tentavimus an resuscitato, per aërem folle inspiratum, thoracis motu, motaque sic circulatione, sanguis de venis proflueret, sed nihil omnino; licet operatio hæc ultra mediam horam prolongaretur. Reliqua ut in ceteris per bihorium: quinque deinde horis ad singulam mediam horam varia tentamina repetebantur.

Encephalon cruore turgidum fore rati, dubitavimus essetne dura Mater justo rubicundior, nec ne? Pia Mater æque ad basin cerebri, quam ad ejus latera, superficiemque, omnino naturalis. Nihil abundantis sanguinis effusi in Ventriculis, nec in toto cranio. Pulmones turgidi, rubicundissimi, hinc inde jam purpurascens;
aër

aër immissus in colon, facile in Ileum transmittebatur: enema fumi tabaci tamen injectum non erat ut in proximo priore, sed ex aqua communi cum salis communis, & spiritus vini camphorati ana uncia media.

Canem XXVIII. non minus priore vitæ tenacem, strangulavimus quoque. Jugularem venam tutius certiusque secturi, cutim totam amovimus, quo & perspicua magis vena esset, & longiore fauciari vulnere posset. Verum vix sesqui dragma sanguinis extillavit, licet non modo partes vicinas fricaremus, sed etiam ligaremus infra vulnus venam. Labor deinde, qui in prioribus, peractus est.

Utraque in Encephalo Meninx adeo naturaliter se habuit, ut nihil naturalius. Nullus effusus in cerebri ventriculis sanguis, nihil in ejus basi. Ventriculi omnes cerebri humore va-

cui. Sinister Pulmo sanguine turgidior eo canis prioris, dexter minus.

Canis XXIX. aqua demersus spatio minuti mortuus videbatur, ob quosdam tamen convulsivos motus post elationem ex aqua perspectos, eum adhuc quinque minutis in sua sporta demersimus. Ei postmodum posticis pedibus elato, plurima aqua quinque minutorum spatio secundum os defluxit, interea dum pectus & abdomen manibus multum agitaremus. Attenti autem & avidi noscendi unde aqua hæc, partim primo ex ore & naribus, partim de universi corporis superficie; deinde a sola superficie, nihil ex ore, quod apertum servabamus, effluentem cognovimus. Horæ sex transactæ sunt solitis nostris tentaminibus.

Pia Mater adeo infarta sanguine, ut felicissima injectio vix præstare parum posset, haud in superiore dunta-

xat parte, sed & in toto ambitu, ipsaque in basi. Ventriculi cerebri vacui. Rubicundi valde Pulmones, & quocumque in loco vulnerarentur, aqua spumosa multa manarunt. In Ventriculo sola nostra injectio, ciborum parum.

Canis XXX. a Submersione quinque minutorum posterioribus cruribus suspensus, eadem dedit, quæ dederant priores, phænomena. Et hujus vena jugularis sesquialteram modo fudit sanguinis unciam; in calidum autem balneum cani postea immisso, adeo copiosus fluxit, ut profunde cruentata videretur aqua. Experimenta priorum etiam hic facta horis quinque.

Octo horis a finita opera elapsis apertus, exhibuit nobis Piam matrem universam admodum quidem, minus tamen quam proxime præcedens, ru-

bicundam, Ventriculos quoque vacuos. Ventriculus ut canis proxime prioris. Pulmo colore, humorisque effluentis abundantia, priori par.

CAPUT III.

Animadversiones in Capitis ultimi, ac penultimi, tentamina, quæ partem quidem difficultatis illustrasseprehenduntur, partem vero minime.

§. I. *Exiguus in vitam revocationis successus, hic primum exponitur, ab auxilii admoti tarditate.* §. II. *Objectio formatur ex successus defectu in iis etiam canibus nostris, quibus omnia præsidia nota protinus admota fuerunt. Respondetur primo a natura canum, ceterorumque animalium, cum ea hominum comparata. Secundo a differenti modo hominum casu infortunato, Et canum de industria, submersorum. Confirmatur ex*

Hal-

Hallero, Morgagni, & Zacchia. Tandem noster in Canibus labor negatur infelix esse, eo quod, inito calculo, decimus sextus servandus fuisse videatur, ni ipsi nos mortis in causa fuisset.

§. III. Causa discrepantis de natura mortis Submersorum sententiæ, exponitur a præcipitatione Medicorum, ex paucis exprimentis concludentium de re, ad quam plurima experimenta vix sufficiunt. Experimentorum hucusque factorum vi, sententia de aqua a Demersis deglutita, deque enormi ventriculi tumore, apoplexiam generante, infirmatur. Respondetur objectioni de duobus canibus petitiæ, ac primo quidem ab Anatome frequentiore: secundo autem, ab inutilitate causæ hujus ad generandam apoplexiam in casu, in quo excogitari alia, longe potentior, possit: Tertio vero, a paucitate experimentorum hoc asserentium.

§. IV. Plura longe experimenta mortem Peripneumoniam, quam Apoplecticam Submersorum, innuere videntur. Gravis obiectio fit contra consuetudinem, aëra in Mersorum Pulmonem inspirandi, contraque Laryngotomiam.

miam. Ad hanc Objectionem opponitur usus, experientia, eventusque felix, apud omnes gentes ab hac aëris inspiratione observatus; experimentis nihilominus ulterioribus tentandus, priusquam omni exceptione major dicatur.

§. I.

Pausari hic aliquantum ab experimentis oportebat, eaque ipsa examinari; &, an quid inde disci, elucidarique proposita quæstio posset, accurate inquiri.

Ac quidem 1^{mo} fatebitur quicumque hæc legerit, nunquam plura tentamina facta fuisse ad bestias, a submersione resuscitandas, quam ego fecerim, quæ omnia vero successu caruerint; uti & illa, quæ in hominibus.

2^{do} Evidens causa in hominibus non succedentis experimenti patuit & longior eorundem esse mora in undis,

dis, & delatum nimis ab elatione auxilium. Tres conservatorum historiae, quibus pars operis hujus XIII. superbit; quartaque, quam supra pag. 28. retuli, ubi neuter horum defectus adfuit, id, quod assero, evincunt abunde. Ut profecto nullus dubitem, quin nostram hac in parte fortunam cum ea ceterarum Nationum, Batavæque præfertim, parem propediem lætemur, ubi & de possibilitate probabilitateque restorationis, & de Conscientiæ obligatione, qua haud Medicus, aut Chirurgus solummodo, verum mortalium quisque, ad auxilium modo quocumque præbendum teneatur, omnes & singuli convicti erimus.

§. II. Facile hanc meam assertionem eludere quis tentabit forte, exemplo triginta Canum, quorum nullus servatus fuerit, quamvis nec mo-

rati diu in aqua essent, nec prompto efficacique auxilio destituti.

Hic vero, quæso, mecum perpendat primo, quod aliorum meaque experientia biennio abhinc problematice proposuerim, An scilicet canum submersorum, aut suspensorum, quam hominum, tentata in vitam revocatio, longe difficilior non foret? Confirmat optimus *Hallerus El. ph. Tom. 3. pag. 249.* „Neque enim spem nimiam „fecero, inquit, qui aliorum quidem „felicem industriam laudem, ipse vero animalia vere sub aquis suffocata, „etiam post perbreve tempus, nulla arte potuerim suscitare.“ Animalia porro hæc canes præcipue fuerunt. Perpendat præterea, num difficultatem hanc non augeat mergendi modus? Nequaquam enim quotquot homines merguntur, protinus subsident. Neque, ut canes mei plerique, vi trundun-

duntur deorsum, ut ne respirent, sed, horum saltem haud pauci, brevius longiusve cum flumine pugnant, iique præcipue, qui norunt *æquoreum nando carpere iter*. Quam ob causam in Historia navali tot nautas legimus, nandi gnaros, feliciter emeruisse; si vero non emerferint, diutius luctatos esse cum undis. Neque etiam nandi ignaros semper contingit sic vasto gurgite mergi, ut non subnatent subinde, pectusque aëre reficiant. Quin & in Submersorum Historia flumine vectos offendimus facie prona, ut aliquantis per respirare potuerint. Multum motitare se alii leguntur, licet non edocti natatum; & ut Poëta ait *secare spumantem pectore fluctum*, antequam submergantur, ita ut labantem respirationem, morantemque humorum circulum, aliquoties resuscitent, antequam viribus destituti submergantur.

Mei

Mei plerique canes, in Canistro inclusi, merfi sic sunt, ut neque nare potuerint, neque quo aëre pectus refocillarent, supernatare. Unde in eorum plerisque vita ilico extincta fuit, quam in Submerforum hominum non paucis ejusmodi molimina a letali extinctione paulisper morantur. Non incongrue huc referri eorum querelæ possunt, qui apud *Ill. Morgagni Ep. XIX.* „ non usitatis modo, sed exquisitioribus etiam, quam a quovis adhuc proposita sunt, auxiliis, se frustra usos adeo fatentur ad Canes plures, sub aqua octo haud amplius minuta demersos, in vitam revocandos; ut spem fere omnem nobis adiungunt submersis hominibus succurrendi. „ Mittit porro hic Autor illos, qui hæc de frustrato in canibus labore querelas edebant, ad feliciores plurium hominum restitutiones, con-

consolaturque eosdem Medici Romani Zacchiæ verbis, ad quem cum detulissent esse juvenem, qui post horam flumine exemptus penitus restitutus esset, respondit: certum esse debere, non modo hoc miraculosum non esse, sed neque inter ea eventa connumerandum, quæ multam admirationem audientibus excitare consueverunt.

Tandem desperatam adeo Canum Historiam esse, quam primo intuitu videtur, omnino nego. Canis Octavus Tomo XIII., & ut in sequentibus patebit, Canis XXXII. & XLI. Tomi hujus, resurrecturi fuisse videntur, ni priorem Venæ Sectionis neglectus, alterum operatio crudelis, posteriorem venenum altius in bronchia infixum, peremisset. Servata hac proportionem, de centum Canibus sex reviviscerent. Si itaque demerlorum hominum, fuspensorumve, aut & suf-

focatorum, decimum sextum quemque servaverimus, nunquid non erit, quod gaudemus? Et forsan labori & industriæ humanæ in opus adeo & humanum, & christianum, sic benedicet OMNIPOTENS, ut eorum longe plures servemus.

§. III. Causa intelligitur discrepantiæ Sententiarum inter Medicos, de vera Submerforum morte, deque præcipue affectis partibus, æcerbe litigantes; suam nihilominus sententiam experientia anatomica utrinque confirmantes. Qui aquam statuerunt inundare pulmonem, idque submersi demonstrarunt, cadavere; qui ex adverso id negarunt, quod aquam in cavo pulmonis aëreo haud reperirent, vera dixere utrique: condemnandi tantum in eo, quod alter affirmasset id semper esse, quod semel, bis, decies, deprehendisset; alterque negasset quod semel

femel iterum in suo cadavere defuisset. Hominum demersorum cadavera non licuit mihi aperire hucusque; de quindecim vero canibus hujus anni tredecim aperiens, bis aquam in Trachæa non reperii: si duos modo canes istos aperuissem, pluresque incidendi occasionem aut non habuissem, aut mihi non comparassem, nunquid aquæ in demersorum pulmone præsentiam jure negassem? Et e contrario si modo undecim canes, quorum pulmo aquam gerebat, aperuissem, & non illos duos, quibus experimentum defecit; rectene statuerem deficientem nunquam in Submersorum pulmonibus aquam esse? Crediderem fuisse, qui aqua turgidum invenerint Submersorum Ventriculum, hincque apoplecticorum more perire submersos censuerint, exemplum testatissimum se ab ea Apoplexiæ specie, quæ

quæ ab oneratiore Ventriculo gignitur, habere rati. Perperam tamen & negarunt causas alias; & hanc solum Mortem conciliare submersis statuminarunt. In tredecim, quos aperui hucusque canibus, inundatum non inveni Ventriculum aqua; gnarus autem quantus experimentorum numerus sæpe requiratur, ut inde sententia formetur omni exceptione major, non auderem perpetuo ejusdem in Ventriculo notabilem negare quantitatem. Qui magni *Musschenbroeckii* in experimentis adeo frequentis, simulque prudentis, sententiam tenet, non nisi iisdem & numerosioribus, & idem clamantibus, conficere aliquid audet. Defuit aqua in meorum Ventriculis, ut autem deesse semper, tanquam mortis causam, definiam, longe plura Submersorum cadavera me aperire oportet. *Tanquam mortis causam* ea propter

pter dico, quod homo, aut canis, brevi ante submersionem aqua bene potus, eam in ventriculo gerere, dum aperitur, potest; citra eam tamen consequentiam, quod hæc aqua deglutita ab eo sit, dum mergeretur: haud alia sane ratione, quam duæ cerevisiæ libræ in *Dethardingii* militis ventriculo inveniebantur, quas momento, antequam mergeretur, abligurierat.

Infirmatur interea hæc opinio de deglutita a Submersis aqua, consecutaque eam ob causam morte, 1^{mo} ex defectu aquæ hujus in tredecim canibus: 2^{do} ex defectu signorum apoplecticæ mortis in encephalo, apoplexiæ sede, in recensione anatomica cadaverum, quæ post Submersionem aperta fuerunt. *Vid. Morgagn. Ep. XIX.* 3^{tio} ex demonstratis aquæ in Submersorum pulmone cum præsentiâ, tum effectibus: sed de hac ultima ratione mox pluribus,

Interim quantumvis hæc sententia datis de causis debilitatur; aliquid denuo roboris capere videretur ex canum meorum N^o XXIX. & XXX. quorum hic Piam matrem admodum, ille vehementissime, inflammata ostendit.

Verum 1^{mo} in laudata mox epistola *Morgagniana* Submerforum cerebra nullam affecti peculiariter encephali dederunt demonstrationem. 2^{do} Etsi etiam in illis omnibus reperta similia forent, an, retardato in Submerforum pulmone humorum circulo, sic affici caput non posset, ut ad eam explicandam pressione tumidissimi ventriculi haud egeremus? 3^{tio} Ex præcedentibus vere, ni fallor, id confecimus, quod non duobus, non tribus, sed numerosioribus experimentis opus sit, antequam aliquid certi eliciamus. Ad experimenta recen-

centiora , brevi referenda , hanc quæstionem resumam.

§. IV. Aquam Submerforum pulmonem subire, seque in omnia bronchia, bronchiorumque ramulos, insinuare, atque mole sua sic illos, vesiculasque premere, ut omnis sanguinis sistatur per arterias venasque fluxus, sicut hominum cadavera in scriptis medicis, ita ea octo canum meorum, ostenderunt: duobus equidem canibus videbatur experimentum deficere; sed hujus defectus nonnulla forsan ratio haud improbabilis reddi posset. Malo tamen hanc discussionem recraftinare, & post recentiora experimenta, quorum recensioem hoc ipso opere dabo, revocare. Sed quæstio gravis sequens prius examinanda est.

Supposita morte Submerforum ab aqua inundante pulmonem nata, an

omnium nationum consuetudo inspi-
randi aërem in Submerforum pulmo-
nes; an nostri ad id aucti per follem
conatus; an inspiratus post trachæo-
tomiam, quondam institutam a nobis,
aliisque laudatam, aër, suffocatam in
pulmone respirationem, circulatio-
nemque humorum, resuscitabunt?

Non vana utique hæc quæstio est.
Pulmonem in inspiratione copiosior,
in expiratione minor, semper tamen
aliquis aër replet. Aqua aut ante se
aërem pondere suo premet, inque ul-
tima brônchia atque vesiculas pellet,
aut intime cum eodem commiscebitur;
nisi quis crediderit eum ab aqua pres-
sum vi per glotidem exire posse.
Quidquid horum sit, aër paucus, ore,
folle, trachæotomia, inspiratus in tra-
chæam, redibit in os, a superficie re-
pulsus aquæ: plurimus vero ille, violen-
teque inmissus, aquæ in trachæa su-
per-

perficiem primo premet, dein cum aqua commiscebitur, augebitque vaporum sanguineorum pulmonis, quam aqua inchoaverat, pressionem, adeoque ejusdem quietem. Porro experimenta physiologica docuerunt nos, in arteriis venisque pulmonis stratum iter esse, quo ex illis in cavum pulmonis aëreum, vicissimque ex hoc in illas, injecta materies penetret. Violentiore igitur aëris inspiratione pressio hæc augebitur sic, ut aër, aqua commistus, haud modo cavum adimpleat aëreum, sed in ipsa vasa penetraturus sit, sanguinem fluidum spumosumque redditurus, adeoque universam pulmonis aucteris molem: & si egregius *Louis*, in suis *de cert. sign. mort. literis*, in submersi corpore aquam, in pulmones haustam, eosdem sic penetrasse deprehenderit, ut cum solito expansiore pulmone eandem utroque

invenerit in pectoris cavo; quid non ab aëre insuper inspirato, & inspirato tanta vi, metuendum est?

Hoc si admittimus, sponte capimus, quam non vana modo, sed noxia, sed letifera, omnis aëris inspiratio, maxime autem violenta, atque continuata, esse debeat; quamque proinde male hic de bronchotomia, seu potius trachæotomia, cogitatum sit. Oportune huc referatur, quod in sexto Tomo *Encyclopædiæ Edit. Yverd.* Titulo *Bronchotomiæ* ex anonymo scriptore, quem eruditum suspicor *Louisi*um esse, invenitur * „ Bronchotomia in auxiliis ad revocandos a morte apparente

* Enfin on a cru que la *Bronchontomie* étoit un secours pour rappeler les noyés d'une mort apparente à la vie: la persuasion ou l'on est, que les noyés meurent faute d'air & de respiration, comme si on leur eût bouché la Trachée-artere, est le motif de cette application: mais il est constant, que les noyés meurent par l'eau, qu'ils

„te in vitam Submersos, habita fuit.
 „Et quidem persuasi homines, quod
 „aëris respirationisque defectu, æque
 „ac si trachæa ipsis obturaretur, Sub-
 „mersi moriantur, demum pervene-
 „runt. At vero certo certius est, eos
 „inspirata, bronchiaque replente aqua,
 „perire. Differtationem de causa mor-
 „tis Submersorum Academiæ Reg. Sc
 „Par. dedi, experimentorum plurimum
 „eventum, convincentesque continen-
 „tem observationes. Præsentibus Do-
 „minis *Morand*, & *Bourdelin*, ad id ab

E 4

„Aca-

inspirent, & dont leurs Bronches sont remplies, j'ai présenté une memoire à l'Academie Royale des Sciences sur la cause de la mort des noyés, ou je donne le detail de plusieurs experiences, & observations convaincantes, sur ce point. J'ai noyé des animaux dans des liqueurs colorées, en presence de M. M. *Morand* & *Bourdelin*, que l'Academie avoit nommés commissaires pour ver-
 rifier mes experiences, & ils ont vu, que la Tra-
 chée - artère, & les bronches, étoient absolu-
 ment pleines de la liqueur, dans la quelle j'avois
 noyés les animaux, sujets de mes démonstrations.

„ Academia deputatis , Animalia in
„ colorata aqua merſi , conſtititque il-
„ lis eorundem animalium trachæam
„ bronchiaque eò liquore omnino re-
„ pletà eſſe. „

Quantamcumque hæc argumenta
verifimilitudinem præſeferant, expe-
rientia nihilominus contraria docet,
aëriſque laudat, commendat, jubet-
que, inſpiratum. Numerofiſſimæ re-
vocatorum in vitam hiftoriæ hanc aë-
ris inſpirationem laudant; celebresque
Viri, qui Submerſis ſubveniendi præ-
cepta tradiderunt, eandem ſummo-
pere inculcant. *Beckerus* anno 1704.
aëris in Submerſorum pulmone inclu-
ſi rarefactioni, mortem tribuens; *Lit-
træus* *Ac. Reg. Sc. Par. ann. 1719. pag.*
32. &c. edit. in 8. vacuos pene pulmo-
nes, ventriculumque, aqua docens,
ſic ut ſi quandoque aliquid intraverit,
id paucum eſſe neceſſe ſit; *Senacus* *ibid.*

An.

An. 1725. pag. 16. Sc. qui non modo aquam aut inspirari, aut deglutiri negavit, sed eam vel inspirationem, vel deglutitionem, impossibilem statuit; aëris inspirationem in Submersorum trachæam laudare debuerunt: *Petitus ibid. anno 1741. pag. 96.* quoque defectu aëris in illis, non vero aqua aut inspirata aut deglutita, Submersos perire per sua in animalibus capta experimenta credidit; ipsa *Academia Reg. Sc. Par.* quæ anno 1740. § 42. præcepta condidit opitulandi Submersis; præcepta, quæ ad omnes suos subditos miserunt Comes de *Maurepas*, rei marinæ Minister, *d'Argeanson* Parisiorum Censor, & de *Marville* urbis ejusdem Prætor, ut hæc in sua quisque ditione religiose observarent; dexterrimus Vir *Louis* in laudato jam opere; egregius *Isnard* in opere a *Vesuntina Academia* coronato, in enumerandis Submersorum auxiliis

hanc aëris in pulmones inspirationem præ ceteris laudant. Quandoquidem igitur argumenta adversus hanc operationis partem superius prolata, & auctoritatem gravem, & experientiam multiplicem, sibi contrariam habere videntur, non erit cur illam improbemus. Quod si quis regerat plures laudatorum Virorum erroneo de vacuis ab aëre pulmonibus systemate scribentes, hic audiendos non esse; respondeo eosdem etiam contra eum, quo laborarent errorem, utilia præcepta tradidisse; quin & his autoribus neuti-quam auditis, solam hic plurimæ auctoritatis experientiam esse. Hæc hucusque: iteratis experimentis, multorumque numero auctis, hæc resumam.

CAPUT IV.

Ad quæstionem: Utrum iis, qui laqueo suspensi sunt, eadem auxilia præstanda, quæ Submersis, an vero alia? ut respondeatur, examen præmittitur de causa proxima mortis Suspensorum.

§. I. *Cum numerosis Medicis Autor crediderat quondam, apoplexia interimi Suspensos. Obstat nihilominus Virorum haud minus illustrium sententia, Peripneumonia illos perire statuentium. §. II. Respondetur iis, qui in suspendio colli vertebrae, earumve ligamenta, infringi arbitrantur. Morgagni consideratio. Experimenta a Viris claris, Van Doeveren, & Stolte, ad hanc quæstionem illustrandam. Plurium antiquorum, recentiumque Scriptorum Observationes de Suspensorum resurrectione, iisdemque auxiliandi consilia.*

§. I.

§. I.

Anatomicus fufpenforum canum confpectus, an apoplecticæ mortis, Sufpenfis laqueo vulgo adfcriptæ, refutatio non eft? Fateor me, hoc ita credentem, ad hunc confpectum obftupuiſſe; iteratoque celebriores conſuluiſſe Autores. Inquiri quippe in hanc rem oportebat, ut conſtaret, utrum Sufpenforum, quam Demerſorum, eadem auxilia forent; quod quidem lex lata jufferat, dubium vero poſtmodum & mihi, & aliis, moverat; eos apoplectica morte perire ratis. In examine Autorum, conſtitit quidem *Dethardingio* in ſua docta ad *Lucam Schroeckium* Epiftola, de *Methodo ſubveniendi Submerſis per Laryngotomiam*, Sufpenſos viſos fuiſſe hoc eodem mortis genere, quam Submerſos, interire, at ſenſu proriſum eo, ut non Apo-
ple-

plectlicorum more, sed Peripneumonicorum, interirent utrique. *Wepferus, Littreus, Alberti, Brubierius, Boerhaavius*, notant, in Suspenforum non modo externo capite, sed præcipue interno, & turgida admodum vasa sanguinea esse, & effusum sæpe sanguinem se, ruptis iisdem, invenisse; unde illis apoplecticam contingere mortem passim concludunt: color purpureus in vultu, oculi rubri turgidique, rubedo integumentorum capitis; tumida lingua ac labia Suspenforum, sopor, scintillæ, tenebræ, quas ii, qui suspendio supervixerint, se esse expertos testantur, hanc opinionem ipsis confirmare videntur.

Interea alios celeberrimos Scriptores invenire est, qui a lumbrico terete, a frustulo carnis, a pilula, ab ovis induratis, a phaseolo, a piso, a gramine, ab officulo, a nuce, a num-

mulo, in glottidis rimam illapsis, subitaneam mortem accidisse nonnullis, ut *Bonetus Tom. I. pag. 485.* sui Sepulcreti, ut *Petitus Chirurgus, Illustris-que Hallerus*, referunt, edocti; mirantur in cerebro causam mortis proximam quæri, dum adeo perspicua ab intercepta per laqueum respiratione appareat? Nec alia mens *Joanni Mariae Lancisio* erat *Libr. I. de subit. mort. Cap. IX.* „Afferimus primo ex parte
„ instrumentorum respirationi inter-
„ ventionum animalia repente posse
„ interire, si aspera arteria ejusque
„ bronchia obstructa, convulsa, vel
„ compressa, citissime, ac penitus
„ iter aëri per pulmones interclu-
„ dant; ut in laqueo *Suspensis* passim
„ animadvertitur, vel in iis, quibus
„ solidum corpus inter deglutiendum
„ laryngis foramen occludat, vel pus
„ rupta vomica, vel aqua in *Demer-*
„ sis

„ sis per bronchia loco aëris diffusa,
„ non revomantur.

§. II. Hanc vero laquei constrictionem negant alii esse talem, quæ omne intercludat externa cum aura commercium: non respiratione penitus intercepta Suspenfos mori, sed vel fractura vertebrarum colli, ligamentorumve illarum, eos mori quidam afferunt; alii hanc fracturam non negantes iis in Regionibus ubi carnifex in suspensi occiput pedibus insultare dicitur, non admittunt eandem, quibus in locis is carnificum mos non est; adeoque ejusmodi causam proximam mortis Suspensorum statuendam esse, quæ in omnes varios suspensionis modos mortem ex æquo exponat, merito petunt.

Sapienter hic, pro more suo, *Morgagni Epist. cit. §. 38.* “ Quodsi igitur
„ impedita respiratio circuitionem
„ fan-

„ sanguinis per se impedit *intra bre-*
„ *ve tempus* , intra *brevissimum* impe-
„ diet per cerebrum eorum, in qui-
„ bus ob carotides & jugulares, eo-
„ dem tempore laqueo constrictas ,
„ vix tantum sanguinis illud habebat,
„ ut per vertebrales arterias venasque
„ servaret quadantenus circumitio-
„ nem. „ Hoc nunc communiter sic
se habet: tuncque infarta sua vasa non
monstrabit encephalum ; est tamen
ubi monstret : “ Siquando autem
„ priusquam transitus sanguinis per
„ pulmones omnino impediatur, for-
„ te contingat, ut ob eas causas, quæ
„ supra commemoratæ sunt, (quod
carotides ab eminentia asperæ arteriæ
parumper defendantur) „ aliquid san-
„ guinis influere tunc pergat per ca-
„ rotides, minus adstrictas, quam
„ sunt jugulares, non modo san-
„ guinis circumitio per cerebrum sub-
„ sistet,

„ sistet, sed ipse ea copia cumulabitur,
„ unde mox vasa disrumpantur. „ An
non clare percipitur causa cur, quem-
admodum in canibus meis Suspendis,
cerebrum vix sanguinem habeat, ali-
quando autem inundetur eodem, ci-
tra tamen illationem veluti mutati mo-
di mortis?

Verum ultra perrexit rem certius
determinandi cupido. Cl. *Gualterus van*
Doeveren [præclarus *Groningensis* olim,
nunc *Leidensis* Medicinæ Professor,
Obs. Acad. Cap. XIV. §. XXI. No. 10.

„ Laqueo dein suspensus canis, in-
„ quit, (quem ad experimenta irri-
tabilitatis atque sensibilitatis, mire li-
cet torssisset, & trepano duram ma-
trem denudasset, vivum eo usque ta-
men, diuque deinceps, servasset,)

„ laqueo igitur dein suspensus canis,
„ videndi causa, num per strangula-
„ tionem in capite accumularetur san-

„guis, nullum observabamus co-
„piosorem sanguinis effluxum ex
„Duræ Matris (læsis) arteriis „ Et
No. XVII. “ Cum jam cessaret Hæ-
„morrhagia, laqueus collo injectus,
„ & respirationem intercipiens, non
„resuscitabat sanguinis profluvium
„ex Dura Matre.

Expertissimus *Stolte*, in erudita sua
dissertatione *De morte suspensorum*, hoc
ipsum *Cl. van Doeveren* experimentum
quater eodem effectu repetivit: ca-
nem præterea alium sanum laqueo
suspendit, suspendii folius examina-
turus effectus; contraque eos, qui
trachæam non perfecte claudi, sed apo-
plexiam a suspendio sequi censent, ma-
nifesto demonstravit, stylo, per laryn-
gotomiam inducto, & imperviam aë-
ri asperam arteriam laqueo reddi, &
asperam arteriam non diffringi ab il-
lo, sed ad vertebrae penitus compla-
na-

nari; ita tamen ut relaxato fune, resili-
 ret, se restitueret, sicque ostende-
 ret, quam debili ac fallaci fundamento
 illi niterentur, qui in suspenforum ca-
 davere, ablato per carnificem fune, de-
 monstrare annisi erant strangulationis
 effectus; tandem vertebrae neque lu-
 xari a suspendio, neque diffringi.

§. III. Ab omni retro tempore ne-
 que omnes suspensos inevitabiliter
 mori, neque auxilia, quæ vitam pau-
 culam latentem exsuscitent, detra-
 henda esse, Historia Medica docet.
Oribasius, Aëtius, & Aegineta horum
 meminerunt.

Dignum censeo textum exscribere
Libr. III. Pauli Aeginetæ, Scriptoris sæ-
culi IV. Clerico, Sæculi IV. aut V. Scri-
ptoribus Encyclopediæ, Sæculi VII. Frein-
dio, & Morerio habiti; eo quod sub-
 merforum, suffocatorum, suspenso-
 rumque, eandem velit curam esse.

„ Ex his vero qui strangulantur, ma-
„ nus non admovebimus his, quibus
„ jam spuma circa os est, *Hippocrati*
„ *credentes*. (*) Alii vero revocantur
„ aceto & pipere instillato, aut ur-
„ ticæ femine in aceto acerrimo tri-
„ to. Laboriose vero admittunt,
„ quare cogere oportet. Dissolutis
„ autem circa collum ruboribus, sta-
„ tim suspiciunt, & relaxantur. Si-
„ militer etiam in naufragiis, & in
„ summa in omnibus, qui suffocan-
„ tur. Refuscitatur enim horum ca-
„ lor.

Deinde *P. Forestus*, *Camerarius*,
Verulamius, *Wepferus*, *Derham*, *Gesne-*
rus, *Brubierius*. Ill. *Præses L. B. van*
Swieten, aliique, historias plures no-
bis tradiderunt. Duo hic præprimis
ex

* Mentem Hippocratis, Paulus non est assecutus,
ut Tom. XIII. a pag. 257. ad 260. Aphorismum
ex ipso Hippocrate, aliisque, explicans, ostendi.

ex *Camerario* notanda sunt, *Cent. VII.*
No. 39. Titulo *Fures suspensi reviviscen-*
tes “Anno 1440. 16. die Martii, De-
 „ cano Facultatis Medicæ existen-
 „ te *M. Joanne de Baumgarten*, octo
 „ fures suspensi fuerunt, ex quibus
 „ unus ad *Sp. sanctum* introductus
 „ est, ac Corpus ejus destinatum Ana-
 „ tomix: sed quia iterum ope & in-
 „ dustria Medicorum *Viennensium* revixit,
 „ liber dimissus est. Hæc ita descrip-
 „ ta reperiuntur in antiquo Collegii
 „ Medici Actorum Libro. Optandum
 „ fuisset, ut quid ad resuscitandum ho-
 „ minem *Viennenses* Medici adhibuissent,
 „ una dedisset Historia. Huic defectui
 „ vero quadantenus supplevit *Cardanus*
ibidem No. 40.

“ Anno 1492. *Conradi Preznau-*
 „ *ers de Buechberg* suspensi, & stran-
 „ gulati corpus, Facultati Medicæ
 „ secandum tradebatur. Animad-

„ vertunt Medici aliquem spiritum
 „ vitalem in hoc corpore superesse,
 „ quamvis morti valde propinquum
 „ esset (*) Proinde ex utraque cepha-
 „ lica sanguinem largiter detraxerunt,
 „ aliaque necessaria administrarunt.
 „ Apparuerunt in illo symptomata
 „ horribilia, suffocationem minantia,
 „ spuma circa os notabilis aderat, &
 „ perseverans; propterea Medici
 „ Hippocratis Aphorismum Sect. III. No. 43.
 „ allegabant: *strangulati & dissoluti non-*
 „ *dum mortui, non reconvalescunt, qui-*
 „ *bus spuma circa os fuerit.* Hunc tri-
 „ um litterarum hominem (**) for-
 „ tis-

* Signa hæc non comparuisse, dum patibulo sol-
 veretur corpus, ex eo certum fit, quod tunc
 ad secandum in Medicorum Collegium allatum
 non fuisset. Motu forte in via, soluto jam la-
 queo, latitans primum vita se prodidit tandem,
 ita ut nihilominus, quo restauraretur, indige-
 ret auxilio.

** Trium Litterarum homo apud Plantum in *Aul.* 2.4.46.
 dicitur FUR, quod trium Litterarum nomen fit.

„ tiffime constrictum, ob vehemen-
 „ tes capitis, pedum, imo totius cor-
 „ poris commotiones, (nulla enim in
 „ homine erat quies) quatuor perso-
 „ næ fortes, athleticæ, tenuerunt: a-
 „ lias ne se ipsum denuo interfecisset
 „ periculum fuisset, mente nimirum
 „ laborantem. Retulit postea se non
 „ posse in memoriam revocare ea,
 „ quæ secum acta fuerant, se tantum
 „ meminisse, quod in prætorio fuerit,
 „ sed quid postea factum sit, se igno-
 „ rare. Dicitur etiam post multa no-
 „ va furta denuo suspensus esse, siqui-
 „ dem quod corvis debetur, vix sub-
 „ mergitur.

Hic saltem venæ sectionem brachii
 narrat utriusque. Sed plura addidit *We-*
pferus de sed. Apopl. qualia nos in Submer-
 sis; & præterea decubitus cum sana fe-
 mina, in curatione mulieris a Carnifi-
 ce suspensæ: ut autem brevis sim, tra-

dam curationem variam, quam exp.
Vir Stolte in laudata sua Dissertatione
ex Oribasio, Aetio, Verulamio, Foresto,
Pechlinio, Hoffmanno, Alberti, Brubierio,
Ranchino, Beckero, Louifio, summatim tra-
didit. Scilicet “Ori infundenda Me-
,, dicamenta esse, quia aliquid diffi-
,, culter (imo nihil omnino) admitti-
,, tur. Collum illis multo oleo cali-
,, do inungendum esse, & lana, ce-
,, ratove, continuo fovendum: iisdem
,, adhuc respirantibus sternutatoria
,, indenda in nares, secandamque in
,, Cubito venam: dein & venam il-
,, los refert secuisse, etiam in quibus
,, nulla sui signa vita daret; balneis
,, calidis, remediis cardiacis tanto,
,, ut videbatur, successu usos eos fuisse,
,, ut *Verulamii* tempore Medicus qui-
,, dam nullus dubitaret, quin omnes
,, ad mediam a suspendio horam re-
,, stitui in vitam possent, quibus (ex
,, opi-

„ opinione jam recensita superius)
„ vertebræ illæfæ essent. Cum nudo
„ decumbendum, fauces irritandas,
„ & adaptato instrumento inflandum
„ aëra in pulmones esse, vapores suf-
„ fimigii more excitandos; rubefa-
„ cientia pectori, vesicantia nuchæ
„ admovenda; Venas sublinguales,
„ aut jugulares, incidendas quoque
„ esse; ab homine, qui prius aroma-
„ ta masticaſſet, inspirandum aërem
„ in os Suspenſi eſſe; aërem per bron-
„ chotomiam itidem inflari oportere;
„ immitti oportere quoque aërem in
„ jugulares Venas, fumofum tabaci
„ in anum clyſma: tandem ex opti-
„ mo *Louiſio*, præter jugularis ſectio-
„ nem, calidique aëris inſpirationem,
„ ſuperficiem corporis calidam ſervan-
„ dam eſſe, atque frictione irritan-
„ dam; deglutitione autem paululum
„ liberiore Vinum cum aromatibus

„ calide ingerendum esse, expecto-
„ rantiaque propinanda;“ quæ, ut
Louisius autumat, singula, si is, quem
ad *Marcum Antonium Calas* vocassent,
Chirurgus tentasset, truculenta *Tolo-*
sana historia contaminati non fuissent
Galliæ Annales.

CAPUT V.

Nova experimenta, ad demonstnan-
dam causam mortis proximam, tam *Suspen-*
forum, quam *Demersorum*, quæ dubia plu-
ra, prioribus experimentis non sublata,
sustollunt, & quorum in ultimo prima vi-
ce turgidus aqua *Ventriculus Autori*
apparuit.

§. I. *Sententiarum diversitas, & problema-*
ta sex, ad nova prorsumque alia, ex-
perimenta compulere Autorem. §. II.
Incipit examen anatomicum & suspen-
sorum, & merforum Animalium, nullo
auxi-

auxilio ad resuscitandum admoto ; ne forsā hæc partium conditionem aliam ostenderent , quam vera causa proxima eandem effecerat ; Et quidem primo demersi , deinde laqueo suspensi canis. Ex Suspensi contemplatione anatomica cum dubium minime solveretur , prudentiore cautione suspensus alius est , qui demum Aëris in pulmone defectu , Suspensos mori ostendens , omnem hæsitationem sustulit. Experimenta septem quæ doceant , confirmentque tam Suspensi , quam Submersi , mortem Peripneumoniam esse , deesseque universa apoplexiæ signa ; etiamsi Caput , ne qua aliunde mutatio contingeret partium , primum lustraretur. §. III. Ex omnibus hisce constitit non requiri , ad mortem Suspensorum , vertebrarum colli , seu fracturam , seu luxationem , sed unicam aëris per glottidem interceptionem ; id quod retardatione mortis ab ossea trachæa confirmatur. Conficitur denique , ex omnibus observatis , vera natura mortis in Suspensis , unaque capitur cur in variis varia Cor , Pulmoque , referant. Hæc

confirmat Bonetus. Auxilia proinde eadem iis, quæ Mersis, præbenda esse ostenditur, eaque occasione physiologica expositio, ad horum auxiliorum intellectum, interponitur. Tandem ad objectionem de duobus canibus petitam, apoplexiam, a Submersione nascentem, innuentibus, quatuor responsa dantur. In XXXVII. Cane demum prima vice ventriculus inventus est plurima turgens aqua.

§. I.

Constat itaque, nostram ad exfusci-
tandos Demersos institutam Me-
thodum, quemadmodum antiquorum
recentiumque calculo probata fuerat,
ita quoque universam Medicinam con-
sistentem in Suspensis habere.

Verum cum ab una parte conatus
plerosque nostros Mors illuderet, &
ab altera parte post numerosa expe-
rimenta, de vera mortis Suspenso-
rum & Demersorum causa proxima,
al-

altercationes ingeminarent potius, quam componerentur; egoque abunde convictus essem, quam immense multiplicanda experimenta essent, antequam sententiam ex illis tuto quis conficere possit: vacillantem me animo deprehendi, quantumcunque ad rem elucidandam exantlasssem laborem. Interim facile capiebam, mihi, qui PROVIDENTIA DIVINA eidem paulatim implicarer magis magisque, ejusdem promovendæ provinciam imponi: eoque magis, quo ex diversa theoria unanimem turbari oportere praxim facile caperem.

Quemadmodum enim superius monui, quantacumque numerarentur, ad sententiam cujusque confirmandam experimenta: ea perpetuo horum fallacia fuerat, ut unius experimento idem repugnaret alterius, ut alter alterius experimentum jugularct, atque
ita

ita quam demum sublatam discordiam speraveramus, eandem se perpetuantem doleremus. Rem proinde omnem quæ in disputationem vocari poterat, ad incudem revocandam esse censui, ut demum evidentius pateret. 1^{mo} Utrum apoplexia Submersi, an peripneumonia perirent? 2^{do} Harumque utra Suspensi? 3^{tio} An nostri in Submersorum pulmones aëris inspirandi labores non gignerent, quos deprehenderamus, diræ peripneumoniae effectus? 4^{to} An culpa nostra laryngotomia non successisset, quod aërem in pulmonem inspirassemus; siquidem eandem ad aërem ex pulmone exantlandum instituendam esse, *Detbardingio*, *Bruberioque*, visum esset? 5^{to} Num facta Laryngotomia spumosa materies apto ad id syphone eximenda non foret, ut ejus loco admitti aër posset? 6^{to} Qualis & Suspensorum

rum

rum & Demersorum, cum Cerebri, tum Pulmonis, conditio iis in cada-veribus sit, in quibus nulla restauran-di opera, quæ mutare viscera potuif-set, admota fuit?

§. II. Itaque canem XXXI. Sub-merfimus, vita, ut videbatur, pri-vum minutorum secundorum duorum spatio. Cranio osseo ablato, natu-ralis omnino conspectus & Duræ Me-ningis erat, & Piæ, & Ventriculorum. Nihilque sive lymphæ, sive cruoris, in encephalo effusum. Denudatam trachæam mox infra cricoideam Car-tilaginem arcte ligavimus, ne quid efflueret. Exemto prudenter pulmo-ne, ligaturam solvimus, vidimusque profluentem ex eadem spumofam, ac subrubellam materiem; pressis autem lobis pulmonis singulis, vel aquam puram, vel sanguinem, vel mistum utrumque. Ex pulmone hujus parvi,

senis

senis tamen, canis, vix quatuor latos digitos longitudinis habente, uncias liquidi aquosi duas habuimus.

Lympha autem hæc subnigra erat, eo quod moniti ab inclyto Viro *Morgagni* Ep. XIX. atram reddidissemus, in quam præcipitanda bestia esset, aquam.

Canem XXXII. Suspendimus, qui intra minutum fesusquialterum, alvo & urina copiose redditus, periisse visus, brevi post vitæ signa conspicua dedit, convulsione crurum, continuoque per 5 minutorum spatium, caudæ, ut canis adulantis, motu. Mortuo nunc habito, Laqueum primo firmavimus sic, ut neque loco mutari, neque vel minimum laxari posset. Sine ullo ad vitam restaurandam labore, quemadmodum & in proxime priore, & in plerisque sequentibus, cranium ilico examinavimus. Ac primo quidem penitus turbabamur in auferendo primum

mum Pericranio, atque musculis cro-
 taphytidibus, a motu, quem animal
 edebat, caput utrumque in latus con-
 tinuo movendo, obnitendoque pedi-
 bus singulis suis. Profecto sensilissi-
 mæ hujus irritationis effectus restau-
 rationem suspensi, si ejus loco con-
 sueta auxilia admota fuissent, plus-
 quam probabilem reddidit. Sedato
 hoc motu, dum osseum cranium ferra
 dividebatur, ejusdem per sinus longitu-
 dinales transitu sanguis profluxit, qui
 parum turbabat conspectum; eodem
 vero spongia perfecte deteriso, Me-
 ningem utramque naturalem inveni-
 mus, Ventriculos vacuos, neque præ-
 ter morem infartos Choroidæos ple-
 xus.

Laqueus, ut mox monui, nihil
 motus, nihilque relaxatus fuerat; at-
 tamen, laryngotomia facta, intromit-
 tentes stylum subcurvum sursum ver-

fus, facillime in os & fauces penetra-
vimus, imo stylum commode eo,
quem laqueus stringebat loco, agita-
vimus. Verane sensissent, qui tubum
aëreum a laqueo non claudi, aëris-
que proinde commercium non aufer-
ri suspensis, statuminare fategerant?
Quæsitum solvent canes sequentes.

Pulmones in hoc cane neque disten-
tos multum, neque admodum inflam-
matis inveni; quod idem æque in
suspensis quam in submersis, haud pe-
nitus insolitum fuit.

Suspicati crassio rem nostram chor-
dam in hoc cane fuisse, quam ut tra-
chæam recte arctaret, Canem XXXIII.
tenuiore laqueo suspendimus. Su-
spensus alvum mox posuit, urinam-
que, mortem autem intra fesquimi-
nutum, quemadmodum prior, simula-
bat. Post alterum vero fesquimini-
tum, movit se in patibulo suo vali-
dissime

diffime medii quadrantis tempore: capite demum ab adstantibus valenter in pectus presso, vere moriebatur. Firmantes altero modo laqueum, eum in Tabulam resupinavimus, & per Laryngotomiam experimentum prioris repetituri, relaxatum laqueum sic invenimus, ut liber denuo aditus aëri per trachæam pateret in pulmones. Mutato igitur consilio, canem denuo de suo patibulo suspendimus, rati, universi corporis pondere asperam arteriam arctius clausum iri. Id porro successit: pendenti laryngotomiam longam facientes, haud ultra sive stylum, sive aërem tubo inspiratum, per illaqueati angustiam loci promovere potuimus. Magnam hæmorrhagiam laryngotomia aliquando dedit nobis, hæc autem nullam.

Caput mox aggressi, loco sublimiore ferram admovimus, ne sinu

laterales repetito læderemus: quapropter hæmorrhagia nulla adfuit. Meninges naturales ambæ. Vacui singuli ventriculi. Plexus choroidæus naturalis. Turgentes admodum pulmones, quacumque in plaga faucibantur, sanguinem rivatim copiosumque fuderunt. Turgidum cor utrumque fluido sanguine.

Est animadversio *Cl. Morgagni* Ep. XIX. in iis, qui sani strangulantur, sanguinem fluidum reperiri, minus in his, qui dudum valetudinarii fuerunt. Nos quidem sic plerumque eumprehendimus; fallere tamen in sanis posset, quorum sanguis est in concretionem pronus, ut vidit *Cotterus*: fallere & in chronicis morbis posse, exemplo brevi patebit.

Canis XXXIV. minutorum quinque spatio submersione visus est mori. Erectus ex aqua educebatur, ne ore
quid

quid elaberetur, & donec esset penitus linteamine exsiccatus, ferebatur caput in altum. Meninges cerebri sanissimæ, & vacui ejus ventriculi; longitudinalis autem ac laterales sinus sanguine pleni.

Pulmones turgidi admodum: hos, ligata Trachæa, una cum corde examinamus. In aquam projecti, natarunt. Quod pluries pulmonem, num in aquam subsideret, exploravimus, nemo vituperet, innixus forsan *observationi* 14. *Opusc. pathol. Viri illustris Halleri, Hist. I.*, aliorumque scriptorum, qua demonstratum est, peripneumonicorum pulmonem, plurimo cruore gravem, non subsidere in aquam: etenim experimenta contraria mihi nota erant; ipseque *Hallerus* loco mox laudato *Hist. 2.* expertus est post funestam peripneumoniam subsedisse pulmonem. Experimentis quoque

Roberti Boylei evictum est, aqua graviorem esse sanguinem, adeoque in hoc viscere adeo cumulari posse, ut id in aquam præcipitet.

Ex Aspera arteria, soluta vinculo, multum spumosi liquidi prodiit, nigri autem admodum, eoquod fæcem ingentis Atramentarii vasis cum aqua commiscuissemus. Ex singula transcissi pulmonis parte aqua nigra abundanter effluxit, una cum copiosis miculis eiusdem atramentariæ fæcis. Ventrículus, quemadmodum in prioribus, sine aqua. Cor dextrum sanguine plurimo, toto fere fluido tumebat, paucò vero sinistrum.

Canis XXXV. eadem atrata in aqua spatio quinque minutorum submersus est, pauca modo signa vitæ post duo minuta priora edens. Erectus semper, ne qua aqua ore efflueret, servabatur. In capite, quod

pri-

primum lustravimus, Dura & Pia membranæ secundum sanam naturam. Ventriculi cerebri vacui; sinus longitudinalis, ac laterales pleni. Ventriculus, seu Stomachus, vacuus aqua. Pulmones ex rubro nigroque variegati, valde tumuerunt, at in aqua supernatarunt. Copiosam eam atram materiem spumofamque, nec non plurimas fæcis atramenti micas, tam ex aspera arteria, quam ex singulis loborum vulneribus, eduximus. Uterque cordis thalamus fluido sanguine plenus.

Integro adhuc pulmone, tubam syphonis in trachæam immittentes, aquam spumofam evacuare ex eadem, & ex bronchiis, annitebamur; paucam tamen, eamque nigram, micisque nigris inquinatam, educere potuimus. Neque plus habuimus in singulorum Loborum bronchia immissa

tuba syphonis: perscissis vero lobis, aqua spumosa, ut mox dixi, effluxit abundanter.

Canem XXXVI. modo eodem, quo antepenultimum, suspendimus. Post labores summos, anxietates, ejulatus, spatio sesqui alterius minuti, alvumque paucam, penitus per alterum sesquiminutum quievit: eo vero elapso, valide convelli cepit, seque agitare, citra vel minimum tamen sonitum, caudamque suam non blandientis in morem, quemadmodum prior, agitabat, verum eandem in circulum contractam in dorsum flexit, rigidam quidem, sed digitis nostris tamen retroagendam. Paulatim quietior caudam relaxavit gradatim, & prorsum quievit, octo elapsis a principio suspensionis minutis. Juvit ad accelerandam mortem ea capitis postici in anteriora pressio, ut in pectus
os

os incumberet. In patibulo pendenti operationem Bronchotomiæ fecimus, perque oblongum vulnus styli, aërisque experimentum iteravimus; neutro iterum nihil omnino penetrante. Animal tunc, firmato probe laqueo, de patibulo solventes, in mensa supinavimus, jamque non aëre duntaxat, sed etiam stylo sursum per vulnus trachææ ducto, facile penetravimus, ipsamque spumiosam materiem flando per vulnus in os copiosam pepulimus. Suspenso denuo, transitus interclusus omnis erat; jacentique postmodum in mensa quoque, si caput in pectus firmaretur.

Meninx utraque cerebri primum examinata, fuit sanissima, & ventriculi ejus vacui.

Pulmones turgidi admodum, ex rubro nigroque variegati, in aqua nantes; quocumque in loco vulnera-

rentur, magnam copiam profudere fluidi cruoris. Uterque Cordis ventriculus copioso fluidoque sanguine turgidus fuit. Hucusque in suspensis canibus videramus semiclausas palpebras, in hoc vero cane apertissimas, pupillas autem adeo ingentes, ut vix quidquam de Iride conspiceretur. Liceat hic cum *Morgagno* advertere quam parum vere a *Garmano Lib. de Mirac. Mort. I. tit. 5. §. 7.* dictum sit: „Omnes violenta morte „extinctos oculos obtinere palpebris „tectos.“ Duo exempla *Morgagnus* habet semiclausorum, unum apertorum turgentiumque oculorum: in hoc cane, ut patet, & oculi apertissimi fuerent, & pupillæ amplissimæ.

Canem XXXVII. Submersimus in atrata aqua, viventem tamdiu, eademque phænomena exhibentem, quam proxime prior. Hac occasione
nota-

notabamus sonitum vocis Submersorum canum nobis nunquam perceptum fuisse, Suspensorum autem semper, magnumque ejulatum. Aqua ilico vocem suffocat; laqueus necdum, nisi demum omnem in Trachæa claudat capacitatem. Erecto capite eductus ex aqua flumen veluti aquarum juxta corpus demisit, quod inverso cane pro ea aqua imposuisset incautis, quæ ex ore ac naribus ipsis videretur effluxisse. Utraque membrana, ventriculi, substantia cerebri, omnia sanissima. Seri nonnihil inter duas Membranas. Pulmo tumore, ac humoris rubri, atri, spumoseque profluvio, ut in præcedentibus. Sanguinem fluidum cor dextrum abundanter habuit, sinistrum tribus quartis partibus minus.

Hic primus Canis, qui ventriculum aqua plurima plenum habuit.

En

En iterum non contemnendam experimentorum seriem, ad veram mortis causam in utroque hoc violento genere mortis elucidandam! Licebit, quemadmodum ad priora fecimus, ad hæc quoque animadversiones nonnullas adjungere.

Primo loco advertimus Suspenforum æque ac Submerforum cerebrum, quoad ejus ipsam, quam vocant, substantiam, ventriculos, sinus, meningesque, ipsam plerumque referre sanitatem. Unde si utrorumque Cadavera leguntur nonnunquam arterias venasque multo sanguine infartas, repletosque eodem ventriculos habuisse, id quidem ab antiqua aut Cephalæa, aut Hemicrania, consimilive Diathesi, accidere posse, quemadmodum historia horum morborum, anatome confirmata, abunde docet, statuamus

opor-

oportet; minime vero hanc esse legem consuetam.

Secundo loco clare intelligimus mortem Suspendorum a luxatis fractisque colli vertebrae non fieri: etenim validius coagmentatae Vertebrae sunt, solidioraque ipsorum corpora, quam ut id frequenter contingere posset; modo carie semiexesae non essent, ut non esse in plerisque certum est. Praeterea qui haec statuerunt, id ex Carnificis facto cum pedibus suis in jugulum furis insultu sic autumarunt; haud scite tamen; non enim causam mortis universalem ex eo explicare debuissent, quod nonnullis in Regionibus fit, sed ex eo quod ubique: illico enim claudicat expositio ista, apud quos huiusmodi carnificina insultatio consuetudinis non est. Tandem nulli Bestiarum nostrarum talem mortis

causam adfuisse, colli pertractatio, forma, longitudoque, probarunt.

Tertio loco, ne alias aliorum rationes de interceptis colli nervis commemorem, a quibus nunquam & talis mors, & tam propera, ut clare a celeberrimo *Morgagni* evictum est, oriatur; per experimenta nostra demonstratum est trachæam a laqueo omnino claudi. Indubiam porro cum cunctis respirantibus animalibus mortem ob id insequi oportere sciamus, quid ultra explicandi rationes compellemus aliunde? Itaque moriuntur defectu aëris ad respirationem necessarij, quem defectum laqueus, omnem per glottidem aëris transitum tollens, demonstrat, & ad quod cum pendentis corporis pondus, tum menti in pectus pressio, plurimum facit: perinde ac foetus recens natus observatus est respirare non posse, capite in pectus, qui

qui ejus in utero situs fuerat, prono;
 cui dum caput attolleretur, commo-
 da respiratio observabatur. Sic *Petrus Idema* pag. 12. contra *Bernardum*
Idema. Annon hinc ratio capitur cur
Smetii homo non moreretur *Suspensus*?
 „ Is qui diu *suspensus Bononiæ* jacuit,
 „ vivus inventus est, quod *Asperam*
 „ arteriam non cartilagineam, sed
 „ osseam haberet. Hoc nos & ab
 „ aliis accepimus. “ *Cardanus Libr.*
2. tr. 2. contr. 7. „ Constat quendam
 „ bis *suspensum servatum miraculi*
 „ specie: inde cum tertio judicis so-
 „ lertia periisset, inventam osseam
 „ asperam arteriam. “ Vide *Boneti*
Sepulcretum Tom. ult. pag. 553. Pro-
 fecto si a compressa medulla spinali,
 fractis luxatisve vertebris, moreren-
 tur *suspensi*, ossea trachæa eum a mor-
 te non vindicasset.

Propter hanc demonstratam causam, moriuntur suspensi compressione in sanguinea vasa, facta ab aëre retento, eoque hic rarefacto: moriuntur a sanguinis in pulmonalibus vasis quiete; ita quidem ut antequam multum rarefcat bronchiorum aër, sanguis adhuc transeat de pulmonali arteria in venas, indeque in Cor: sed quia ab una parte, carotidibus e laqueo pressis, vertebrales arteriæ eum omnem, quem sinistrum Cor in Aortam pellit, cruorem transmittere, capereque non possint, cordis sinistri cavum oppletum sanguine manet; & quia ab altera parte plus sanguinis in Cor dextrum immittitur, quam emitte-
re per arteriæ pulmonalis transmittere-
que fines potest, etiam & id cruore op-
plebitur. Hac de causa natum arbitror, cur in suspensis, submersisque, utrumque thalamum cordis cruore re-
fer-

fertissimum sæpius deprehenderimus. Sin autem vel quod animal inter primas suspendii anxietates, necdum complanata integre trachæa, vehementius inspirando plus dein aëris intercepti gerat, citius profecto ille majore cum copia, tum rarefactione, sic arteriæ tam pulmonalis, quam bronchialis fines comprimet, ut in Cor sinistrum parum modo transmittatur, sed inter fines arteriarum, dextrumque cordis cavum, stet cruor omnis. Quapropter etiam aliquando multum sanguinis in dextro cordis thalamo, parum in sinistro, invenimus. Sic quidem, ut a citiore, tardioreve finium arteriosorum compressione, nasci hæc differentia videatur.

Concordant cum nostris & aliorum observata. *Med. septentr. Libr. 8. pag. 630. Bonetus* refert anatomen suspensi hominis, per omnia accurate

Pars II. H de-

descriptam; „cujus pulmo distentus
„fuerat, implensque thoracem to-
„tum, hic spumofus atque fungo-
„sus, ibi marmoris instar variegatus.
„Cordis uterque ventriculus sangui-
„ne grumoso plenus. In cerebro
„nihil extraordinarii, ac ventriculi
„collapsi. Ut ovum ovo consimilis
hæc suspensi hominis Anatome est no-
stræ brutorum. Quoad solum pul-
monem *Bartholinus* eadem invenit, *Cent.*
I. Hist. 32. „In strangulato inveni
„pulmones grandes, variegatos,
„ceruleos, rubore intersperso, mar-
„moris instar, leves & spongiosos,
„sanguine spumoso tam plenos, ut
„non tantum externæ venæ tumi-
„dæ in membrana apparerent, sed
„in dissectione Cordis demonstnan-
„tem me fere impedirent. Et *Cent.*
IV. Hist. 6. „Virile cadaver hominis
„sævissimi strangulatum, a me disse-
„ctum

„ Etum est anno 1656. Fistula pulmo-
 „ nalis spuma copiosa impleta erat ex
 „ strangulatione.

Quarto loco, Cordis atque cerebri
 similitudo in anatome hominum, sive
 laqueo, sive unda, enectorum, de-
 monstrata aliquoties ab aliis, inque
 canibus nostris multoties confirmata,
 eo me facile mover, ut haud plane
 dissimilem mortis utriusque causam
 esse censeam, sedemque profecto ean-
 dem. Quid molestiarum laqueus in
 priorum pulmonibus cum novi aëris
 defectu, tum præsentis vitio, creet,
 mox intelleximus: quid vero malo-
 rum Aqua in pulmones posteriorum
 inferat, hoc potissimum esse videtur,
 quod mox deorsum premat aërem ibi
 præsentem, quod motu pulmonis,
 qui adhuc superest, cum aëre commi-
 sceatur, commissione hac spumofam
 materiem conficiat, suaque gravitate

atque mole, tum & commisti aëris rarefactione, omnem mox sistat cruoris circumitionem in pulmone, cujus venæ, si a Frigore primo aquæ constringantur, plurimum sanguinem ad Cor sinistrum determinant. Si nunc frigus aquæ externo in corpore, in superficie, inquam, cujus amplitudo quindecim quadratorum pedum, per epithelium, epidermidaque omnem, esse censetur, cuncta capillaria vasa arctet & claudat, cor sinistrum se suo abundante cruore ægerrime evacuare poterit; præsertim si a subitaneo atque universali frigore, nec non a terrore, quo fere omnis, qui præcipitatur in aquam, afficiatur necesse est, æque interna vasa, quam externa, vehementer constringantur. Unde intelligitur, idem sinistrum Cor copioso cruore repleri debere: uti quoque Cor dextrum ab adventante sanguine

guine per Cavas venas in sinum suum, & a sanguinis in arteriis pulmonalibus mora, obruatur necesse est. Non erit autem singulorum thalamorum eadem perpetuo plenitudo. Si enim plane aut ebrius homo, aut desperabundus, merfit sese, hic terrore vix affectus, minorem universo in corpore arteriarum coarctationem patietur; uti neque si viribus solito valentioribus cordis cavum alterum præ altero est; nec si aqua alio, quam alio tempore, gelidior est; neque etiam si aut homo, aut canis, frequenti natatione, aut saltem frequenti insignique aëris mutatione, frigori sic assuefecit se, ut minus ab eodem affici soleat.

Cur tamen Merforum pulmones non raro minus rubri, minusque repleti sanguine, quam Patibulatorum? Copiam minorem admittunt demersorum pulmones, frigore veluti subito

arterias congelante; gravanteque pondere aquæ validius premuntur. Dum e contrario patibulati pulmo primo momento, priusquam multum rarefiat aër, copiam magnam a dextro corde accipit, aliquantumque promovet, donec demum a datis supra causis nihil ultra per fines arteriosos transmittere possit.

Contra: explosæ superius, & jure merito quidem, quædam de morte suspensorum sententiæ fuere, ejusmodi innixæ argumentis, quæ in nonnullis duntaxat casibus locum haberent, & non in singulis; quæque proinde id explicare, quod in singulis fit, minime possent. Porro vitio pari laborare & hæc sententia apparet, quæ exponendo quæstionem per ea canum phænomena, quorum pulmones aquam haberent, eandem minime solvit in canibus, quorum in pulmone inventa aqua non fit.

Resp.

Resp. 1^{mo}. Saltem canum omnium, exceptis modo duobus, pulmonem aquam habuisse. 2^{do} Duos canes, in quibus fefellit experimentum, potuisse facile inter violentas pectoris agitationes, omnemque in modum formæ ejusdem mutationes, aquam expulisse per Trachæam; quemadmodum sæpe notavimus, inter ipsa revocandæ vitæ experimenta, ore ac naribus spumofam stillasse, rubellamque materiem. Commentum enim est sua Epiglottide spasmodice semper glottidem claudi, ipsiusque rimam constringi: nam in omnium hominum, bestiarumque faucibus, & percepimus vidimusque surrectam Epiglottidem, & tubum ad inspirandum plerumque se in Trachæam commode insinuantem. 3^{tio} Supra jam meminimus viarum illarum, quibus a pulmonis vasis in ejus cavum, & ex cavo aëreo in

vasa, transitus fiat; unde absorberi aliquando possit. 4^{to} Per recentiora experimenta, quæ brevi enarrabo, constitit aquam ipsam in pulmone demonstrari non potuisse, & nihilominus in eo fuisse luce meridiana clarius aliunde patere.

CAPUT VI.

De prima nostra Anatome demersi hominis, hominisque suspensi: de captis novis brutorum experimentis, ad ea hominum examinanda, & illustranda: deque certa experientia deglutitæ aquæ.

§. I. *Frustraneus conatus revocandi vitam submersi. Præter consueta præsidia etiam adhibitus ei Sulphuris fumus fuit, & cur? Anatome. Dubia cum experimentis crescunt. Unde, quamvis sententia*
de

de Suspensorum, Demersorumque, non Apoplectica, sed Peripneumonica morte, certa per priora visa esset: inflammata tamen duorum canum Encephalum, duorum expers aqua Pulmo, ultimique inundatus ventriculus aqua, ad nova tentamina compulerunt Autorem. §. II. In novo tentamine primum videbatur experimentum, de inspirata pulmonibus aqua, prorsum deficere; deinde vero argumento adeo palmario eodem in cane demonstrabatur adesse, ut in quibus duobus priorum canum defuisse visa esset, jam in vasa pulmonis sese penetrasse credenda sit. Jam secundo demonstratur Aqua in ventriculum transisse, ex eoque in Intestinorum tractum. In altero tentamine non hoc posterius confirmabatur sed illud prius: tentamento vero tertio utrumque luculenter. Quarto tandem constitit letale Cani, alioqui resurrecturo, atramentum fuisse cum aqua inspiratum. Inter signa absolutæ mortis non esse opacam Corneam ponendam, exemplo constitit. §. III. Irrita tentamina vitam revocandi suspensi hominis. Anatome.

Neque Apoplexiæ is, neque Peripneumonia, signa evidentia habuit, ob primo imperfectum suspendium, secundo ob tentamina, quæ ad vitam evocandam instituta, interiora mutaverint necesse est. Quod adevat tamen, peripneumonicum magis, quom apoplecticum redolebat.

§. I.

Interea dum novis his experimentis vetera confirmari lætabamur, contigit 9. Dec. ut jussu Magistratus in civitatem, inque Nosocomium, juvenem afferrent 16. vel 17. annorum ut videbatur, in Danubio submersum. Quamdiu submersus ille fuisset, quoque loco & distantia ab urbe inventus, assequi ab illis, qui portarunt eum, non potui: agebant modo corpus a nonnullis, idque natans, inventum fuisse; seque ad nos deferre jussos. Hi

vero, cum urbs fere tota transeunda esset, antequam ad nosocomium meum venirent, fecerant stationes, eleemosynas a confluyente populo extorquentes, easque, ut ferebant, in defuncti erogandas requiem: sic ut tandem in Nosocomium cum Submerso venientes, semiplenum pecunia pileum, quam diversis in stationibus compilarant, haberent, non minus vero sic tempus auxiliandi differrent.

Submersus oculorum corneam subopacam jam habuit, frigebat autem sic, ut neque frictione, neque ignitabulo, ne tepefaciendus quidem fuerit. Ex nullis venis, sive jugularibus, sive brachialibus, sanguis fluxit; quæ autem guttæ stillabant, æque frigebant, quam corpus totum. Auxilia nostra ordine vario, quemadmodum in prioribus, adhibebantur, prætereaque fumum sulphuris huic in os naresque

que determinavimus. * Et quamvis opus inutile præ auxiliorum dilatione existimaremus, iisdem tamen adhibendis horas impendimus quinque.

Facultate nunc gaudens aperiundi Cadavera, quæ solis Magistratus Ministris, ut morte violenta extincta, reservari solebant, ad interiora contemplanda me converti.

Diaphragma altum in pectore situm habuit. Hepar ingens, durum, subnigrum. Amplissimum pulcerimumque omentum. Tenuiumque intestinorum, crassorumque, hinc inde dire inflammatae portiones. Durus pul-

* Sulphuris fumum anno 1769. repudiaveram, quod tristes effectus habuisse videretur in *Actis N. C.* vol. 7. obs. 124. (vid. Tom. XIII. *Rat. Med.* pag. 248.) jam vero ad adhibendum hunc fumum permovit me *Wepferi* Autoritas, in *Hist. Cicutæ aquaticæ* memorantis resuscitationem ejus ope feminae, cui in syncope hysterica, cum respiratione penitus ablata, omnia resuscitandi præsidia frustra applicuerat.

pulmo uterque, tumidus, purpureusque; sic vero utrinque pleuræ, inferiusque Diaphragmati, annexus, ut nonnisi longo, tædioſoque labore, ne vulnere experimentum illuderetur, ſeparandus fuerit. Neque per omnem hanc operam vel hilum flacceſcebat. Lobi perſciſſi pauculum ſeri ſpumofi, atque ſubrubelli, ſudabant, nihil flacceſcentes. In tomos diviſi poſtmodum, ſudabant ut prius, de mole autem, ſoliditateque, nihil remittebant; ſicque lobi denique omnes. Manu deinde partes ſingulas comprimentes, Lymphæ ſpumofæ ac ſubrubellæ libram mediam expreſſimus. Notabilem hanc copiam eſſe exiſtimo. Non movebo hic quæſtionem de Aſperæ arteriæ, Bronchiorum, Veſicularumque capacitate, cum illuſtri Hallero *El. Ph. Tom. III. p. 200.* incertiſſimam hanc omnino menſuram eſſe ratus: copiam
li.

liquidi expressi magnam in parvo hoc corpore fuisse censeo, majorem futuram procul dubio, si non manu, sed prælo, facta expressio fuisset: unctiuculo quippe hoc humore mox e manibus prolabitur pulmo. Aquæ enim gluten admistum arbitror, glandularumque liquorem, quas pulcre demonstravit in Trachæa & Bronchiis *Morgagni Adv. Anat. Libr. I. Tab. 2. fig. I.* nec non aërem, qui irretitus intra absorptam seu inspiratam aquam, materiem hanc adeo spumofam reddidit; ipsamque hanc cum spumofam, tum spissam, ac fere sebaceam materiem, sic vesiculas & vasa obstruxisse, ut ex pulmone in tomos diviso, pauculum modo efflueret.

Ex Physiologia quippe compertum est, ut alia de causa jam monui, ex Arteria, & Vena pulmonalibus, viam in Bronchia esse, atque ex Bronchiis
in

in illas, in Venam autem maxime; unde harum viarum plures alte oppilari posse verosimile fit.

Ventriculus in hoc homine aqua caruit.

§. II. Confirmatam iterum hoc casu sententiam nostram lætabamur, haud vero necdum omnes difficultates, quas offenderamus, elucidatas vidimus: unde antequam certi quid statuere auderemus, nonnulla experimenta præmittenda esse, nonnullaque iteranda, decrevimus.

Parata vasto in dolio aqua, nigra præ atramento abundanti, atramenti-que copiosa fæce turbida, Canem XXXVIII. merfi, & intra brevissimum tempus, (Horologium non attenderam) mortuum apparentem, integra hora in aqua reliqui, visurus an diversum quid ab illis, quos aqua protinus extuleram, observandum daret.

Ela.

Elatum tunc ex aqua, capite semper sublimi, canis, qui ex albo olim flavabat, nunc æthiops, flumen aquæ inferiore de corpore fundebat, idque diu; quæ fane aqua, ut jam tertio moneam, quemadmodum pilis Bruti, ita indumentis hominis absorpta, juxtaque os nasumque humi pendulum, defluens, rivum aquæ ex Ventriculo & Pulmone profluentem mentiri solet. Citra vel minima restaurandi molimina anatonem mox aggressi sumus.

Totus pulmo & turgidus fuit, & latis maculis partim rubris, partim purpureis, nigrisque, variegatus. Ligata Aspera arteria, eum totum examinimus. quo cum propius, tum clarius, phænomena contueremur. Soluta arcto Trachææ vinculo, *vacuam & hanc reperiēbamus, & cunctos majores ejus, per singulos lobos, ramos. Parum spumosi liquidi ex vulneratis lobis stil-*

stillavit. Cum deficientibus signis præsentis aquæ, hanc tamen & Trachæam, & Bronchia majora minoraque subiisse, fæx atramenti copiosa demonstrabat. Nec in trochiscos divisi lobi collabebantur, nisi compressi; compressi autem quid rubelli spumosi que dabant. Cordis cava onusta grumoso sanguine, minus dextro sinistrum.

In Ventriculo aqua inventa est atramento profunde tincta, plenaque atramenti fæcibus: Duodenum dutem, & Intestinum, jejunum, iisdem atramenti fæcibus multo erant repletiora.

In cerebro Membranæ naturales. Sinus longitudinalis vacuus, vacui & laterales. Inanes ventriculi superiores. Plexus Choroidei nec turgidi, nec solito rubicundiores.

Canis XXXIX. mediæ magnitudinis, in minutis secundis duobus mortuus, ubi extrahebatur ex aqua atramenti.

Pars II. I da,

da, visus, in eandem iterato præceptus
datus, ac per horam cum tribus qua-
drantibus relictus in illa fuit. Inde
postmodum tractus, flexilis per om-
nia erat. Sine ulla operatione ana-
tome. Turgidi pulmones, prioribus
tamen minus aut rubri, aut purpurei.
Aspera arteria tota plena spuma alba,
vix rubella, ut & cuncti majores e-
jusdem per omnes lobos rami, præ-
cipue autem atramenti fæcibus. Lobi
transcissi sponte fuderunt rubelli li-
quidi uncias duas. Ex singulo autem
loborum vulnere æque fæces atræ præ-
dierunt, quam liquor rubellus. Ex
utroque cordis cavo multus eductus
est sanguis, grumofusque ille. Omen-
tum perquam inflammatum.

Ventriculus cibus repletus nihil a-
quæ exhibuit, nec Duodenum. Atra-
menti fæces in illis nullæ.

Nihil non naturale in Encephalo. In utroque superiore ventriculo feri nonnihil erat, & forte paulo coloratiores Choroidei plexus; quod tamen neutrum quis præternaturale vocet.

Canem XL. majorem, qui unico minuto obiisse videbatur, in Scapha aquæ reliquimus bihorio, erecto capite, ne efflueret quidquam. In Ventriculo, Duodeno, Jejuno, copiosissima aqua nigra, cum copiosissimis grumis atramenti. In trachæa nihil liquidi spumosi, turgidus autem valde pulmo, ex quo, ubique percisso, rivatim sponteque effluxere liquidi rubelli unc. tres una cum copiosa fœce atramenti. In utroque cavo cordis, in sinistro autem copiosior, grumofus sanguis. Dura mater paulo forte rubicundior, Ventriculi vacui, vacuus Sinus longitudinalis, fere vacui Laterales.

Canis XLI. nos diutius exercuit. mediocris is molis erat, non juvenis tamen. Minuto in atra aqua detentus, cum sua sporta levabatur, minutoque tenebatur, postquam dum vitæ signa quædam edi cepta essent, per aliud minutum submergebatur, cujus in fine sonum, veluti vomiturus, edebat, mox tamen quietus.

In mensa tunc locatus nonnihil movebat se, Corneam opacari ceptam habebat, obscurumque ostendit co-starum motum, & quendam sonitum. Ad hæc deterfimus illum, & pannis fumo aromatico penetratis diligenter fricuimus. Edidit tunc veluti latratu conamina. Irritabantur interea nares faucesque spiritu salis ammoniaci. Frictione continuante per duodecim minuta, murmurare cepit, erexit se in genua, positus autem ut in integros pedes insisteret, in genua recidit.

cidit. Minutis quinque post viginti, ab elatione ex aqua elapsis, secta est vena jugularis sinistra, ex qua septem minutorum spatio unciae duæ cum dimidia sanguinis effluxerunt. Putabamus sufficere pro mole canis. Sanguis frigidus erat, dum extillantem plures examinabamus, fluidus nihilominus, dieque sequenti serum separasse, insulamque formasse, sanguinis boni more, apparuit.

Paulatim a Venæ sectione cepit caput plus dimittere. Dum aqua calida cum paucis spiritus vini camphorati guttis ipsi in guttur injiceretur, Chirurgum momordit. Vellicatus extremo caudæ, ter quaterque vociferabatur, seque erexit bis, in pedes institit, fugam meditari visus est, & cornea omnino pellucida, oculi nitabant. In pavementum locatus, spatio quinque pedum inde ad forna-

cem cucurrit, murmurans perpetuo. Tunc posuimus ad calidiorē fornacis faciem, & calidis pannis circumvolvimus, ita tamen ut in spatiosissimo Conclavi nocere respirationi nimius aëris calor non posset. Prope trihorio ibi jacuit. Intereaue temporis jus Carnium calens cum tantillo spiritus vini Camphorati injectum ipsi in fauces est, cum lingere, etiam jus purum, recusaret. Injecti juris pars deglutita est, pars potior ore elapsa. Aërem nostrum ipsi pluries tubo in fauces inspiravimus, cum respiraret anhelus. Enema injectum juris carnis cum eodem spiritu. Respiratio clamosa fiebat, & ea inæqualitate, ut in silentio inspirationis *sex* numerarem, in expiratione vero sonora, & clamosa, *novem* aut *decem*. Hocque diu observabatur. At vero cum ibi udas cum dimidia horas jacuisset, respi-

spiratio debilis observabatur tacitaque, donec elapsis a submersione tribus cum dimidio horis exspiraret.

Hora a morte elapsa aperuimus illum. Pulmones parum tumidi, sed nigerrimi fere ubique erant. Percussis iis constabat omnem hanc nigritudinem ab impacto sanguine esse, & a causa mox explicanda, quibus non pulmonem, sed induratum jecur potius referret. In Aspera arteria, probe ligata antequam eximeretur, copiosa materies spumosa inerat, ab ipsa glottide ad extrema bronchia usque. Fæcum autem atramenti in toto hoc spatio aëreo copiam adeo. enormem in nullo Canum nostrorum hucusque inveneramus, ita ut non in percussis aëreis vasis duntaxat, sed in transsectis singulis lobis eandem copiosam reperiremus, educeremusque. Nonne hinc nigredinis profundioris,

consistentiæque visceris, adaucta causa capitur? An noxia hæc venenataque sæx, usque in visceris penetrale intrusa, mortis in eo, alioquin resurrecturo, sufficiens causa non fuit? Ex perfectis plagis liquor rubellus effluxit, quam in præcedentibus, parrior. Transcissisque partibus non concidebat tumida moles, nisi comprimeretur.

Cordis ventriculi, dexter plus sinistro, sanguinem grumosum habebant.

Oesophagus & ventriculus aëre multum inflati erant: an ab inspiratione nostra? In ventriculo vivus vermis teres inventus, qui ad attactum contraxit se in formam perfectam Cochleæ, ac si limacem domiportam videres. Inerat ventriculo variorum ciborum ingens farrago, siccorum admodum; nam & injecta nostra ore

ore effluxerant, & quæ pauca deglutita erant, in siccam hanc massam videbantur absorpta. Submerſionis aquam non deglutiisse Canem fæcis atræ absentia arguere videtur.

In Encephalo Dura mater rubicundior paulo, quam in canibus prioribus. Nonnihil sanguinis in Sinu longitudinali, multum ejus in sinibus lateralibus deprehendimus. Ventriculi superiores vacui. Plexus Choroidei, Pia meninx, Cerebri substantia, bona.

Materies in pulmone inventa, ex eoque percisso deflúa, curiositatem nostram excitabat, cognoscendique quidemum esset, desiderium; præcipue cum in submersi juvenis pulmone examen tale instituissimus. Explicabo autem potius hoc post sequentem casum, in quo tentamen tertio fecimus; unaque post hunc casum conclusiones

transferam, quas tot experimenta, nunc exposita, formare nos jubent.

§. III. Miles ut videbatur quinquagenarius, minime, ut perhibent, Melancholicus, qui die 28. Dec. 1771. ad quintam matutinam quosdam de compacto expergefecerat, ad sextam laqueo suspensus invenitur, nulla ultra præbens signa vitæ. Itaque suspensus relinquitur. Hora 7. intrat ad rumorem Chirurgus, qui suspensum videt, abitque. Itur ad judicem tandem, intereaque prope nonam de factitio patibulo solvitur, & autoritate Magistratus ad Nosocomium meum defertur hora decima cum dimidia. Licet corpus trihorio pependisset, & quatuor minimum horæ cum dimidia a cessantibus vitæ signis elapsæ essent, operam tamen adhibendam esse censeui; præsertim quod ex flavo pallidam faciem cernerem, nec tumida labia,

bia, nec oculos prominentes, & totum corpus, pedibus exceptis, adhuc moderate calidum. Calor atmosphæræ eo tempore fere 40. gr. in thermometro Fahrenheitiano erat. Reposito itaque corpore in lecto probe calefacto, quamvis nondum frigidum esset, vena secta in brachio dextro fuit, e qua sanguis cum impetu exiit, sed mox substitit. Interea fumum tabaci Clyfma immittebatur, ventrisque ac thoracis eo modo frictio fiebat, ut Viscera abdominis continuo attollerentur; quo Diaphragma irritatum, una cum Costis & motis, & forma situque mutatis, excitari in respirationem posset. Hic labor decem minutorum fuit. Vix fluente sanguine de brachii vena, jugularem dextram, pulcre conspicuam, tutudimus, at sanguinis vix mediam unciam stillando obtinuimus. Quapropter
ape-

aperuimus jugularem sinistram, e qua quidem cum saltu prodiit primo momento sanguis, mox vero substitit; repetente interim suapte sponte dextræ jugularis fluxu, sic ut brevi duas cum dimidia uncias haberemus sanguinis sensu repentis. Fluxu tandem utrinque cessante, ad alia tentamina nos convertimus, in quibus dum movere corpus perpetuo oportebat, utraque jugularis abundantius fluxit; ita ut, quantum conjectura assequi poteramus, media sanguinis libra ex utraque effluerit.

In Os, atque Pulmones, aërem inspirare, injicereque in gulam calidum, stimulantemque liquorem, animus erat, at vero validissimus, atque plane insuperabilis maxillæ tetanus omnem oris aperturam prohibuit; Cochlea enim diducere maxillam annisi, dentes potius extrudebamus, fran-

frangebamusque, quam ut vel hilum maxilla moveretur, minimumve concederet hiatum. Itaque ore ori admo- to, aër spatio octo minutorum inspira- tus fuit : injectus autem, quoad ejus fie- ri posset, in fauces liquor, resiliit, elapsusque omnis est. Repetitum clyisma fumosum. Sex ampla empla- stra, dicta vesicantia, ad furas, femo- ra, humerosque utrosque, aceto pri- mum probe frictos, admovebantur, & quo agerent, calente cataplasmate crasse circumdabantur ; nihil vero intra trihorium egisse compertum fuit. Sæpius nares irritatæ faucesque sunt spiritu falis ammoniaci, eodemque tem- pore ventris & pectoris repetita agi- tatio, & iteratum tertio fumi tabaci Clyisma.

Post horas quatuor cum dimidia laborum, Cadaver aperui, præsentibus iis, quorum est Magistratus no- mine

mine eorum Cadavera lustrare, quos mors violenta rapuit. Aperto abdomine apparuit Jecinoris ea amplitudo, ut latus utrumque expleret, ac con-tingeret fere umbilicum: durities ejus tanta, ut cum post lustratum cranium pluribus in locis illud transscindere-
mus, per crassam cartilaginem pene-
trare videremur: colore purpureum fuit: intestinorum, præcipue tenuium, non modica pars ex fusco purpurea fuit.

Ne qua autem hæmorrhagia cerebri turbaret adspectum, mox aggressi illud sumus. Dura Mater paulo coloratior solito: Pia autem plurimum infarta cruore, ubique quidem, maxime vero ad medios posterioresque cerebri lobos. Sub Arachnoidea tunica serum subalbidum, barbæ gelatinosum, non paucum, effusum videbatur, membrana autem pertusa, lim-
pi-

pidum omnino erat; præ incipiente Membranæ opacitate tantum turbidum apparens. Sinus longitudinalis vacuus omnino, & pene vacui Laterales. Inanes & superiores ventriculi, tertius, quartusque. Ipsa autem cerebri moles transversim divisa solito pluribus scatebat rubris intercurrentibus vasis.

Aspera arteria, bronchiaque, quavis spuma carebant. Expansus pulmo fuit, nec ad omnem nostram contrectationem subsedit. Cultro divisus ubicumque fuit, sanguinem potius, quam spumam fudit. Nulla vero ejus cum pleura cohæsiō; quæ, ut obiter hoc loco moneam, hominibus ita familiaris, in nullo canum nostrorum deprehensa fuit.

Cor dextrum vacuum fuit, licet exempturi pulmonem, venam cavam probe colligassemus: sinistrum pauculum

lum grumosi partim, partim fluidi sanguinis, habuit.

Sanguis venis exceptus tenuis fuit, neque ad 18. postmodum horam concrevit: divisus tantummodo fuit in serum utcumque tenax, turbidum non-nihil, subalbidumque, & rubrum in fundo tenuemque aquæ rubræ similem liquorem. Ruber hic liquor mundo in cochleari prunis ardentibus impositus, in nigrescentem crassamque massam, ac si *Conservam*, aut *Andromachi Theriacam* videres, abibat; serum autem in materiem scissilem, albuminis ovi in modum. Jamque bis, semel in Submerso homine, alia vice in submerso cane, expressum ex pulmone transciso liquidum spumofum, atque rubellum, ad ignem scrutati, crassam ejusmodi conservam obtinuimus.

Qua-

Quacumque autem parte incideretur pulmo, parva tubercula habuit, concreto fere pure plena: sic ut homo diu pravum hepar habuerit, pravosque pulmones.

Sanguis jugularium venarum in causa quidem esse potuit, ut sinus cerebri vacuarentur, & signa Apoplexiæ validiora deprehensa non fuerint. Si a Cephalaëa Membrana pia sanguine non turgebat dudum, ipsa hæc Pia mater, una cum evidentioribus, copiosioribusque sanguineis per cerebri massam vasis, nonnihil Apoplexiæ ostendit. Pulmo cultro divisus sanguinem fudit quidem, spumofamque materiem, haud vero cum ea copia sive sanguinis, sive materie spumosæ, comparandam, quam toties in gravi Peripneumonia, maximeque in suspensis canibus, deprehenderamus.

Causa obscura non est. Desperabundus homo suspenderat se subligaculo cruris, ex lino contexto, adeoque forti, sed pondere corporis sic extenuato, ut tenuem chordam referret, quæ hinc inde excoriaverat colum, nec signa sui, ultra duas lineas lata, reliquerat. Laqueus hic neque Asperam arteriam, neque cartilagineam five Cricoideam, five Scutiformem, sed eam modo plagam, quæ inter hanc, & os hyoidis est, strinxerat; adeoque imperfectius viam aëream interceperat: unde diu pependerit oportet, luctatusque cum morte fuerit, antequam fontem animam efflaret. Forsitan hinc minus gravem Peripneumoniam pectus ostendit, quod tantam habuerit aëris suspensus usuram. Si Suspensi, ut multi volunt, morerentur Apoplectici, ab imperfecto hoc suspendio explicandus foret

gra-

gravioris Apoplexiæ signorum defectus; nos vero alia, per experimenta edocti, hanc Piæ Matris ac Cerebri conditionem rectius chronico capitis morbo, cum ceterum tot viscera inepta essent, quam laqueo, tribuimus. Vertebrae colli, earumque ligamenta, integra erant.

CAPUT VII.

De errore ex experimentis. Nonnulla de vulgi more, pedibus suspendendi Submersos, & in aperto utrimque dolio circumagendi; nec non quædam necessaria de Laryngotomia.

§. I. Errare nos crebro posse, quamvis solis freti experimentis videamur, evincitur. §. II. Examen consuetudinis vulgi Submersos pedibus attollendi, quo absorptam reddant ore Aquam. Laudan-

da est, etiamsi aqua nunquam deglutita esset; eo quod revocandæ respirationi potenter facere videatur. Viro claro Senaco, qui, ubi primum omnem aquæ sive deglutitionem, sive inspirationem, ut impossibilem declaraverat, deinde ejus, si etiam deglutita esset, vomitionem subverso corpore minime sequi scripsit, vario argumentorum genere, experimentisque contrariis, respondetur. §. III. Serium Examen Laryngotomiæ in Submersis aut instituendæ, aut omittendæ. Eam Dethardingius non ad inspirandum aëra laudaverat, verum potius ad eundem una cum spuma evacuandum; ostenditur per Epiglottidis erectionem, in singula demersi sive hominis, sive bruti, gula semper examinatum, & depressam, hoc ejus systema falsum esse; illudque ipsum evacuandi tentamen iterato experimento non successisse. Et expertissimo Weszpremio, nuperrime hanc operationem revocanti, ostenditur non hanc, sed crudelem institutæ ejusdem Laryngotomiæ methodum, una cum & prægressis, & subsequitis tentamentis, vitam sui navatæ

re-

revocasse. §. IV. Repetitio quædam eorum, quæ de Suspensis prius dicta. Harveyi monitum. Spes successus.

§. I.

Numerum Experimentorum utcumque idoneum habere me reor, ut de gravi nostra Quæstione paulo nunc certius, fidentiusque, differere queam. Unde primum adverto, ratiocinia nostra ne tunc quidem expertia fallaciæ esse, quando numerosis experimentis innituntur. Profecto autoritate fretus ego Plateri, Wepferi, Walschmidii, Beckeri, Dethardingii, Senaci, aliorumque celebrium Virorum; autoritate, inquam, quæ solis experimentis nata, aucta, firmataque videbatur; Aquam ventriculo Submersorum non hauriri credideram sic, ut Tomo meo XIII. idem negare ausus sim; experimentaque haud pauca mea pro-

pria ad hanc sententiam firmandam non parum postea contulerant. Nihilominus Canis meus *trigesimus* & *septimus*, eorum, quos aperui, *Vigesimus*, *Trigesimus octavus* & maxime *Quadragesimus*, me, cum cæteris errantem, veriora docuerunt; non tamen hucusque sic ut a deglutitis aquis mortem consequi oportere, didicerimus.

In viginti ac quatuor canibus per nos apertis, viginti & unius nullam aquam ventriculus ostendit, in tribus autem ostendit. Aqua ergo in eorum parte octava fuit. An proinde in reliquis aqua non subiit ventriculum? Hoc non ausim asserere. 1^{mo} Quia in duobus posterioribus canibus ventriculus nihil omnino turgens, aquam a se haustam non indicasset, nisi eam fæx atra demonstrasset. 2^{do} Cum multa atrata aqua ex ventriculo in intestinum duodenum, ex coque in jejunum, perreptasset:
fa-

facile contingere potuit, ut aqua copiosior deglutita quidem fuerit, sed, illa jam intra intestina suscepta, ventriculus ab aqua vacuus, aquam a se haustam non esse perperam negarit. Uti quoque *pauca* ventriculi aqua non evincet *paucam* haustam esse; quia cito, ut per nostra experimenta patet, pars multa ejus, quam ventriculus hauserat, transmeare in intestina potest.

§. II. Ventriculi porro aquam admittere coacti, an vulgi morem ideo laudabimus corpora Submersorum, pedibus suspensa, agitandi, quatefaciendi, ac concutiendi, quo potam eandem vomitu evacuent? Sane plerique omnes nunc hunc vulgi morem damnant, & primo quidem quod *damnosus* sit; secundo quod *inutilis*; tertio quod *ridiculus*.

Ad primum dico si *damnosum* hunc morem censeant, eo quod humorum

ad Encephalum determinatione ipsam posset Apoplexiam generare, considerare quoque oportet haud perraro nos cogi ad damnosa admittenda, quando quæ inde utilitas speratur, id quidquid est damni compenset abunde. Emetici actio violenta ad capitis morbos gignendos apta nata est; emeticum tamen dare, urgente alia causa, non gravamur. In Phthificis debilitatis nihil fere venæ sectione nocentius est: eam tamen imminens vitæ discrimen fieri quandoque jubet.

Ad secundum dico, non *inutilem* modo non esse eam plebis consuetudinem, sed utilissimam. Etenim motum Abdominis, viscerumque ejus in thoracem impulsus, quo Diaphragma, quo intercostales Musculi, Costæ, earundemque Musculi, sopitam vim suam revocarent, respirationemque resuscitarent, hæc agitatio, subver-

versique corporis succussio, eo, quo potentior non est, ordine, modoque, efficit. Intestinerum quippe omnium, ventriculi, jecorisque ingentis, pondus non solummodo in Diaphragma, & in Cor gravitat, sed agit atque has partes, mutuūque conciliat illis affricum: sic ut vix videatur par ei alia resuscitandi actio. Vulgi quidem opinionioni, de onusto ventriculo aqua, originem debet, quemadmodum & hujus opinionis per multos scriptores factæ explosioni ejusdem debetur omisio; at vero ipsi hi scriptores, haud videntur ad ejusdem in vitalia viscera imperium debite attendisse.

Hinc ad tertiam denominationem, qua *ridiculus* idem mos vulgi appellatur, indirectum jam datum responsum esse censeo: haud enim id ridiculum vocites, quod doceat, ut in primo responso est, ex duobus malis, mi-

nus eligendum esse; quodque, ut alterum responsum habet, auxiliorum præstantissimum esse videatur: sed tanti momenti esse res mihi videtur, ut responsum directum eidem oporteat adornari.

Ridiculum vulgi morem hunc, præter alios, magnæ autoritatis vir *Senacus*, loco antea laudato, contendit; quia per horrendum quoddam, nec raro letiferum, *Parisiensium* Experimentum, in Maleficorum tortura, constat, infusam violente in os aquam neque Asperam arteriam subire, neque faucibus deglutiri absolute posse: quod utrumque, si quandoque submerforum in corpore contigisse deprehenderetur, id contra *Littreum* statuit a morte tantummodo, & in supernatante propter corruptionem cadavere, locum posse habere. At vero hanc explicationem omnia nostra experimenta subvertunt: nostri canes enim

enim & nunquam mortui supernatarunt, & fere semper Aquam pulmonibus, nonnunquam & ventriculo haussisse reperti sunt.

Sed addit idem Archiattrorum Comes: „ Neque, si haussissent aquam „ ventriculo, eam profecto vulgata „ per pedes suspensione ore redderent. Dantur qui pedibus in altum ductis, penduloque capite, „ duas abliguriant vini pintas.“ Vim musculorum œsophagæorum ad hæc admiratus, atque obstupescens, „ sed sufficit, inquit, in hujus exempli ad merfos applicatione „ ne hoc, quod vini pintæ duæ semel in ventriculum admittæ, in hoc inverso situ evomantur nunquam.

Sed respondeo 1^{mo} Demersorum Corpora inferioribus in altum non suspendi duntaxat, sed etiam vehementer

ter quate fieri, concuti, adeoque man-
cam esse, quam hos inter, suosque inver-
fos potatores fecerit, comparisonem.
Ajo 2^{do} id certum esse, quod hoc in situ
Corporis facta concussio subvertat
ventriculum. Experitur hoc, quisquis
post prandium pedibus nixus in pavi-
mentum diutius inclinat sese, aliquid
ibidem dispositurus. Deinde, vir in
stagno demersus pag. 28. hac subversi
corporis concussione primum aquam
ore reddidit, dein alimentorum por-
tionem. Tandem debita habita cau-
tela ne deciperemur, aquam ore na-
ribusque profluam, non modicam,
vidimus, ubi animalium, cruribus
posterioribus suspensorum, abdomi-
nalia viscera in Diaphragma move-
remus.

Memorable exemplum hoc idem
confirmans, & utile Practicis, ex Com-
mentariis meis huc transferam. An-

no 1743. die 2. Novembris Matrona senex narrabat mihi, se juvenem, unum cum Patre suo, Jurisconsulto celeberrimo, adfuisse præstantissimi apud *Haga Batavos* Medici *Cocq* in ædibus, dum Strenuus Vir militaris consultaturus eundem accederet: Medicum, relictis illis, militem in aliud cubiculum duxisse, eoque dimisso redeuntem, sibi, suoque Patri, quæ secum communicasset ille, narrasse. Contigisse scilicet, ut capeffens per loca iter, infesta admodum depeculatoribus, quosdam nummos aureos, *Pistolen* vocant, deglutiret, eosdem domi facile alvo redditurum se ratus: falsum tamen fuisse se, vehementerque nunc dolere sæpe, angique, testabatur; neque ab his, quorum operam imploraverat, vel hilum levare. Tandem addebat *Cocquius*, Vir, siquis alter, religiosissimus, se militem alterum in diem con-

di-

dixisse, ut interea de apto consilio apud se agere, & præparare nonnulla, commode posset. Aliquo postmodum tempore elapso, Medicum ipsis narrasse, quidnam consilii iniisset, quemque effectum id habuisset. Virum, quippe copioso oleo primum impletum, fune, ope Trochlearis ad lacunar firmato, pedibus extolli in altum per aptos ad id viros curaverat; quo in situ, motuque, tandem in vomitum excitatus, nummos cum oleo vomuerat, moxque omni & anxietate, & dolore, expers erat. Filia egregii hujus Medici, Matrona sinceritate & Religione Patri par, *Hagæ-Bata-vorum*, dum viveret, spectatissima, & verissimam hanc Historiam esse, affirmabat, & se eam a Patre conscriptam, possidere.

Ergo

* Quamdiu nummos in ventriculo gesserit miles, ignoro: posse diu cum manere in eo, tum evomi

Ergo ex tot argumentis patet Viri magni *Senaci* Sententiam minus veram esse; & si aqua deglutita esset, subversi corporis agitatione evacuari eam posse. Variantibus, quod toties mirati sumus, experimentis, negare ultra non auderem enormi aquæ sarcina inundari ventriculum posse. Quo in casu duplici modo hæc operatio

tandem ejusmodi res, & Historia Medica docet, & proprio experimento didici. Contigit mihi Anno 1751. Mense Januario, ut ad puerum triennem vocarer, qui crassum, eumque æneum, nummum ludendo deglutierat, quemque aptus a me vocatus Chirurgus nulla industria eximere ultra poterat. Interea multa oleosa per os immissa, perque anum, sunt. Plurimum anxius per octiduum puer, paulatim minus male habebat, iterumque ventriculus commode admittebat alimenta, solida tamen ægrius, quam fluida; quare his solis bimestri vixit spatio. Die tandem sexagesima sexta, cum ab assumpta pulte in tussim adeo vehementem proripatus esset, ut subverteretur ventriculus, una cum pulte nummus prodiit, quem totum nigrum, non multum erosum, vidi.

tio conferret. Sed inundetur sic nunquam; an ad vires vitales refuscitandas minus valentissima erit? Quapropter hanc ipsam operationem, quam inter mea tentamina jam aliquoties Lectores mei benevoli notarunt, in futuris attentus prosequar, & singulis adhibebo. Videtur enim, prætermisso etiam ventriculo, pectus tantopotenter concuti, ut si qua aqua, trachæam subeuns, in spumam cum aëre conversa sit, violenta hac subversi corporis concussione moveri quandoque, expellique possit.

§. III. *Laryngotomia* nunc examinanda serio est. Inutilem hanc censuere ii, qui neque inspiratam aquam esse, neque impeditum aëris per Glottidem iter, statuerint. *Dethardingius*, cujus opus in hac quæstione sæpius laudatur, non quidem ex propria observatione, at vero *Plateri*, qui nunquam

quam deglutiri aquam; *Wepferi*, qui aquam nunquam inspirari; & *Wallschmidii*, qui nunquam aut deglutiri illam, aut inspirari, docuerant, auctoritatem veneratus, Laryngotomiam, ut Princeps submerforum auxilium laudavit; spasmodice Laryngem Epiglottide claudi, eodemque modo Pharyngem, ut in neutram illabi aqua possit, arbitratus. Hanc autem operationem ad aërem inspirandum minime faciendam censebat esse, verum potius ad eundem educendum, qui hic nimis rarefactus, commistioneque cum exhalante ac transsudante Pulmonis materie in spumam versus, circuitiorem humorum per pulmonem sisteret; quo aëre spumoso educto, novus, isque serenus aër, permeare denuo viscus posset. Hanc *Debardingii* opinionem, cui cura ejus omnis innititur, constans in singulis

Pars II. *L* *Sub-*

Submersis observatio de surrecta Epiglottide, precariam ostendit. Epiglottis enim si semper surrigit, aëri expirando esse impedimento non potest. Deinde enarravi, nos frustra spumæ hujus ex Larynge exemptionem tentasse, cum aut crassior sit, quam ut syphonis spiraculis imbibatur, aut situ profundiore hæreat, quam ut ad illam instrumentum pertingat. Tandem sæpe nulla ejus in Trachæa portio deprehensa est, in Bronchiis omnis contenta. Experimenta quater repetita Tomo XIII. & in hocce renovata, id ostenderunt.

Contra vir expertissimus *Weszyprmius* in *Obs. Medicis, Trajecti anno 1756. editis*, in *Obs. 8. §. 2.* in Viri Epileptici, frigidum balneum ingressi, inibi que submersi, ac bihorio jam aëri expositi, cadavere, aquam quidem nullo in viscere deprehendit, sed ex Trachæa

chæa perforata aërem leni quodam sibilo erumpentem, se audivisse existimavit. Hinc in Demersis Trachæotomiam necessariam esse confecit; & *Obs.* 9. in dato sibi homine, quem *Tame-sis* fluvijs sesquiquadrante merferat, eandem se cum reditu hominis in sanitatem, perfecisse gloriatur.

Quæritur tamen an huic Operationi Vitæ redditionem absolute cum Autore debeamus? In ea intendamus duntaxat, quæ eidem prægressa leguntur. 1^{mo} Corpus quo momento in ripam ducitur, madidis exui vestibus, totum detergeri, ficcisque indumentis indui, solerter curat; quod dudum inter selecta auxilia merito recensuimus. 2^{do} In proximas ædes deferitur demersus, & ante focum incensum lecto sic committitur, ut pedibus capite altior sit, atque rite contegatur. 2^{tio} Utroque in brachio,

inque Jugulo, vena secatur. 4^{to} Fumus Tabaci fistulæ ope repetitis vicibus validissime in anum immittitur. 5^{to} Abdomen forti compressione a pube sursum urgetur. 6^{to} Pannis Spiritu vini tepido, oleoque olivarum madefactis, omnes, a summis ad imas, Vertebrae, lenius primo, mox violentius, diu multumque fricantur. 7^{mo} Eodem tempore alii hoc ad infernos supernosque artus, in ruborem usque faciunt. 8^{vo} Aceti, ac spiritus Vini, Cinamomi, Nucis Moschatae, Caryophylli aromatici, ac Camphoræ viribus medicatorum, fotu scrobs Cordis, Umbilicus, & Scrotum, refocillantur. 9^{no} Nervos narium, Tempora, singulaque loca Corporis, in quibus arteriæ cuti viciniore locantur, Spiritu salis ammoniaci fricant, horamque integram, citra vitæ signa conspecta, hisce laboribus impendunt.

Tan-

Tandem 10^{mo} irritationem maximam fecerunt rudi, si unquam, Bronchotomia; quandoquidem, instrumentorum defectu, integumenta Trachææ, & ut ait, musculos, cultro communi avulserunt, fistulam tabaccariam, deficiente Cannula, in aperturam intruferunt, guttulas aliquot Aceti, Spiritusque salis ammoniaci, vulneri instillarunt; atque tandem sub extemporali hac operatione obscura vitæ signa, paulatimque manifestiora, animadverterunt, ac post hæc animadversa, priora tentamina præcipue repetiverunt; sic ut bihorii labore hominem in plenam vitam restitutum gauderent.

His ita per omnia consideratis, quæritur jurene, an injuria, statuerim Laryngotomiæ, non qua tali, sed qua irritationi crudeli, una cum ceteris masculis irritamentis, hanc la-

tentis vitæ reversionem adscribi oportere? Judicent experti, & gnari rerum! Non is tamen sum, qui hanc Operationem absolute rejiciam. *Veszpremi* exemplo, sed citra alia auxilia, eandem in animalibus repetam, quid sola efficiat consideraturus: repetam quoque cum auxiliis reliquis, tanquam irritationis complementum.

De ceteris auxiliis non est, quod disputem: calculo suo omnes per Europam Medici approbant, eorumque in resuscitanda, quæ latuerat, vita, effectus laudant abunde. Enumerantur hæc in *Regio Edicto* 1. *Julii* anni 1769. & in hoc opere pluribus aucta, sæpius enarrantur.

§. IV. Suspendorum quæstio satis agitata fuit pag. 110. ut multum dubium post se reliquisse non videatur. Id unice ex eadem conficiendum esse puto, quod neutiquam mirum sit adeo

varios, adeo sæpe contrarios ejusdem effectus enarrari. Citra Cadaverum inspectionem, mortem illam, quæ Apoplecticorum est, eam & Susensorum esse, ex vera Theoria multi facile crediderunt; cum susensorum autem anatome, alii ablato, ut fit, laqueo, de mortis natura judicantes; illæsam alii, alii confractam Asperam arteriam inveniunt; alii ex insolentiore suæ Regionis Carnificina de omnibus judicantes; variamque admodum plagam Colli, quam strinxerat laqueus, alii contemplati, rem denique definierunt sic, ut qui aliter, ipsis perperam scripsisse viderentur: perinde ac si quod in unico, vel quod in paucis saltem, hi invenissent, idem in omnibus fieri oporteret. Imprudenter profecto hi: modus suspensionis enim, & mora ejus, & corporis pondus, & violenta capitis pronatio, ip-

seque aut constringens adhuc, aut relaxans laqueus; situs præterea cada-
veris, colli, capitisque, dum, ma-
nente laqueo, Anatomicum examen
fit; tempus a soluto laqueo elapsum;
præmissio aliarum partium Anatomies
sanguinariæ, ante lustratum Encephalon;
imperfectum, ut nostri hominis
erat, suspendium; & forte multa alia;
rem mutant sic, ut quidem singuli
vera suo modo scribant, singuli au-
tem, id quod invenerint, & semper,
& ubique, & ab omnibus, inveniri
oportere, arbitrati, turpiter profec-
to errent, imponantque lectoribus.
Haud satis memores videmur Autoris
esse, cujus præcepta nos juvenes impen-
se delectabant, elabi memoria nobis se-
nioribus solent; ingentem *Harvæum*
loquor, *Edit. Lond. anni 1766. pag. 126.*
sic dicentem: „ Ego aliquando in
„ Cadavere humano noviter strangu-
„ lato

„ lato intra duas horas a suspensione aperto
„ pectore, & pericardio, antequam
„ faciei rubor evanuerat, auriculam
„ dextram cordis, & pulmones, plu-
„ rimo distentos & infarctos sangui-
„ ne multis adstantibus ostendi,
„ præcipue vero auriculam ad maxi-
„ mi hominis pugni magnitudinem,
„ turgentem adeo, ut disruptum iri
„ putares. Quæ moles *die sequente* re-
„ frigerato penitus corpore, & per
„ alias vias cruore dilapso, detume-
„ scens evanuit.“ Et pag. 39. „ Qua-
„ liter sanguis pertransire per omnium
„ partium poros possit, ne durum
„ hoc videatur, & quaquaversus
„ meare, unum addam experimen-
„ tum. Laqueo strangulatis & su-
„ spensis accidit idem, quod brachio
„ ligato; ut trans chordam scilicet
„ facies, oculi, labia, lingua, par-
„ tesque omnes superiores capitis,

„ plurimo infarciuntur sanguine, ma-
„ ximo rubore perfundantur, turge-
„ scunt usque ad livorem. Hujusmo-
„ di cadavere, soluto laqueo, quacum-
„ que positione collocaveris, intra
„ non multas horas videbis omnem
„ sanguinem vultum & caput dese-
„ rere, & a supinis & sursum positis
„ partibus, in pronas & subjectas,
„ per poros cutis, carnis, ceterarum-
„ que partium suo quasi ductum pon-
„ dere, decumbentem, & omnes il-
„ las partes infra positas, & cutem
„ potissimum, replentem, atro tabo
„ colorare.“

Sed de suspensis forte satis. * III.
Vir de Haller El. Phys. Tom. 3. §. 19.
„ Stran-

* Haud in Suspensorum modo, verum etiam in sin-
gularum Cadaverum sectione, in quibus morbo-
rum causas & effectus expiscari conamur, hæc
Hervæi monita menti obversari debent. Sed ul-
tra addi aliquid decet. Non ea enim notanda

„ Strangulatorum hominum huc,
 „ (ad submersos,) non pertinent,
 „ qui post fatis longam moram refo-
 „ cillantur. Eos enim homines faci-
 „ le crediderim apoplexia potius,
 „ quam ex intercepto spiritu perire.
 „ Stupent certe, colores vident pri-
 „ mo vividos, inde tenebras meras.
 „ Minus ergo mirum est adeo frequen-
 „ ter convalescere, resecto fune, ve-
 „ na incisa. *Florentiæ* adeo vulgo re-
 „ dibant ad vitam, ut necesse fuerit
 „ mutare mortis genus, & vertebrae
 „ luxare. Non tamen admittunt expe-
 „ rimenta mea, laqueum organis re-
 „ spirationis. Non nocere. Nam vi-
 „ di funestum funem inter Cartilagi-
 „ nem

solummodo est, quæ a morte, ob causas quas-
 eumque, contingere mutatio possit, sed & illa,
 quam, ante mortem, in parte affecta efficere
 medicatio debuerit, ut haud ultra talis hæc sit,
 quam alias fuisset.

„ nem scutiformem, & os hyoidis,
„ in Pharyngis caveam irrupisse: vi-
„ di Cricoideam cartilaginem a bron-
„ chio separatam fuisse: vidi ruptam
„ scutiformem, ut superior pars sur-
„ sum distraheretur, inferior deor-
„ sum, & similia nostrorum alii celeb.
„ Viri, *Weisse*, & *Mauchard*, vide-
„ runt.

Integrum magni viri textum lau-
dare volui, ut pateat eum non ita
mortem suspenforum mere Apoplecti-
cam esse censere, quin & per ipsa sua
experimenta eandem peripneumoni-
cam esse invenerit. Quod autem la-
quei locum exacte, ut in nostro su-
spenso deprehensum, ad aëris interce-
ptionem tantopere contulisse credat,
facile cum illo etiam in nostro homi-
ne credidissem, ni enormis, ut totius
hominis, ita & præcipue, colli cras-
sities, stringentis hoc modo funis pres-
sio-

sionem profundam in Laryngem impedivisset.

Ceterum hominum suspenforum, demerforum, & suffocatorum, Anatomæ minus longe fidam, eo quod vehementer eos mutet tentata vitæ revocatio, quam illi Canum meorum, quos protinus a morte, cauta quavis mutatione, aperui. Quæ mihi scitu necessaria, eaque haud sane pauca, desunt, ea simili partim, partim novo prorsum modo, expiscabor.

Sufficiat id constituisse, quod ad vitalem auram, in iis resuscitandam, haud aliam methodum, quam quæ & demersis, & quod suo quoque tempore forsitan demonstrabimus, suffocatis, admoveere solemus, admoveri oporteat. Quæ si his singulis mature, apte, constanterque adhibetur, nullus dubito, quin & vera ea esse pateant, quæ scripto nobis reliquerunt

runt Majores nostri, quibus cordi
proximior, quam nobis, erat publi-
ca salus; & quæ duo Medici, Zachias,
& *Anonymus*, Romanus alter, alter An-
glus, hic de suspensis, ille de submersis
& suffocatis, testati sunt: ac poste-
rior quidem, de quo *Verulamius Edit.*
Francof. pag. 560. „ Audivi etiam
„ de Medico adhuc vivente, qui ho-
„ minem, qui se suspenderat, atque
„ per horam dimidiam suspensus manserat,
„ in vitam fricationibus & balneis calidis
„ reduxerat; quique etiam profiteri
„ soleat, se non dubitare quin su-
„ spensum quemcumque ad tempus
„ prædictum revocare posset, modo
„ cervices ei, per impetum primæ de-
„ missionis, non fuerint effractæ: “
prior autem *Paulus Zacchias* Romanus,
totius status Ecclesiastici Protomedi-
cus generalis, *Tom. III. Quæst. Medi-*
co-Legalium, Consil. 79. pag. 127. Edit.
No-

Norimb., ubi respondendum erat Reverendo Monacho, qui juvenis submersi in vitam revocationem indubitanter miraculosam, bonique servi DEI cujusquam precibus adscribendam, acriter contendebat; primo advertendum esse monet, juvenem multas mucositates, & aliquam aquæ copiam, post quatuor consequentes horas ore emisisse, de quo cum testes non convenirent, utrum ante edita prima vitæ signa, an post eadem animadversa, contigisset; „ Quomodo-
„ cumque tamen sit, inquit, certum
„ esse debet non modo hoc miraculo-
„ sum non esse, sed neque inter ea
„ eventa commemorandum, quæ
„ multam admirationem audientibus
„ excitare consueverunt: quippe cum
„ pateat alios permultos... cum in
„ aquis vel alia ratione suffocati es-
„ sent, revixisse.

CAPUT VIII.

Responsio ad graves duas Objectiones.

§. I. *Obiectio prima ex multarum gentium Annalibus formatur, plures in vitam revocatos memorantibus, qui horas, qui dies, ipsasque septimanas, latuerant sub undis. Alteri objectioni materiem suppeditat vita, sive cum modicis omnino, sive admodum procrastinatis auxiliis, reparata. Multiplex ad utramque responsio.*

§. I.

Finem operi imponere licuisset, ni una alterave diluenda obiectio fuisset, cum momentosa utraque videretur; citraque aptum responsum, spectatissimorum in arte Virorum fidem, auctoritatemque, a me labefactatam in hoc opere esse, haud pauci,

ci, nec immerito plane, conqueri possent.

Dixi quippe, repetivique, sperabilem salutem fore, quando primo homo diu merfus in undis non fuit; secundo quando præceps illi præstatur auxilium. Jam vero qui, librorum Helluones, Schenkium, Bonetum, Borellum, Helmontium, Pechlinium, Derhamum, Winslowum, Brubierium, Ill. B. van Swieten, aliosque scriptores gravissimos, consuluerunt, ut præ ceteris fecisse videtur *Embryologiæ sacræ* Autor, Franciscus Emanuel Cangiama, Ecclesiæ Panormitanæ Canonicus, Regniq. Siciliæ Inquisitor, cujus *Libri tertii Caput 20. 21. & 22.* legi merentur attente, veluti omnis de hac re Historiæ Epitome; hi inquam, opponent mihi submersorum complures, qui horas, qui dies, qui plures etiam septimanas, hospitati in

Pars II. M aqua

aqua, & ex ea elati, vitæ signa dedere, perfectamque sunt adepti sanitatem; nec minus mihi exempla proferent promptæ in salutem restitutionis, etsi auxilia aut perpauca, aut tardissima, admota fuerint.

Non diffiteor comparari Sylvam Historiarum, quæ hoc probent, posse: verum mecum, precor, animadvertant hi, quam parum exactas hujusmodi relationes esse oporteat, sive determinatæ justò horæ præcipitationis in aquam, sive moræ in illa, sive elationis ex eadem, sive denique auxilii primum adhibiti. Didici hoc in experimentis meis, dum scilicet quidam circumstantium mihi, in horologium non attenti, tempus sive submersionis, sive cujusquam operationis, erronee admodum, multoque plerumque longius, determinarent, quam ego, intuitus in horologium,

gium, quod unus idemque perpetuo, ad notandum in charta cujusque operationis tempus, consulebat, advertebam. Ignorat passim submersus, si redeat ad se, quo temporis momento in flumen ceciderit: ignorant justum momentum temporis ii, qui illum inde duxerunt in amnem, variantque in referendo, ut contigit me coram, per minuta, per medios, integrosque horæ quadrantes. Ita ut non nisi præterpropter illa admitti oporteat, quæ illi præterpropter conjecturando assequuti, testantur; in prolonganda, quam in abbrevianda tempora, passim proniores.

Secundo in hisce, quæ opponuntur mihi relationibus, insolita plane, atque stupenda, eaque non pauca, enarrantur. Cujusmodi est præservatio corporum a putredine, dierum, septimanarumque spatio; auditus sub

undis; mens sibi præfens; respiratio
commoda; inambulatio quingento-
rum passuum; fusæ ad DEUM pre-
ces: in alio homine desiderium peren-
ne enatandi, sed propter glaciale
aquæ superficiem frustraneum; post
diem vero tertiam in gurgite trans-
actam Vita sana, vegetaque: in ter-
tio, vita incolumis, integri sensus,
corporis erecti demum stantisque fi-
tus, octiduo servatus in undis, cum
sequente hominis testimonio: „ Ne-
„ scio utrum in profundo respirave-
„ rim, visum certe atque auditum
„ retinui: nam & tintinnabula au-
„ diebam, & demissum ad me re-
„ trahendum uncinum apprehendis-
„ sem, si manus frigore satis rigidas
„ immobilesque movere potuissem.
„ Pisces continuum & implacabile
„ bellum oculis meis intulerunt, quo-
„ rum insultus palpebrarum motu de-
„ clina-

„ clinabam. Ad aquæ motum ma-
 „ gnus insurgebat in auribus dolor,
 „ qui in ceteras corporis partes dif-
 „ fundebatur. * Per id tempus nun-
 „ quam fame laboravi: arbitror au-
 „ tem me quandoque obdormivisse.
 „ Ceterum aliud nihil vigilans cogi-
 „ tabam nisi DEUM, propriamque
 „ salutem: aliorum saltem in præsen-
 „ tia non reminiscor. *Vid. N. C. Dec.*
3. ann. 5. § 6. Stupendior adhuc
Joannis Jonæ in Actis Suecicis vitæ, per-
 integros quadraginta & duos dies sub
 aquis conservatio, cujus meminit *Lan-*
celottus Misc. N. C. Dec. 1. Dum por-
 ro mihi adeo stupenda narrant, ut
 Miraculum rectius, quam Naturam
 sapiant, nihil prorsum video, quod
 me, secundum consuetas, obviasque

M 3

quo-

* Mulier servata *Viennæ* 1769. tormentum maxi-
 mum ab aqua in aurem illapsa se passam esse
 quoque retulit. *Tom. XIII. pag. 245.*

quotidie Naturæ leges judicantem, condemnet. *

Eo minus me terret *Helmontii Hydrophobus*, quem ille a rabie canina fatum salutavit, tripla in mare præcipitatione, & prima quidem tempore, quo quis *Psal. 50. Miserere mei* præcaretur; altera, tertiaque, tempore *Angelicæ salutationis*. Si horologium consulisset, ut ego in meis experimentis, accuratius nobis immersionis durationem tradidisset. Suspikor quoque, conjecturando illum potius, quam orandis his precibus, tempora determinasse; cum requisita ad preces attentio animum a spectaculo miro, quo unico occupandus erat, avertisset. Ut autem tuto quid hic definirem, deprehen-

* Licet sint, quibus quoddam valde naturale illis contingere videatur, qui in aqua & gelidissima, & superficiem habente glaciata, mergunt; stupenda tamen, ac prope miraculosa, hæc vocare malim, eoquod neque ratione, neque exemplis, hanc opinionem fulciverint.

hendi me hunc Psalmum duobus minutis absolvere, & salutationem angelicam decies in minuto precari. Hinc adeo parum miror *Hydrophobum* in plenam vitam rediisse, ut, si periisset, miraturus fuisset. Nondum enim mihi hominis notum exemplum est, cujus, non diutius merfi, irrevocabilis vita fuerit.

De *Fabro lignario* suo, deque commendabili a probitate *Muliere*, quod idem Autor narrat, demersionis tempus perbreve fuisse credibile admodum fit, cum non determinaverit illud; certo determinaturus, si rei mirabilitatem augere diuturnior in undis mora potuisset. Et quia etiam neque de prior juvenile demerso, neque de posteriore, quid notavit, nisi quod *FORTE* per dimidium horæ subter aquam delitissent, non percipio hic quidquam, quod mihi contrarium sit, per me-

diam horam merfos nunquam accensenti desperatis.

Audiendi tandem & illi sunt, qui suspicantur, me immodica sollicitudine superstitem scintillam vitæ extinguere: quæ ego, eaque plerumque frustra, instituerim, tentamenta numerosa, quæque e contrario ab aliis modica, ac nulla fere, admota præsidia cum successu fuerint, serio contemplati. Neque plane, quod subterfugiam, est. *Helmontii Hydrophobum collocarunt supra vasteres supino dorso oblamyde tectum: suspicabar, inquit, illum obiisse, sed metum risit nauta, nam solutis vinculis cepit omnem muriam rejicere, QUAM INSPIRAVERAT, & mox revixit. Erat viator Gandavensis. Qui dein rabie liberatus, sospes vixit. De Fabro maniaco, qui e plaustro in profundum stagnum insiliens, & ereptus, sanæ mentis annis 18. postmodum vixit, non retulit latæ opis*
mo-

modum. Quantum ad *Mulierem* probam, hanc ad vicinum pagum detulerunt, In quo uxor hospitis illam in mensa prono situ, & capite declivi posuit. Factumque est, quod sic **AQUAM IN PULMONE HAUSTAM** demiserit. Et de *Hannoniæ* montium adolescente, natatu submerso, refert nobilem Matronam, sui itineris sociam, eum prono situ super genua sua extendisse, cumque flaccidus sic penderet prorsus nudus, cepit tandem, rejecta aqua, respirare, & revixit nobis adstantibus. Tandem unigenitus viduæ divitis filius, quem Mater, gremio suo susceptum, amaro cum fletu osculabatur, jubente *Helmontio* in gremio ipso pronatur capite humerisque declivibus, & horæ elapso quadrante respirat. Quandoquidem porro negotio tam facili & in his, & in compluribus aliis, revocata vita fuit, & importunioribus meis labori-

bus rara observatur vitæ revocatio, annon hosce vitæ præjudiciosos, illud vitæ proficuum, salubreque, censendum est?

At vero hos, qui mihi hunc scrupulum injiciunt, perhumaniter rogo, ut plurimorum in vitam revocatorum Historias retexentes, mecum in iisdem attendant differentiam in vitæ latentis revocamine, tam suspensorum hominum, quam submerforum; sic quidem, ut nonnulli protinus resperant, loquantur, & surgant: alii vero tardius, imo nec nisi post horas plures, in vivis se esse testentur. Hæc porro ratio est, cur harum rerum gnari sedulo hortentur, ne nos inanium principio laborum toedeat, multos in vitam non revocari experti, nisi exantlatis plurium horarum laboribus.

Dein-

Deinde non satis perpendisse videntur, hæc laboriosiora, diuturnioraque, tentamina neque fieri, neque suaderi, ubi leviora, atque breviora, rem absolverint: ita ut si nostri homines, nostræque bestię, primo labore revixissent, quemadmodum de suis perhibet *Helmontius*, læti superfedissemus protractioribus.

Tandem si ea sic se habent, quæ Capite VII. de vulgari methodo, pedibus submersos suspendendi, in usum revocanda monui; modum submersis auxiliandi ab *Helmontio* relatum, ex valentissimis præstantissimisque esse, facilis dabo. Eam quippe rationem cum submersis agendi ibidem laudare debui, quæ omnium promptissima ac potentissima esset, ad aptitudinem respirandi Musculis abdominalibus, Diaphragmati, Costisque, conciliandam. Hanc porro esse Corporis sub-

versi

versi agitationem ibidem constitit. Eandem apud *Helmontium* tam nau-
tæ, quam mulieres, proxime imitatæ
sunt. Vidit quippe ille, dum Cor-
pus vel in dolium, vel in mensam,
vel in gremium matris, sic pronarent,
ut pendulum caput cum thorace esset,
aquam, quam ille quoque haustam
pulmonibus esse credebat, sic ore ela-
bi, ut respiratio sequeretur. Ut ita-
que causæ ingeminent, quæ inter fu-
tura experimenta hujus methodi
exercitium præprimis explorare, pro-
movereque, jubent.

F I N I S.













APPENDIX.

Contigit haud ita pridem casus, qui Operi insertus illud ornaturus fuisset: unde eum Appendicis modo operi jam absoluto adnecto.

Duo Aulicarum Tapetum Curatoris famuli, vespere ex Aula lassifrigentesque reduces, ad nonam vespertinam in parvum suum cubiculum se recipiunt, & posito in eo vase cum prunis ardentibus, alter lectum statim petit, alter in lecto legit ad 12. horam, extinctoque tunc lumine ad somnum se componit.

Mane neuter prodit. Unde ad horam nonam cubiculum aperiri jubet Curatoris uxor, ipsaque simul in-

Pars II. **N** *trat.*

trat. Vidit per densum fumum singulum singulo in lecto famulum pene mortuum, vultu purpureum, spuma densa ore oblitum, moribundorumque stertore respirantem. Vicinum Chirurgum *Heifeld*, actutum quæri jubet, cujus tiro primarius advolans, opem protinus præstat; curatque suum Medicum *Rhein* appellari, eoque non inveniendo, ordine plures; quorum primus *Exp. Seredi* accedit, hora circiter undecima.

Chirurgus interim, dum Medicus expectatur, quæ debuit, quæ potuit, fecit. Cubiculum fumo adeo grave, ut pectore ipse angeretur, aperta janua fenestraque lustravit; misit utrisque sanguinem, qui pleno jactu exiliit; os, ipsum fumum spirans, aperuit; aquam cum Spiritu Cornu Cervi illi infudit, deinde jus carnis; & unum quidem in mænia, quæ Aula
con-

contingit, duxit, alterum vero in cubiculo undique aperto, probeque illustrato, reliquit. Interea bihorio elapso, quem dixi Medicus accessit, qui mox clyfma curavit injici ambobus, oleum multum primum ingessit, postea fauces plumula irritavit, ut vomitum provocaret; vomuit autem unus duntaxat, idque aliquo cum levamine. Tum & quinque lata Vesicantia admo-
veri curat ambobus, & omni bihorio uncias duas Aquæ laxativæ ingessit.

Dum autem Chirurgus principio solus, Medicus & Chirurgus postmodum juncti, hæc omnia perficerent, toto intermedio tempore continuo varias corporis partes, vario modo, varia fricabant materie.

Successit porro cura sic, ut is, quem in mœniis locarant, ad quartam ad se rediret, & loqui inciperet; ut qui in Cubiculo undique aperto jacuerat,

hora secunda vomeret, & hora tardius priore loqui intelligereque inciperet: sic ut vespere refecti ambo aliquid nutrimenti sumserint, ac noctem tranquillo somno transegerint. Ego tandem sero vespere rei certior factus, misi Chirurgum Nosocomii, qui in illam inquireret: rediit convalescere referens utrumque.

Altero mane ambos vidi, & quidem eum, quem mox pleno aëri exposuerant, hilarem, perque ædes obambulantem; alterum vero adhuc debilem, leviter febrientem, lecto inhærentem, nec respiratione libera adhuc gaudentem. Continuata autem Aqua laxativa, die eum tertio sanum inveni, ambosque unice conquerentes de Vesicantium dolore molestiaque. Prior quidem altero die, cum dies Dominica esset, casus enim die Saturni contigerat, Templum adivit, suam tamen teme-

temeritatem dolens, cum animo fere ibidem deficeret. Utrumque post tri-
dum sanum vegetumque salutavi.
Quæ in hac historia ipse non vidi,
ex relatione utriusque, nec non ex ea
Matris familias, Medici, Chirurghi,
aliorumque, qui convolaverant, sup-
plevi.

En rursus notabile, idque gemi-
num, vitæ revocatæ exemplum, quo
constat pauca minuta tantummodo de-
fuisse, quin & signa vitæ omnis de-
fuissent, & ambo hi, solito publicæ
autoritatis more, anatomicè lustrati,
tumulatique fuissent, qui jam vero
ambo, humanis DEO OBSECUN-
DANTE laboribus, mortis e faucibus
erepti, perfectæ sanitatè fruuntur.
Ejusmodi exemplis Vulgus demum in-
telliget, quomodo deinceps opitulari iis
oporteat, qui vel, ut hi carbonum ve-
nenato vapore, quo hic multi quotan-
nis,

nis, ut adhuc hac hyeme, e medio tolluntur; vel Vini in caveis fermentantis; vel clausorum dudum Puteorum exhalatione; aut perituri, aut jam periisse, videntur. Humanitas sui quemque officii monebit abunde; Religio compellet; Conscientia urgebit: si vero existerent, quos neque hæc sat potenter commoverent, hos saltem Regia munificentia, præmio viginti quinque florenorum quemvis remuneratura, qui vitam homini aut suffocato, aut submerso, aut suspeso, pene extinctam se revocasse juridico testimonio comprobaverit, quemadmodum in Edicto 1. Julii 1769. habetur, ut debitam operam hisce infortunatis navent, stimulabit.



ERRATA.


Pag. 33. lin. 11. post notaveram, adde quæque. Pag. 37. lin. 12. *vita* lege *vitæ*. Pag. 44. lin. 4. *nunquam* lege *unquam*. Pag. 55. lin. 9. *exprimentis* lege *experimentis*. Pag. 58. lin. 10. *optimns* l. *optimus*. Pag. 62. lin. 3. *gaudemus* l. *gaudeamus*. Pag. 63. lin. 1. *iterum* l. *iterumque*. Pag. 68. lin. 17. *glotidem* l. *glottidem*. Pag. 69. lin. 18. *egregrius* l. *cgregius*. Pag. 70. in Nota *Bronchontomie* l. *Bronchotomie*. *ibid le vie* l. *la vie*. Pag. 109. lin. 17. *fir* l. *fit*. Pag. 128. lin. 3. *æquæ*, l. *aquæ*. Pag. 129. lin. 12. *dutem* l. *autem*: & post *intestinum* dele comma. Pag. 134. lin. ult. *udas* l. *duas*. Pag. 135. lin. 3. *dimidio* l. *dimidia*. Pag. 157. lin. 21. *religiosimus* l. *religiosissimus*. Pag. 159. in Nota, *iuterea* l. *interea*. Pag. 171. lin. 16. *respirationis*. Not *nocere* l. *respirationis non nocere*.

ERRATA

PARTIS I.



Pag. 8. Lin. 16. *nt* lege *ut*. Lin. 18. *econtinæ* lege *continua*. Pag. 17. Lin. 4. *constitid* lege *constitit*. Pag. 43. Lin. 5. *nifi* lege *nisi*. Pag. 44. Lin. 14. *evacuantut* lege *evacuantur*. Pag. 54. Lin. 18. *minor-natus* lege *minor natu*. Pag. 62. Lin. 12. *cacochæcticos* lege *cachecticos*. Pag. 74. *adipso* lege *adiposo*. Pag. 85. Lin. 7. *ipso* lege *ipso*. & Lin. ult. *qui* lege *quia*. Pag. 87. Lin. 10. *poteris* lege *poterit*. Pag. 90. Lin. 19. *sui* lege *sua*. Pag. 91. Lin. 19. *upereft* lege *supereft*. Pag. 92. Lin. 19. *petechhis* lege *petechiis*. Pag. 155. Lin. 1. *batu* lege *batur*. Pag. 210. Lin. 13. *ur* lege *ut*. Pag. 224. in Nota *alcalesceens* lege *alcalescens*. In eadem nota Lin. ult. *extginuendam* lege *extinguendam esse*. Pag. 232. Lin. 3. *Institutionem* lege *Institutionum*.



THE R. B. A. T.

TABLE

